



عفريت من المعادي

محمد بن جمال



عصير
الكتب

مكتبة المطرية

منجزات

social

محمد بن جمال



لتحویلک إلى الجروب أضغط هنا



لتحویلک إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

إنهاء

إلى روح أبي رحمة الله عليه، من على فراشك أكثر من عشر سنوات لم أنسك يوماً، أتذكرة بتسامتك الهدئة، وكلامك، ونظراتك الطيبة التي كانت تحمل في طياتها حناناً وأمناً لمأشعر به منذ يوم فراشك.

أعلم أنك في مكان أفضل، فالطيبون يرحلون مبكراً.

إلى أمي تلك السيدة العظيمة التي أفنت حياتها من أجلنا، دعواتها لنا بمثابة نور يضيء لنا الطريق، أدعوه الله أن يطيل في عمرك ويجعلني قادراً على برّك واسعادك.

إلى كل إخوتي وأهلي وأصدقائي، وجودكم في حياتي هو الذي يدفعني إلى الأمام، شكرًا لكم.

المطلب

في إحدى قرى محافظة الجيزة، ولد طفل اسمه ماجد كان أبوه يعمل موظفاً بأحد المصانع الخاصة بالكرتون أما أمه فكانت تعمل موظفة في مجلس المدينة ... وكان لديه شقيق أكبر منه يدعى عبد الحميد وأخ أصغر منه اسمه صديق.

كان ماجد طفلاً ذكيًا له طموح وأمانٍ يريد تحقيقها ولكن في ظل الغلاء والظروف الاجتماعية البائسة التي يعيشها أغلب المصريين في ذلك الوقت تسبب كل ذلك في شعوره بالإحباط وأنه لا فائدة ولا جدوى، ولا أمل.

فأبواه يعملان ليل نهار لتوفير الاحتياجات الأساسية من مأكل ومشروب .. أما الملبس فكان ماجد يرث ملابس أخيه عبد الحميد بعد أن يزداد في الطول بعض سنتمرات الوزن بعض الكيلو جرامات .. وبالتالي يقوم ماجد بتسليم الراية لأخيه الأصغر صديق وهكذا تستمر الحياة.

لم يكن لدى والدي ماجد القدرة على شراء ملابس جديدة لكل منهم .. فكان الأولاد ينتظرون العيد بفارغ الصبر من أجل بنطلون جديد أو قميص وأحياناً كان يمر العيد بلا أي كساء.

كان ماجد في إجازة الصف الثاني الثانوي ويستعد لدخول الصف الثالث حتى يحقق حلم والده في أن يصبح مهندساً كي يتحقق ما لم يتحققه عبد الحميد الذي حصل على مجموع هزيل وهو ٥٠٪ لا يؤهله لكليه الهندسة وليس لديه واسطة لكي يدخل كلية الشرطة ... فاكتفى بالثانوية العامة وذهب ليعمل مع عمه في تجارة الأخشاب في أسوان .. فكان يعود إلى المنزل كل ٥٠ يوماً عشرة أيام .. ومن ثم يعود مرة أخرى إلى كوم أمبو.

لم تكن علاقة ماجد وأخيه الأكبر جيدة فطالما كانا كثيري الشجار بسبب وبدون سبب فكان عبد الحميد له غرفته الخاصة لأنه الأكبر .. وكان ماجد وصديقي غرفتهما الخاصة بهما .

فكان منزل الأستاذ سيد والد ماجد مكون من ثلاثة غرف وصالة وحمام ومطبخ ورث إيجاره عن أبيه فكان إيجار منزله شهرياً لا يتجاوز السبعة جنيهات، وكان دائماً في شجار مع صاحب المنزل الذي يرى أن أستاذ سيد يظلمه بسبب ذلك الإيجار الهزيل الذي يدفعه بينما قيمة الإيجار الحالي يفترض لا يقل عن خمسين جنيه، ولكن كان رد الأستاذ سيد دائماً:

« والله الحالة زي ما أنت شايف أنا عارف إن الإيجار القديم ده ظلم ليك بس لولا الشقة اللي ستراني كان زمانى أنا وولامي في الشارع وأنت عارف الظروف اللي جاي على قد اللي رايح ومرتب الشهر بقى يادوب يكفي لنصف الشهر»

كانت تلك الكلمات يقولها سيد دائمًا ليبرر موقفه أمام وريث عمارة الحاج سلامه الذي كان ينتظر بفارغ الصبر أن يترك سيد وأولاده وزوجته الشقة ليبيعها أو ليأجرها بسعر يتاسب مع أسعار ذلك الزمان، فما ذنبه في أن يتقادس نفس الإيجار من أربعين سنة ... في زمن كانت السبعة جنيهات قادرة على فتح بيت أما الآن فهي بالكاد قادرة على فتح زجاجة من الكوكاكولا.

وبسبب ظروف عمل عبد الحميد وسفره ما يقرب من خمسين يوماً انتقل ماجد إلى غرفته لكي يستعد لدخول مممة الثانوية العامة ... وكان مطالباً بالجد والاجتهداد لدخول كلية الهندسة لتحقيق حلم والده الأستاذ سيد.

أما في الأيام التي كان يعود فيها عبد الحميد من سفره كان يجلس في الغرفة مع صديقي بينما يتنعم ماجد في غرفته منفرداً واضعاً على باب الغرفة ورقة مكتوب عليها « هنا يرقد المهندس ماجد سيد» أرجو عدم الإزعاج.

بدأ ماجد تنظيم غرفته وقام بوضع كتبه على الأرض بجانب السرير فلم يكن في غرفته إلا سرير ودولاب صغيران وكان دائماً يطلب من والده أن يشتري له مكتباً فكيف له أن يدرس ساعات طويلة على تلك الطبلية الصفراء وكان دائماً أبوه يحدثه قائلاً:

-« يا ابني اللي عاوز يذاكر هيداكر في أي حته .. إحنا على أيامنا كنا بنطلع نذاكر تحت عمدان النور في الشارع ومكانش بيفرق معانا ...

أما دلوقتي عندك لمبة نيون قد الدنيا ومرروحة فريش مخلية أوضتك
تللاجة .. عاوز إيه تاني»

كان ماجد يستحيط غضباً قائلاً :

= «يابا با إحنا في زمن وانتوا في زمن لمبة إيه ومرروحة إيه اللي
بتتكلم عليهم ... وبعدين المكتب ده أساسني أنا مش بقولك عاوز فيلا
بـ ٣ جنain أنا بقولك مكتب خشب أعرف أذاكر عليه»

- حاضر لما أق卜ض هحاول أتصرفلك في مكتب حل عن دماغي
دلوقتي.

قالها متأففاً.

= أما نشوف.

وانصرف ماجد إلى غرفته حزيناً بائساً يرى أن الحال بينه وبين
كلية الهندسة سيكون غياب المكتب ومحدثاً نفسه:

«يا رب ليه كده يا رب، إحنا فقرا للدرجة دي معناش فلوس
نجيب حته مكتب أذاكر عليه ١٩٦٠ ليه يا رب مطلعتش ماجد سأويرس
ولا ماجد أبو هشيمة ولا ماجد الكدواني حتى ... يلا الحمد لله
على كل حال»

وبينما يتتصفح هاتفه النقال الصغير الذي يستطيع بالكاد الدخول
على صفحات موقع التواصل الاجتماعي ومراسلة بعض أصدقائه على
الفيس بوك والواتس آب اكتشف انه يحتاج لتجديد الباقة ... فقال:

١٠

«يا ربى على الحظ يعني أنا محتاج أشحن ب ٣٥ جنيه عشان
أجدد الباقة اللي ب ١٠ جنيه بتاعتي .. وعشان أرجع الـ ١٢ جنيه اللي
سالفهم ... ومش معايا في جيبي إلا ٣ جنيه ولسه أول الشهر مجاش
عشان آخد مصروف الشهر ... ليه يا رب مطلعتش ابن صاحب
شركة تي اي داتا ... ولا بلاش تي اي داتا كدا كدا معندهمش نت
... يلا الحمد لله أنا أحسن من غيري، أنا هقوم أنام بدل ما أقطع
شراييني»

وبالفعل يدخل ماجد في نوم عميق تاركا خلفه كل ما يقدر صفو
حياته، لم يكن يعلم حينها أنه بالرغم من أن حياته المادية غير
المستقرة وبالرغم من النقص في بعض احتياجاته ولكنه ما زال يمتلك
نعمه كبيرة وهي القدرة على النوم العميق في أقل من دقيقة ... تلك
النعمه التي قد يفتقدها أصحاب شركات كبيرة ومؤسسات عملاقة ...

حين قال الحمد لله قالها فقط بلسانه ولكن لم يستشعرها قلبه
ولو كان فعل ذلك لشعر بسعادة كبيرة، لو كان تأمل في نعم الله
الكثيرة التي اعتاد عليها فأصبحت أمراً عادياً بالنسبة له لا يشعر
الآن بأهميتها ولن يشعر مستقبلاً إلا إذا فقد إحداها ... فالحمد لله
حتى يبلغ الحمد منتهاه.



شجرة العرش

وفي اليوم التالي استيقظ ماجد في الساعة السادسة على صوت
أمه قائلة:

«يا ابني قوم صلي الظهر والعصر قبل ما المغرب يأذن قوم خلي
ربنا يرضي عنك عمالة أصحائك تصلي الظهر قبل العصر ما صحتش»

استيقظ حينها ماجد متثائباً وقال:

= هي الساعة كام؟

- بقت ٦ المغرب.

= طيب سيبيني أنا نام كمان خمس دقائق.

- يعني هي الخمس دقائق دي اللي هتخليك فايق قوووم صلي أنت
نائم بقالك ١٢ ساعة.

= يا ستي إحنا في أجازة.

- هو عشان إحنا في أجازة نقلب الليل نهار والنهار ليل؟ قوم يا
أبني نوم النهار وحش وبيتعب.

= يعني هو جسمي عارف أنا نايم بليل ولا بالنهار.

- يا ابني متعبنيش معاك ... طبعاً جسمك عارف وربنا خلقنا عشان ننام بالليل ونشتغل الصبح مخلقناش عشان ننام الصبح ونلعب بليل.

= طيب سيبيني خمس دقايق بس.

- ولا نص دقيقة .. قوم بدل ما أصحيلك أبوك.

= طب ما هو بابا نايم الصبح أهو اشمعنى يعني جسمه هو من المستورد اللي عادي ينام في أي وقت إحنا أجسامنا صيني ننام بليل بس عشان متهنجش ١٥

- يا ابني أبوك صاحي من الصبح وراح شفله وجه وبيقيل شوية مش نايم الساعة ٦ الصبح وصاحب المغارب ... قوم فز بقى يا رفت.

= حاضر هقوم أهو متزقيش بس ... توب علينا يا رب ...

- شوووف الواد وبجاته

وبالفعل قام ماجد وتوضأ وجمع صلاة الظهر والعصر والمغارب ...
وتناول وجبة الغداء وارتدى ملابسه وذهب لأمة قائلًا:

= ماما عاوز ١٠ جنيه

- ايديبيه !!! ١٠ جنيهيه ليه؟

= هدفع قسط نادي وادي دجلة وهغير استثنى العربية الجاجور
الصفرا اللي راكفة تحت البيت.

- أنت بتترأ عليا!

= تفتكري ١٠ جنيه تعمل إيه في الزمن ده! ده الموز بلبن ع القهوة
بقى بـ ٨ جنيه ولا فيه موز ولا فيه لبن.

- أمال؟

= أمال إيه!

- الموز بلبن فيه إيه؟!

= نعم؟ انتي سايده الموضوع الأساسي وهنتكلم الموز بلبن فيه إيه؟!
ابقي اسألني عم سعيد بتاع القهوة بيحط فيه إيه ..بس فيه زباين قالت
إن عم سعيد بيأكل الموز ..وبيلضربنا القشر وب يقولنا إن كان عاجبكم
مش هتذلونا بالـ ٨ جنيه.

- خلاص ما تنزلش وأنا أعملك موز بلبن هنا.

= يا ستي أنا هنزل أشوف أصحابي ونقعد نتكلم إحنا في أجازة يا
ماما بقى.

- أنت خلصت مصروف الشهر؟!

= لا مدي الفلوس لواحد صاحبي يضارب بيها في بورصة لندن.

-يا عسل..

=والنبي انتي اللي عسل .. ماما انتي ليه محسساني انكوا بتدوني
كل أول شهر ربع احتياطي البنك المركزي ٥ دول حيالله ١٥٠ جنيه ...
يعني ٥ جنيه في اليوم انتي متخلية خمسة جنيه في اليوم يعملوا إيه!

-علي أيامنا كنا بنأخذ

=بس بسس متكمليش كنتوا بتاخدوا ٥٠ قرش في الأسبوع وكتروا
بتحوشوا منهم في الحصالة وأخر الشهر بتستثمروا الفلوس دي في
شراء العقارات وفدادين المانجا وكانت أيام بركة وكلام التنمية
البشرية الجميلة ده .. بس ده كان زمان يا أمي .. إحنا في زمن غير
وبعدين كلمة كمان أقسم بالله أروح أمن الدولة أوديكم في داهية.

-لا وعلى إيه كنت عاوز كام؟ خمسة جنيه باين؟

=قصدك عشرين جنيه!

-عشرين إيه أنت هتستهبل مش كانوا عشرة من شوية؟!

=طب ما انتي فاكرة أهو ...عشرين جنيه ما ينقوش مليم
..صدقيني مش هتستحملي الكهربا في أمن الدولة ...شوفين لما اقولهم
إنك كنتي بتحرضيني على النزول وهدم الدولة المصرية هيقولوا إيه!

-انت بتتزني يالا؟

=لا يا ستر الكل بس انتي أمي ومقدرش أشوفك بتتعذبي قدامي
واسكت .. أكيد هزعل وهدمع.

-هتدمع؟ لا حنين يالا.

=انتي أمي برضه.

-فعلاً قلبي على ولدي انفطر وقلب ولدي عليا حجر ... بص آخرك
معايا ٥ جنيه أهي وبلاش تشرب موز بلبن ... ابقى اشرب موز بس
أو قشر موز يعني بس كفاية .. أوعى تكون بتشرب سجاير وشيشة يلا؟

= لا والله أبداً عيب عليكي.

-أيوة كدا .. ماجد حبيبي تربيتني.

= مش الفكرة بس علبة السجاير الكويسة بقت ب ٢٥ جنيه فيعني
محضوي في يجبلني ٦ علب سجاير وأكيد مش هشرب كليوباترا اللي ب
١٥ جنيه مش هييفي سرطان في الرئة ونشارة خشب في الدم كمان
يعني.

-يا نهارك أسود ... وأنا اللي فكراك محترم ... طب امشي من
وشي .. امشي وإياك ترجعلي الفجر زي كل يوم.

= ارجع امتى يعني.

-آخرك الساعة ٢.

= لا تصدقني فعلاً عيلة محافظة .. من عنيا يا سرت الكل.

-شوف الواد اللي معندوش دم ... أنا غلطانة.

وانطلق ماجد خارج المنزل ذاهباً لشلة الأنس وأصدقاء المدرسة كي يقضوا ما تبقى لهم من أيام الإجازة قبل الدخول في معمعة الثانوية العامة وعندما هبط إلى أرض الشارع استقل أحد التكاكيل إلى قهوة المعلم سعد حيث يجلس أصدقاؤه ميدو وضياء وشرقاوي وشரعوا في مجدي ومعطوف وشكري وإسلام.

وعندما وصل هنالك أصدقاؤه وقالوا له:

- تعال يا أبو الأمجاد، شد كرسي واقعد.

بعد أن جلس واعتدل في جلسته قال:

= ازيكم يا رجاله ... إيه الأخبار؟

- زي الفل يا معلم عملت إيه في موضوع إسكندرية هتيجي معانا!

= مش عارف والله ... لسه مقولتهمش في البيت ومش معايا فلوس.

- يا ابني الشقة بتاعة الواد محسن هيديني المفتاح وإننا علينا المواصلات وأكلنا هناك.

= يا ابني مش الفكرة .. الفكرة إني مش معايا فلوس ومقدرش أقولهم في البيت على فلوس عشان أنت عارف هيقولولي ثانوية عامة واقعد ذاكر وابن خالتك بيأكل الكتب من شهرين وأنت لسه مبدأتش وأنا مصروفي في الشهر ١٥٠ جنيه.

- ياعم قشطة ابقي اقعد ٣ أيام.

= يا ابني مواصلاتنا بس ٩٠ جنيه هيتبقى ٦٠ جنيه ..هاكل وأنزل الماية وأخرج ب ٦٠ جنيه؟

-يا ابني إحنا شباب مش لازم ناكل من بابا جونز يعني أو نتعشي في دومينوز بيتسا ..هنقضيها علب تونة وفول مدمس وهتتضضي والله.

= علب تونه؟ يا ابني التونة بقت العلبة ب ٢٣ جنيه، انتوا مش عايشين معانا ولا إيه؟ بلاش كل ده هصرف هناك في ٣ أيام ٦٠ جنيه طب وبعد ما آجي هبقى صرفت مصروف الشهر في أول ٣ أيام هرجع أعمل إيه؟ هبيع مناديل فلورا في الإشارات وأمشي أوزع أدعية ع الناس في المترو وأقول إن أبويا راجل كبير وما يصرفش علينا ومطلق أمري وبيطفى السجاير في فخادي.

-خلاص يا عم الفصيل خليك قاعد جنب أمك مش طالبة فصلان هي.

= طيب مين هيلا عبني دومنا امريكانى ع اللي يشيل المشاريب؟

-تعالا وريني نفسك.

وبعد مرور ساعات من لعب الدومينوز وكالعادة ينتصر ماجد ويقوم صديقه شكري أو كما يسميه الزيتون بدفع ثمن الموز بلبن الذي قد شربه ماجد.

ومن ثم يتناولون أطراف الحديث ..فيحكى لهم معطوف عن خاله الذي جلس في الكويت ولم يتركها وكان في قتاء منزله شجرة تسمى

شجرة العُشر وهي شجرة كبيرة معمرة يصل ارتفاعها إلى ما يقرب من ٣ أمتار ... تزهر في بداية كل صيف أزهاراً بنفسجية ولها ثمرة بداخلها شيء يشبه القطن وتلك الشجرة تنبت في الحجاز أيضاً وفي مكة وتكون الوحيدة المليئة بالخضار في فصل الصيف ويسكن فيها الجن.

فقطاعوه:

= يعني إيه يسكن فيه الجن؟

- شجرة مسكونة الجن بيبقى جواها.

= يعني أروح أدعك الشجرة يطلعلي منها عفريت؟

- الله أعلم يا خفيف المهم لو عرفت توصل للشجرة دي وتوصل للجن اللي فيها هيتحقق كل أحلامك.

= يا ابني أنت عبيط؟ جن إيه وأحلام إيه الناس طلعت بلوتو عملوا عربيات بالكهرباء وأنت تقولي جن وشبيك لبيك !!

- اترأوا براحتكم بس خالي سكن في بيت في الكويت ولقي شجرة زي دي ومن ساعتها وهو من أغنا أغنياء الكويت والشيخوخ هناك «اللي هما رجال الأعمال ورجالات الحكومة ومجلس الشعب» بيعترمواه وبيخافوا منهم لدرجة إن كلمته تمشي على التخين هناك.

= وكل ده بسبب الشجرة؟!

- لا بسبب الجن اللي في الشجرة ... الجن دا حقله القوة واداله
الفلوس والسلطة.

= وأي حد يقدر يعمل كده!

- لو عرفت توصل للجن اللي في الشجرة هتقدر بس أنت تلاقي
الشجرة.

= يعني اروح الكويت ولا السعودية بدل ما أدور على شغل أدور على
الشجرة مش كده!

- بالظبط.

= وهو هيحققلي أي حاجة يعني؟

- اه وأكتر بكثير.

= مممممم أنت شارب حاجة؟

- اه شارب لون نعناع ليه!

= لا متشربوش تاني عشان شكله بيعلي معاك أو عم سعيد بيحطلك
حاجة عشان يستعبدك ويحبسك القهوة زي المدمن كل يوم.

- أنا بتكلم بجد يا ابني!

= تمام مصدقك يا أصلييلا سلام بقى يا جدعان أنا هقوم
اروح ... وأبقى حاسبلي يا زبون على مشروبى ومتبقاش تلعب معايا
تاني عشان مقطعكش زي كل مرة.

انصرف ماجد تاركاً أصدقائه يستمعون باقي القصة من صديقهم معطوفاً ذاهباً إلى المنزل سيراً على الأقدام لكي يوفر أجرة التوكTok محدثاً نفسه، شجرة وجن؟ ويعمل اللي أنا عاوزه؟ ياسلام لو الدنيا سهلة كدا مكنش حد غلب كان زمامي دخلت كلية هندسة وحققت حلمي وحلم أبويا .. وسبت بيتنا وقعدت في فيلا في مدینتي وركبت عربية أحدث موديل واتجوزت البت اللي بحبها ...بس أنا مبحيش بنات، قصدي دلوقتي مش عموماً لحد من القراء يفهمني غلط.

فوووو يا عم ماجد دا أبوك كان بيقولك الصبح ابقى ذاكر تحت عمود النور ... وفوق وذاكر بدل ما يبقى آخرك تجيب توكتوك تشتعل عليه وتفضل زي ما أنت طول عمرك .. وبعدين حد يصدق معطوف دا الأي كيو بتاعه أقل من صدف البحر، داحتى صدف البحر بيفكر شوية.

وفجأة وجد ماجد نفسه أمام منزله فلم يشعر بالوقت ولا بطول مسافة المشي بسبب الأفكار التي كانت تدور في رأسه، فقام بفتح الباب متسللاً على أطراف أصابعه حتى لا يسمعه والداته فيويخانه لعودته قرب بزوغ الشمس.

دخل ماجد إلى المطبخ لكي يبحث عن طعام فهو على لحم بطنه منذ عدة ساعات فقام بفتح الثلاجة وأخذ يبحث عن شيء يسد به جوعة فسمع صوتاً غريباً ... صوت رياح تتحرك بشدة وصوت أقدام غريبة .. فاستعاد بالله من الشيطان الرجيم وقال متممًا بصوت مرتعش:

«مش معقوله عشان اتريات على الجن يطلعلي ..أعوذ بالله من الشيطان الرجيم، سلم يا رب»

وسمع فجأة صوتاً أجش قادماً من الخلف قائلاً:

-بتعمل إيه دلوقتي يالا؟

لم يلتفت إلى الصوت خوفاً من أن يرى الجن فيصاب بأذى...
وظل يردد قائلاً أعوذ بالله من الشيطان الرجيم ...أعوذ بالله
...انصرف انصرف!!

-بتعمل إيه زفت؟

=أبوس ايدك سامحني ... أنا كنت هأكل ...والله ما قصدي حاجة.

-وجاي متاخر ليبييه؟

=آسف والله ما قصدي ومش هعملها تاني والله مش هعملها تاني
بس انصرف ومتلبسنيش.

××فجأة النور بيتفتح ××

-أنت شارب حاجة يالا؟ مين اللي يلبسك؟ رينا يشفيك ...ع العموم
ابقى صحيني الساعة ٧ عشان الشغل.

=هو حضرتك بايت معانا وكمان عندك شغل؟!

-لا دا أنت شارب حاجة بجد بقى ... لف بصلی كدا يا ماجد.

xx يلتفت مغمضا عينيه متمتما بآيات من القرآن .. ويبدا في
فتح عينيه ببطء .. فيرى شخصا يرتدي جلباما أبيض .. يدقق
النظر فيه، فإذا بوالده أمامه وقد استيقظ من نومه على صوت
باب الشقة xx

-هتفضل متنحلي كدا كتير! فيك إيه؟

=ما فيش حاجة معيش يا بابا افتكرتك عفريت.

-عفريت!! عفريت لما يركب يا بعيد ... روح اتخمد عشان تعدل
نومك خلاص المدارس والدراسة ع الأبواب ... والله لأصحيك في
الدراسة من ٧ الصبح وأما نشوف آخرتها معاك إيه ... واقفل باب
التلاجة كويس واتأكد إنه اتقفل عشان متبوظش أنا مش كل شوية
أصلاح حاجة في البيت دا.

= حاضر يا أبويا.

وينصرف أبو ماجد ذاهبا إلى غرفته لينام قليلا قبل أن يستيقظ
مجددا ليذهب إلى عمله، أما ماجد فيذهب إلى غرفته يشعر بالخوف
من حديث صاحبة بخصوص الجن والعفاريت وبات يفكر في ما قاله
صديقة حتى غلبة النعاس وظللت الكواكب تطارده أثناء نومة فقضى
نومة كلة متقلبا على جنبيه شاعرا بضيق في صدرة يريد أن يستيقظ
من نومة لكنه لم يستطع فعل ذلك وحده وكان في انتظار مساعدة
خارجية توقعه حتى شعر بهزة في جسده وصوت ينادي عليه قائلاً

-ولا يا ماجد ... انت يا ابني.

= ايه ايبيه ميبيين؟

-قوم يا ابني أنا نرمين الفقي.

= نرمين الفقي هتيجي عندنا تعمل إيه؟

-طلب ما أنت عارف إن محدثش هيجي غير أملك يبقى بتسأل ليه؟

= اه عندك حق ... طيب فيه إيه؟

-قوم شوف أبوك عاوز إيه.

= هو فين؟ عاوزني ليه!

-واقف تحت في الشارع انزله شكله جايب حاجات تقيلة وعاوزك
تنزل تشيل منه.

= أنا لسه صاحي شو فيه صدقى ينزل.

-أخوك نزل يلعب مع صاحبه في السiber ومفيش حد هنا غيرك
... قوم يلا بدل ما يطلع يهزقك.

= يوووووووه طيب طيبيبي.

ينهض من فراشة مسرعاً ومن ثم يرتدي شبشبه وينزل مسرعاً
حتى يتتجنب وصلة من التوبيخ والتهذيق من جانب والده ليجد والده
واقفاً مع رجل يرتدي جلباباً ويجلس على عربية كارو ويدور بينهما
الحديث الآتي:

= بص يا ريس هو آخره ٥٠ جنيه.

- يا باشا والله ما جايب همه ٥٠ جنيه إيه بس !!

= خلاص يبقى ٦٠ جنيه ومفيش كلام تاني.

- يا باشا والله أقل من ١٠٠ جنيه أبقى خسران.

= لا أنت مش عاوز تبيع بقى وبعددين دا مكسر ولسه هيتدhen
ويتطلب.

- مش هيتفع والله .. هات ٩٥ وخليها عليك... ما فيهوش غير ٥
جنيه والله.

= بص هما ٨٠ جنيه أهو .. والله ما دافع جنيه زيادة كلمة كمان
وهمشي وهسيبهولك.

- ماشي يا باشا ولا يهمك هات الـ ٨٠ جندي.

وبالفعل يأخذ بائع الروباليكيا الـ ٨٠ جنيه وينصرف بينما يقف
ماجد مذهولاً من الطريقة التي كان يفاوض فيها والده البائع .. وكيف
حصل على ما يريد بالسعر الذي حدد .. وكيف للبائع أن يوافق على
إعطائه ذلك الشيء بهذا السعر مع أنه أقسم بأنه اشتراه بـ ٩٠ جنيهًا
فكيف له أن يخسر عشرة جنيهات في تلك البيعة ... وفجأة سمع صوت
والده ينادي:

- أنت هفضل متتحلي كدا كتير؟ طبعاً مانت لسه صاحي يا فاشل.

= لا مش متنج بس ازاي اشتريت الحاجة اللي كنت بتشترىها أقل عشرة جنيه من تمنها اللي البياع شاريه بيها وحاجة إيه دي اللي بتشترىها من بتابع الروباليك؟

- يا ابني أنت بتصدق حلفان البياعين .. دا بيصيع عليا ... بس على مين دا إحنا المعلمين.

= ماشي يا معلم ... طب وحاجة إيه دي؟

- بص وراك كدا ... وقولي رأيك.

= إيه دا؟

- دا مكتب مش كنت عاوز مكتب؟

= نعم والجربان دا مكتب؟

- هو أنت هتبسه دا مكتب هتسخدمه وقت المذاكرة بس وأنت مش مقطع الكتب يعني يعني هتقعدلك عليه ساعة في اليوم ... أظن ملکش حجة يا باشمھندس.

= المكتب دا بكتيره أوي يدخلني المعهد العالي للطريکو ... مش هندسة.

- بقولك إيه أنت كنت عاوز مكتب وأنا جبتهولك عارف لو ماجبتش مجموع ودخلت كلية هندسة هعمل فيك إيه × نظرات حادة ×

= هتعمل إيه؟

-شايف الرجال بتاع الروباجيكيا اللي مشي دا؟ هبيعله المكتب تاني
..وهبيعلك معاه ... ولو فاصلني فيك مش هتكلم معاه اللي هيدفعه
هآخده وهسيبك له ...

=لا وعلى إيه ...ربنا يستر.

-طب يلا شيل قصادي عشان تقيل مكتب خشب أصلي دا من بتوع
زمان مش زي مكاتب اليومين دول السكة.

وبالفعل يسرع ماجد لكي يحمل المكتب مع والده وكان المكتب ثقيل
جداً وكان يحدث نفسه قائلاً:

«شكلها هتبقى سنة زي الفل .. وهي جيلي انزلاق غضري في من أولها
..مش عارف المكتب المعن دا هذاكر عليه ازاي ... دا يسد النفس عن
أي مذكرة في الدنيا ... طب وبعدين دا مستحلطي عشان دفع ٨٠
جيئه في مكتب أمال لو بدأنا دروس ودفع فلوس الدروس هي عمل فيا
إيه؟ دا مش بعيد يعلقني فعلاً أو يبيع أعضائي للست اللي بتختطف
العيال في الإشارات ... الواحد لازم يسترجل عشان نعتق رقبتنا
وننقد بجلدنا»

وفجأة قاطع والده تفكيره قائلاً:

-ما تشيل عدل يا ابني أنت رامي الحمل كله عليا.

فأجاب ماجد:

=منا شايل أهو يا حاج.

- طب يلا عدي بالجنب بقى عشان يدخل من الباب وزي ما أنت على اوپتك عشان نحطه ونخلص.

= طب مش هنوديه لحد يدهنه الأول؟

- يدهن مين يا ابني .. دا عشان يتدهن يحتاج ٥٠٠ جنيه .. وبعدين لو اتدهن يعني المعلومات هتتزحلق أسرع؟ بلاش دلع واسترجل كدا.

= حاضر.. انت تؤمر يا كبيرنا.

وبالفعل يقوم ماجد والده بوضع المكتب في غرفته ويقوم أبو ماجد بإحضار أحد كراسي السفرة ووضعها عند المكتب حتى يكون لدى ماجد مكتب بكرسي ... ذلك الكوكتيل غير المتناسق من وجهة نظر ماجد كان في نظر والده أن المهمة اكتملت بنجاح وستؤدي الغرض المطلوب منها على أكمل وجه ولا يتبقى غير أن يجلس ماجد على المكتب ليستذكر دروسه ليلاً نهاراً ويقوم بأكل الكتب بشراهة حتى يتمكن من دخول كلية الهندسة ويحقق حلم والده أو بمعنى أصح يتجنب ما سيفعله به والده إن لم يدخل كلية الهندسة ويحلل الثمانين جنيهاً قيمة المكتب التي دفعها الحاج سيد

وها هو ماجد لا توجد لديه أي حجة فهو الآن يجلس وحيداً في غرفته لا إزعاج من إخوته ... ولديه مكتبه الخاص به للمذاكرة وقد قام بوضع كتبه وملازمته على المكتب منتظراً أن يفتح الله عليه ويبدا في التهام الكتب والفتوك بها.



فِعَالُ أَيَامِ الْدَرَاسَةِ

بينما قضى ماجد تلك الأيام المتبقية له في الإجازة جالساً على القهوة مع شلة الأنس، وفي بعض الأحيان كانوا يخرجون ليقضوا سهراتهم متسكعين في شوارع وسط البلد يشاهدون فاترينيات المحلات والزبائن المترددة عليها منهيين يومهم ببولة آيس كريم من العبد ويسرعون للحاق بالمترو قبل أن تدق الساعة الواحدة حتى يتمكنوا من العودة إلى المنزل فهم لا يملكون أجرة التاكسي الذي سينقلهم من حيث أتوا ولا توجد وسيلة نقل أرخص من المترو التي أصبح سعر تذكرتها ٢ جنيه بعد أن كانت جنيهًا واحدًا.

وفي مساء يوم الخميس الأخير في الإجازة وبعد أن قام ماجد بالاستعداد للدراسة والاتفاق على مجموعات الدروس الخصوصية مع المدرسين ومع أصدقائه قرر ماجد أن يقوم بعمل جدول دراسي لينظم وقته.

فطريق النجاح يجب أن يكون ممهدًا ومنظماً حتى يتمكن من استكمال المشوار دون عقبات وبالفعل وضع الخطة وكان ما يحزنه هو ذلك المكتب القديم الذي لا يشجع على الإطلاق على المذاكرة،

ما دفعه إلى اتخاذ قرار جريء وهو أن يقوم بتنظيفه ومسحة جيداً ودهانه يدوياً بواسطة فرشاة دهان وعبوة من اللاكيه البنى.

وبالفعل توجه ماجد إلى أقرب محل حدايد وبوبيات في المنطقة
وقام بشراء علبة لاكيةبني صفيرة وفرشاة صفراء اللون تستخدم في
دهان الخشب تشبه فرشاة الألوان ولكنها أكبر حجماً وشعيراتها أكثر
قسوة، ومن ثم عادي إلى المنزل ليجد أممه أمامه قائمة:

-اے جاپلی ایہ معالک؟

=لا دا مش ليکي دا للمكتب.

-أنت عمرك كدا ماتدخل عليا حاجة أبداً .. عمرك ما افتكرتني
ولا قولتلي خدي يا ماما دي ليكي؟

=انتي على طول في بالي يا حاجة بس انتي عارفة بقى الايد
قصيرة بس أوعدىك أول ما اشتغل ... وأحوش فلوس كتير، برضه مش
هدخل عليكى بحاجة داددادادا.

-ما أنا عارفاك ..ع العموم ربنا ما يحوجني لحد فيكم.

=أنا بهرج معاكى يا امى أنا كلی ليکى والله.

-ما بآخذش منك غير كلام، طب قولي بقى هتعمل إيه بالحاجات
دي؟

= هدنه المكتب عشان أعرف أذاكر عليه بدل ما هو مبهدل كدا
ويسد النفس،

-يا ابني أنت هتتجوزه .. دا يا دوب هتذاكر عليه بلاش دلع.

= لا الأهم من الشغل ظبط الشغل ... فلازم أظبط الاداء عشان
نعلي كفاءة الاستيعاب صدقيني المهم النفسية .. زي ما قال ستيف
جوبرز.

-مين ستيف جوبرز دا!

= مش عارفة مين ستيف جوبرز بتاع آيفون وأبل!

-لا معرفوش منتا عارف موبايلي صيني بشرىحتين.

= طب زي ما قال مارك زوكربurg!

-ودا مين دا كمان!

= دا مدرس الكيمياء الجديد، فكك من الموضوع ككل .. المهم هاتيلي
قماشة قديمة وطشت ماية عشان أغسلة الأول كويس قبل ما أدهنه،

-روح هتلacci ع الانبوبة حته قماشة خدها وعندك جردل الماية
في الحمام بس بعد ما تخلص ابقى املأه عشان الماية لما تقطع نلاقي
ماية نتشطف بيها.

= حته القماشة دي اللي هي الفانلة البيضا بتاعتي والبوكسير
بتاعي اللي قدموا عليا مش كدا؟

-لا هجيبلك قميص الشغل بتاع أبوك تمصح بيه المكتب ... قوم فز
وخلص عشان تبدأ مذاكرة أما نشوف آخرتها معاك إيه.

وبالفعل ينصرف ماجد ليحضر العدة المتمثلة في بوكسره الأورجوني القديم الذي تستخدمنه أمه في إمساك الحال التي قد كسر مقبضها وجردل المياه الموجود في الحمام الذي يلعب دوراً هاماً عند انقطاع المياه التي أصبح انقطاعها شبه يومي ويدخل غرفته كاشفاً عن ساعديه معلنًا استعداده لجولة النظافة والنقاشة التي سيقوم بها بعد قليل.



بِلَيْهُ مَلِيْفَهُ

يبدأ ماجد في نفض التراب من على المكتب باستخدام تلك القماشة ويقوم بفك الأدراج والتخبيط عليها بقوة لكي يناثر التراب العالق بداخلاها ويخرج منها.

ويقوم بمسح المكتب من الداخل ومن الخارج بهمة ونشاط لكي يزيل التراب كله من عليه حتى يصبح المكتب نظيفاً جاهزاً للدهان، وأثناء ذلك وجد ماجد ورقة في أحد الأدراج، يبدو عليها أنها مكتوبة منذ زمن بعيد، فلم تكن تشبه نوعية الأوراق الموجودة في زماننا هذا، فكانت تمثل في قوتها إلى الورق المقوى، ولونها غالب عليه الصفار، يبدو أنها مصنعة يدوياً في زمن لم يعرف الآلات.

أخرج ماجد الورقة ليجد فيها كلاماً كتب بلغة عربية وبحبر قد أصابته عوامل التعرية كلام لا يبدو أنه كتب في زماننا هذا، وكان نصه غريباً:

«المكتب ذلك المكان الذي يفتح لك درباً جديداً من دروب الحياة، تعرف من خلاله معنى الكنز الحقيقي الكامن بالداخل، إذا وجدته استفد منه، ومرره لآخر، فالخير يبقى والشر يفنى مهما طال الزمان»

ظل يقرأها مرات عديدة، لا يفهم من كتب ولا ماذا يقصد بها، هل هي سقطت من أوراق كانت تخص صاحب المكتب قبل أن يبيعه، أم أن صاحب المكتب كان يهتم بجمع البرديات القديمة، وقد سقطت منه سهواً في ذلك المكتب، ولكن كيف كتب باللغة العربية بدلاً من اللغة الفرعونية القديمة.

لم يعر الموضوع اهتماماً ولكنه حفظ تلك الكلمات عن ظهر قلب ووضع تلك الورقة جانباً، وأكمل ما بدأه حتى أصبح المكتب الآن خالياً من الأتربة جاهزاً للدهان الذي سيحوله من اللون الخشبي الباهت إلى ذلك اللون البني اللامع الذي يبعث في النفس بهجة وإشراقاً واقبالاً على المذاكرة.

يفتح ماجد علبة الدهان ويغمس بها الفرشاة ويخرجها بعد يحركها على أطراف العبوة حتى يتتأكد أن زيادات الدهان عادت مرة أخرى إلى العلبة حتى لا تساقط قطرات الدهان على الأرض، واقترب من المكتب ليلوئه حتى سمع صوتاً من الخلفية يقول:

«مش كفاية كدا»

التفت ماجد ناحية باب الغرفة قائلاً :

= لا يا بابا مش كفاية هدهنه وهخليه جديد عشان يفتح نفسي.

ولكنه وجد الباب مغلقاً، فتحرك ناحية الباب وقام بفتحه فلم يجد أحد خلف الباب، فلم يعر الأمر اهتماماً وهم بوضع الفرشاة

مجدداً في اللعبة وأخرجها قبل أن تلامس المكتب بدأ المكتب في الاهتزاز بشدة، فما كان من ماجد إلا أن صرخ قائلاً:

فجاءت أمه مسرعة قائلة:

-فی ایه یا ابُنی فی اسیه بتزعق لیه؟!

زلزال یا ماما زلزال.

-فین دا پا حبیبی بس.

= كان لسه شغال والمكتب كان بيتحرك جامد والسقف كان هيقع
عليا.

-مفيش حاجة يا ماجدأنت شكلك مش نايم قوم نام وابقى كمل
بكرة الصبح.

=والله يا ماما زلزلا، أنا متأكد.

-يا حبيبي أنا كنت قاعدة برا ومفيش حاجة والله، قوم بس نام
والصباح رباح يلا اقفل العلبة وابقى كمل شغل الصبح عشان تعود
نفسك على الصحيان بدري وبعدين بكرة صلاة الجمعة يلا قوووم يا
ماجودة يا عسل.

= حاضر بس أنا متأكد إن كان فيه

-خلاص بقى نام يا حبيبي.

= حاضر هنام.

وانصرفت أم ماجد وتركت ماجد محدثاً نفسه:

«أنا متأكد إن كان فيه زلزال، يا لهوي لو اتكرر تاني والبيت قديم ومش مستحمل نفخة، بقى آخرتها أموت تحت الانقاض جنب ملزمة فيزيما ومكتب معفن !!»

بالفعل يترك ماجد مهمة دهان المكتب إلى اليوم التالي ويذهب إلى سريره الصغير الذي يقع في جانب الغرفة، ويستيقى على ظهره راجياً أن ينال قسطاً قليلاً من النوم بعد ما شعر به من خوف وقلق لا يعلم مصدره ولكنه ظل طوال الليل يتقلب يميناً ويساراً لا يعرف النوم سبيلاً إليه حتى غالبه النعاس في النهاية، ليستيقظ على صوت والدته قائلة له:

-قوم يا ماجد عشان تنزل تصلي ... قوم مش كل مرة تنزل على الصلاة كدا مش هتنفعلك صلاة.

= حاضر حاضر هي الساعة كام؟

-بقت ١٢ إلا ربع قوم يلا قبل إقامة الجمعة عشان الملائكة تكتب اسمك.

= حاضر هقوم هقوم.

وينهض ماجد من على سريرة مسرعاً ويدهب إلى الحمام ليتوضاً
ويغسل غسل الجمعة ومن ثم ينزل مع والده إلى المسجد ليصلِّي
ركعتي تحيَّة المسجد ومن ثم يستمع إلى الخطبة التي يلقيها الإمام
ليجد الإمام يقف على المنبر وبصوت حاد يحدث المصلين عن أهمية
طاعة ولِي الأمر وأن الفقراء هم من يدخلون الجنة ويحكى قصص
زهد الصحابة وأنهم كانوا يتحملون الحياة الصعبة ولم يتذمروا.


ويستكمل حديثه متوكلاً على الشعب الذي لا يتحمل انقطاع التيار
بعض ساعات يومياً في حين أن الكهرباء لم تكن موجودة في عصر
الصحابة، ويستنكر سخط الناس على ارتفاع الأسعار ولوهمهم على
الحكومة في ذلك بالرغم من المشكلة فيهم أولاً وأخيراً .. وإن الله لا
يغير ما بقوم حتى يغيروا ما بأنفسهم، وكيفما تكونوا يولي عليكم،
ويأمرنا في نهاية الخطبة بالصبر والتحمل خاتماً حديثه بآيات كريمة
يستخدمها الإمام لخدمة هدفه.

كانت خطبة هشة موجهة تلقى اللوم على المجنِّي عليه لا على
الجاني لذلك لم يكن أحد في المسجد متفاعلاً مع الخطبة وكان
أغلبهم يضعون رؤوسهم بين قدميهم مغمضين أو عينهم فمنهم من
غلبه النعاس ومنهم من ظل يقاوم النوم وأخرين يسندون ظهورهم
على الحائط يتأملون في مراوح المسجد آخرون يتصفحون هاتفهم
المحمول حتى يمر الوقت وتبدأ الصلاة.

وبالفعل مع انتهاء الصلاة بالسلام عليكم ورحمة الله وبركاته
يهرول المصليون للخروج من المسجد بسرعة وكأنهم في سباق

السرعة بالأوليمبيات فيخرج ماجد وصدقى مع أبيهما ويدهبا لكي
يتاعوا الفاكهة من الرجل الذى يقف أمام المسجد بسيارته الكارو
مناديا بصوته الجهوري «عسـسـسـسـسـل يا عـنـنـنـنـب» «حـمـرـرـرـرـرـرا
يا بـيـطـطـطـطـطـطـيخ» فيقوم أبو ماجد بالطرق على البطيخة بحرفية
بالغة لكي يعرف هل هي حمراء مسئولة أم لا طعم لها تشبه الخيار،
ويطلب من البائع أن يشقها ويخرج قلبها حتى يتتأكد من حسن اختياره
وبالفعل تكون البطيخة حمراء اللون مسئولة المذاق فيدفع أبو ماجد
ثمن الفاكهة ويتماشى في فخر وخلاء فخوراً بمهارته البالغة في فن
اختيار البطيخ، ويدهبا إلى المنزل ليتناولوا الغداء الذى أعدته أم
ماجد.

وبعدها يدخل ماجد غرفته لكي يبدأ بدهان المكتب الذى لم يكمله
 بالأمس أو لم يبدأ به بعد بمعنى أكثر دقة.



المدخل

يدخل ماجد إلى الغرفة ويغلق خلفه الباب عازماً على أن ينتهي من دهان مكتبه، فالاليوم هو يوم الجمعة وغداً أول أيام الدراسة وقد أخذ عهداً على نفسه أن يأكل الكتب أكلًا حتى ينال مراده ويدخل كلية الهندسة ليصبح مهندساً تفخر به عائلته.

وبالفعل قام تلك المرة بفرش أوراق الجرائد تحت المكتب حتى لا تساقط قطرات من الدهان على السجادة التي تغطي ذلك البلاط الموزايكو القديم وقام بإغلاق المروحة وفتح علبة الدهان وأدخل تلك الفرشاة إلى العلبة واقتربت يده من ظهر المكتب تساقط من الفرشاة بعد قطرات الدهان على ورقة الجرائد فقد نسي ماجد مسح زيادات الدهان من على الفرشاة وبينما تقترب الفرشاة من المكتب حتى سمع صوتٌ يرج أرجاء المكان قائلاً:

-أنت بتعمل إيه يا مجنون!

سقطت الفرشاة من يده وسقط هو الآخر على الأرض ونظر مفزوغاً حوله في أرجاء الغرفة فلم يجد أحداً ولمح بطرف عينه الباب مغلقاً كما كان فتأكد أنه لا أحد قد دخل الغرفة، فتحرك في خطوات

مرتعشة نحو الباب وفتحه ليرى من بالخارج فيجد حالة من السكون
تملاً أرجاء المكان بالخارج ولا يوجد أحد ... فيغلق الباب مرة أخرى
ويستعيد بالله من الشيطان الرجيم ويقول:

= هو فيه إيه؟! حد هنا؟!

ليجد صوتاً أجمل قائلاً:

-أيوة ياعم أنا هنا.

«ينتفض مذعوراً وقد انتابته حالة من الهلع وبدأت تساقط قطرات العرق من جبهته على عينيه وفمه فصار يشعر بحرقان في عينيه بالكاد يستطيع أن يفتحها بينما يتذوق لسانه قطرات الملح التي تملأ قطرات عرق وجهه ويصبح قائلاً :

= أنت مين؟ وفين وعيوني مالها أنا اتعميت ولا إيه؟

-يا عم اتعميت إيه بس بلاش أفورة كدا خد منديل امسح عينك
من العرق وأنت نظرك هيرجلك.

«بيمسح عينه وبيبتدي يشوف كوييس وبيدور على مكان الصوت
ومش لاقيه»

= أنت فين أنا مش شايفك أنت مين؟ عاوز إيه؟ الوو الووو

- الو إيه يا أهلل هو أنت بتكلم خدمة العملاء أنا هنا موجود
قدامك.

= فين أنا مش شايف حاجة ... أنا اتعمي.

- طب اهدي كدا بس وأنا هظهر لك عشان لو مهدتش مش هيبقى عرق بس وعيي تبقي في ٣ ثانوي وأمك تلاقيك عامل على روحك.

= انت مين يا عم وفين ...

- أنا هنا قدامك .. أنا في المكتب

= في انهي درج؟

- يا ابني درج إيه بس هو أنت بتكلم ملزمة فيزيا ... أنا جن المكتب.

= جن؟! أعوذ بالله من الشيطان الرجيم ... أعوذ بالله من الشيطان الرجيم.

- ها خلصت؟

= انت ماتحرقتش ليه؟

- يا ابني اتحرق إيه أنا جن مش شيطان.

= انصرف أعوذ بالله ... لا الله إلا الله ... لا الله إلا الله.

- محمد رسول الله.

= محمد رسول الله؟ أنت بتشغلني يا عم أنت؟ جن إيه اللي ماتحرقش دا بعد ما قولت لا الله إلا الله.

- يا ابني هو حد قالك إني جن كافر؟ أنا جن مسلم وكويس وطيب وعادي يعني زيكم.

= جن كويس ومسلم؟

-اه يا عم ... زي ماما كريمة مختار كدا هاهاهاها قفشات عفاريت.

= انت بتتألش عليا؟

-مش الفكرة بس يعني انت داخل فيها وعاوز تحرقني وشغلبني آدمين رخيص أوي يعني.

= عشان ما تأذينيش.

-يا ابني أآذيك إيه بس هو أنا فاضي للهبل دا وبعددين مين اللي قالك انك لو طلعلك جن تقول كدا عشان تحرقه؟

= عادي يعني معروفة في التلفزيون وفي أي حنة بيقولوا كدا.

-يادي النيلة على التلفزيون اللي بوض دماغكم، يا ابني الكلام دا مش موجود عشان أنا عادي جن مسلم مؤمن بربنا .. أما هتقولي أعود بالله من الشيطان الرجيم هقولك يارب .. مش هختفي وهترق والجودا.

= طب وإيه اللي جابك في اوضتي؟

-أبوك.

= أبويا؟

-مش هو اللي اشتري المكتب؟

=نعم؟ هو يعني اشتري مكتبك اللي كنت بتذاكر عليه وأنت في
مدرسة الجن الإعدادية بنين؟

-جن إعدادية بنين؟ يا ربى يوم ما أطلع لبني آدم يطلع الآي كيو
بتاعه زي أحمد موسى.

=أحمد موسى؟ أنت تعرفه؟

-هو فيه حد مايعرفوش؟ دا قاطع خلف أصحابي عفركوش و
بردقوش وسليم.

=سليم؟

-اه سليم عادي بنسمي سليم إيه المشكلة؟

=لا مفيش مشكلة بس يعني افتكرت إن موضة الأسماء الجديدة
دي عندنا إحنا بس.

-لا يا عم عادي إحنا زيكم بالظبط ولاد ناس وبنسمي سليم
وجودي ورودينة وجاسر عادي مش عشان جن نزنق نفسنا في خانة
الأسامي اللي تعرفوها دي.

=طب وإيه علاقتك بالمكتب؟

-ياااه دي قصة طويلة أوي وأنا مفرهد والنهاerde أجازتي وعاوز
أرجع أكمل نوم.

= أجازتك ازاي؟

-يا ابني ما أنا أجازتي الجمعة برضه عادي يعني مش معنى إني جن إني أبقى زي الطور في الساقية أنا برضه كائن حي.

= أنت شغال؟

-أمال لسه باخد مصروف من أمي، أنا شغال من وأنا عندي ٣ شهور.

= ٣ شهور! أنت هتشتغلاني؟

-أشتغلك إيه يا ابني إحنا الجن بنكر بسرعة وبنبلغ بسرعة ماما فطمنتني بعد أسبوع واتخرجت بعد شهرين وفضلت عاطل شهر مستني أتعين لحد ما جبت واسطة شغلتنى.

= تجيب واسطة؟! نعم ...انتوا كمان عاوزين وسايط؟

-اه عادي عاوزين واسطة إحنا اه جن بس للأسف جن مصرى.

= حتى في الجن فيه مصرى وسعودى وكدا؟

-اه عادي بس الجن السعودى أفقى من الجن المصرى عكس البنى آدمين؟

= نعم اشمعنى؟

-عمال تدخلنى في كذا موضوع مع بعض أجوابك على إيه دلوقتى؟

= ليه الجن السعودي أفقر من الجن المصري معندهمش بتروح؟

- لا طبعاً عندهم عادي.

= أمال إيه؟

- بس هو الوضع عندنا مختلف حبتن إحنا الجن مخلوقين من

إيه؟

= نار.

- عفارم عليك فمش هنجيب بتروح يعني عشان هنمسمك فيه ونولع

الدنيا فملوش استخدام عندنا فهمت؟

= اها طب وهما عايشين ازاي؟

- عادي عقود عمل في مصر ... أنا كافل اتنين جن سعودي شغالين

هنا في مصر وبآخذ منهم رسوم كفالة من كل واحد ٥٠٠ ريال.

= يا ابن اللعيبة فلوس من لاشيء .. دا أنت مصرى معالك رز بقى
هاهاها.

- هاها الحمد لله ربكم كريم.

= بس أنت شغال إيه؟

- منا قولتلك شغال كفيل ... بروح آخر الشهر آخذ الإتاوة .. قصدي

فلوس الكفالة وأرجع أنتخ.

= طب ولو مدفوعش؟

- أرحله على بلده...

= ممممم بس برضه مقولتليش جيت هنا ازاي.

- حكيلك يا سيدى.

منذ حوالي مائة عام في أحد أيام الشتاء بينما تساقط الأمطار الشديدة في نهاية شهر ديسمبر كانت تسكن عائلتي في شجرة تسمى شجرة العُشر كان جدي الأكبر يعيش مع جدتي وأبنائه في الشجرة وأغصانها حتى جاء مجموعة من البدو قاموا بالاحتماء فيها من المطر حينها تركهم جدي ولم يحاول إزعاجهم مقدراً الظروف المناخية القاسية التي تمر بها المنطقة.

ظلوا نائمين استيقظ جدي في الصباح وذهب للعمل مع إخوته في أحد حقول البانجو القريبة من الشجرة وعندما انتهى من عمله عاد إلى الشجرة ليفاجأ بأن البدو الذين كانوا يحتمون بالشجرة قاموا بقطع أغصانها وتقطيعها بالكامل إلى قطع من الخشب الصغيرة، حينها فجع من المنظر ولم يتمالك نفسه فأصيب بهبوط حاد في الدورة النارية ومات.

= الدورة النارية؟

-اه زي الدورة الدموية كدا عندكم يعني.

= طب وبقية أهلك؟

- كل واحد كان مستخبي في حنة خشبة من الحنف الصغيرة، أبويا
كان مستخبي في حنة وأعمامي في حنة تانية وعماتي وهكذا.

= طب وهمًا فين دلوقتي؟

- اتفرقوا في كل حنة عمي سامي هو وولاده في دولاب عند رجل
أعمال كبير في إسكندرية ... أما عمتي إيناس هي وولادها وأحفادها
في نيش عند ست في المنصورة بس دي حياتها مستقرة ومبسوطة.

= اشمعنى؟

- بقولك قاعدة في نيش تقولي اشمعنى؟

= يعني قاعدة في الزمالك!

- يا ابني قاعدة في نيش عند أسرة مصرية .. محدش بيقرب
للنيش عشان أمه مقتلوش أو تضرره مطولة في وشه فبقالها أكثر من
٢٠ سنة من ساعة ما الست اتجوزت وباب النيش مقفل عليهم ولا حد
بيزعجهم ولا حد بيقرب لهم وعايشين في هدوء ولا كأنهم في مأونتن
فيو.

= مأونتن فيو!

- اه اللي بيعملوا فيها تشيل أوت دي .. المهم يعني عيشتهم مررتاحة
وهاديه.

= طب وباقى أهلك؟

-أبويا بقى الله يرحمه مات هو وأمي بفيروس سى.

= فيروس سى؟ ازاي؟

-يا ابني مصر الأولى عالمياً في فيروس سى.

= منا عارف بس انتوا جن هييجيلكم ازاي فيروس سى؟

-عادي في مرة لبسبني آدم .. والبني آدم دا كان عنده فيروس سى
فاتعدى منه.

= يااه حتى الجن ممكן يجيلاة فيروس سى! طب وامك؟

-مفيش كانت بتدي لأبويا حقنة الأنسولين فاتشك فجالها
الفيرس.

= أنسولين؟ هو كان عنده سكر؟

-سكر وضغط وفيروس سى ... كان باقيله أنفلونزا الخنازير ويكمel
المجموعة.

= يلا الله يرحمه.

-اللهم آمين ... بس وسابولي المكتب دا لوحدي ومن ساعتها عايش
لوحدي.

= طب وأنت ليه طلعتلي أنا بذات؟

-حبيتك.

= لا بجد؟

- مكنتش هطلعلك ولا أعبرك بس لما لقيتك هتدهن المكتب وتسد
مسام الخشب قولت الحقك مش طالبة حر في الصيف يعني وأنا بطن
أيدي بيعرق كتير وال حاجات بتترفلط مني.

= إيه؟

- مش موضوعنا المهم أنا طلعتك اللي كان كان ... هتفضل تضيع
الوقت كدا كتير؟

= لا آسف بس هيبيقى الوضع إيه دلوقتي أنا داخل على ثانوية عاملة
وعاوز أركز في المذاكرة.

- طب ما تذاكر أنا مالي.

= ما بعرفش أذاكر قدام حد ومبقاش عاوز إزعاج.

- يا ابني إزعاج إيه بس أنا ولا هعمرك أساساً.

= طب أنا بحب أشغل قرآن وأنا بذاكر ودا ممكن يحرقك!

- يا دين النبي يا ابني أنا جن مسلم عادي واسمي سمير.. سمير
أبو الوفا جن مسلم أعزب.

= يعني عادي؟

-اه اتكل على الله بقى.

= طب مش هتساعدني؟

- هساعدك ازاي؟

= يعني تروح تجibلي امتحانات الثانوية وتخليني أطلع من الأوائل
وكدا

- يا ابني أنت فاكرني شاومنج؟! الله يخربيت التلفزيون اللي سوا
سمعتنا كدا.

= أمال انتوا بتعملوا إيه؟

- بص مبدأياً كدا أنا ممكن أساعدك فعلاً في حاجات كتير بس
فيه حاجات مقدرش أتدخل فيها.

= زي إيه؟

- زي الحب مثلًا ماقدرش أخلي بنت تحبك ... زي الرزق ماقدرش
أجيبلوك فلوس لحد عندك وأنت نايم على بطنك ... زي الأكل
ماقدرش أجبلوك حاجة تأكلها ... عشان أنا جن مش واحد شغال في
أبو عمار بتاع الشاورما.

= نعم؟ يعني لا حب ولا فلوس ولا أكل... أمال أنت إيه فايدتك؟

- بص أنت من جهة هتستفيد مني فأنت هتستفيد بس الشغل
الضيق بتاع طلعلك جن فيحققلك كل حاجة دا اتلغي ... أنت طلعلك
جن اندبنت وليه شخصيته شغل الاستعباد دا اتلغي لقد ولدتنا
أمهاتنا أحراراً ولن نستعبد بعد اليوم.

= جرا إيه يا عم عرابي!

- سوري اندمجت شوية ... كل اللي عاوز أوصلهولك إني مش
هحققلك رغبات كدا وش يعني عاوز فلوس هقولك ازاي تجيبها ...
عاوز تعلق قلب بنت هخليك تعرف تعمل كدا بس مش هجيبيهالك في
شوال يعني وتجري ورالك وتقولك أماجد أحبب ألبى!! فهمت؟

= اه تمام ... طيب بص أنا كنت عاوز أطلع رخصة طلعهالي.

- طلعت روحك يا بعيد ... ليه ياربي يوم ما أطلع لإنسى يبقى
بالغباء دا؟! يا ابني هو أنت طلعلك أمين شرطة؟ أنا جنى محترم ...
لو عاوزنا نبقى كويسين مع بعض بلاش غباوة ممكنا؟

= حاضر .

- تمام سيب بقى المكتب كدا من غير دهان وروح ظبط ورقل
عشان تبدأ مذاكرة من بكرة إن شاء الله.

يخرج ماجد من الغرفة محدثاً نفسه لا يعرف ماذا سيفعل هل
هو في حلم أم هذه حقيقة، هل عالم الجن والعفاريت موجود حقاً في
عالمنا أم هي مجرد تهيؤات لا أكثر، ولكن كيف تكون أحلاماً وها هو
قد ظهر له وتحدث معه، حينها لم يقطع تفكيره غير خبطات أمه على
كتفه قائلة:

- ماجد يا حبيببي، أنت بتكلم نفسك؟!

= لا لا أنا بسمع لنفسي اللي ذاكرته.

= اه اه بصي أنا هنزل دلوقتي أجيبي حاجة وطالع على طول.

قالها مرتبكاً ومتوتراً مما أربك أمره..

صاحت قائلة:

- «في إيه يا ابني مالك؟ دهنت المكتب؟»

= لا لا هسيبه كده، مفيش وقت، اللي عاوز يذاكر يذاكر في أي حته
بابا كان بيذاكر على عمود النور زي ما كان بيحكيلي ولا إيه؟

- اه اه طبعاً عمود نور اه ... طب أنت هتنزل تذاكر تحت عمود
النور أنت كمان؟

= لا أنا هجيب ورق بس بصي سلام سلام دلوقتي.

استغربت أم ماجد تصرفاته وتواتره المفاجئ مما وترها هي الأخرى فدخلت غرفته تفتش عن أي شيء يطمئن قلبها فلم تجد أي شيء يثير القلق ولم تجد أي شيء يطمئنها أيضاً، ولكنها وجدت المكتب وقد فرش أسفله ورق جرائد وعلبة الدهان قد تركها مفتوحة، وأعلاها الفرشاة فقامت بغلقها ولم ورق الجرائد وأغلقت خلفها النور وباب الغرفة وخرجت وهي تتسائل.

- هو في إيه؟ الواد دا ماله؟

كان ماجد يسير في الشارع لا يعرف إلى أين يذهب ولا إلى من ولكنه كان يفكر فيما حدث ويحدث نفسه قائلاً :

«يعني أنا طلعلني عضريت دلوقتي، ممكن أستغله وأحقق كل رغباتي، ازاي المكتب المعنون دا اللي مكنش عاجبني بيقى هو دا الكنز اللي ممكن عن طريقه أوصل للي أنا عاوزه، يكون ظهور الجن دا هو معنى الكلام اللي كان مكتوب في الورقة»

«المكتب ذلك المكان الذي يفتح لك دربًا جديداً من دروب الحياة، تعرف من خلاله معنى الكنز الحقيقي الكامن بالداخل، إذا وجدته استفدت منه، ومررها لآخر، فالخير بيقى والشر يفنى مهما طال الزمان»

«بس دا قالي أنا فيه حاجات مبعروفش أعملها؟ لا هيجبلي امتحانات ثانوية عامة ولا هيخليني أحب واتحب، دا حتى مش هيعرف يطلعلي رخصة!، أنا حظي طلع في جن أكتع ولا إيه؟ أنا خايف ليخليني أخدمه أنا، تبقى مصيبة».

حينها سمع صوتاً ينادي عليه من بعيد:

- «ماجد يا هندسة مالك سرحان في إيه؟»

التقت إليه ماجد فوجده عم شريف البقال، كان رجلاً سميناً يرتدي جلباباً له صلة تعكس الضوء عندما تتعامد عليها أشعة الشمس ظهراً أو عندما يقف على ماكينة تقطيع اللانشون فتساقط أشعة المصباح النيون مباشرة عليها، قد كسر الخمسين عاماً يحب

الثرثرة مع كل زبائنه، دائمًا لديه خبرات ومواضيع في شتى جوانب الحياة أغلبها يكون من نسيج خياله ولكنه له طريقة مميزة في السرد وربط الأحداث تجعلك تتغمس في حكاياته وتعيشها كأنك بطل من أبطالها.

أجابه ماجد حينها:

= أنا تمام يا عم شريف أخبارك إيه؟!

-- الحمد لله بخير، شوفت الواد حازم؟

= ماله؟

- كان لسه بيحكيلي عن موقف رعب حصله امبارح وهو بيغير مراته الأنبوية.

أجابه ماجد غير مكترث بالحكاية:

= جراله إيه؟

- بيقولك لقى الشبشب بيتحرك لوحدة وفجأة طار من الشباك.

= إيه؟! « قالها متعجبًا ومندهشًا »

- والله زي ما بقولك، ومن ساعتها وهو مش راضي يدخل البيت، أنا مش عارف إيه اللي حصل، الحنة بقت مليانة عفاريت.

= عفاريت إيه؟! قالها متوتراً

-اه عفاريت، هو أنت نسيت العفريت اللي زق أم منصور الله
يرحمها، الاست بقالها كام شهر ميطة ومن ساعتها الشارع بقى ملبوس.

حينها تذكر أم منصور تلك السيدة الثلاثينية السميكة التي سقطت من الدور الثالث وهي تقوم بنشر ملابسها، وكانت وحيدة في المنزل بينما كان أولادها في المدرسة وزوجها كان في عمله، حينها أطلق أهالي الشارع تلك الإشاعة التي انتشرت في المكان بأكمله، أن من قام بذلك هو الجن الذي كان يسكن المنزل بعد وفاة صاحبة فيه منذ عدة سنوات.

حينها قال ماجد :

= طب والعفاريت دي عاملة ازاي يا عم شريف؟

- بص يا ماجد العفريت دا بيبقى بحوافر وقررون طويلة، بيبقى تخين وصوته غريب ومقطع، لازم تكفر وتستحمى بلبن عشان يظهر لك وتسخره في أذية الناس.

= أستحمى بلبن؟! أنت عاوز تبيع بقى.

- قهقهه ضحكة سمجة متقطعة، لا أنا بتكلم بجد، ربنا يحفظنا يا ابني.

= بس أنت شوفت جن قبل كدا؟

-لا.

= أمال جبت الوصف دا منين؟

- دا وصف معروف ومتعارف عليه، يا ابني أنا شبيب في الدنيا دي
عيوب عليك تسألني سؤال زي دا.

= ممممممش قصدي يا عم شريف، ربنا يحفظنا.

«وهم حينها ليمشي فقال له عم شريف»

- حبيبي ربنا يسترها علينا، ما تيجي تشرب حاجة طيب؟

«قالها وهو يعلم أنها عزومة لا ترتقي لعزومة المراكبية حتى»

= لا ربنا يخليلك

وودعه ماجد منصرفاً.

أكمل ماجد طريقة ووجهته غير المعلومة له حتى الآن، لا زال يفكر،
 فهو يريد لأن يقص ما حدث على أحد، ولكنه كان يخشى ألا يصدقوه
ويلقبوه بالجنون أو ما شابه، فأي عقل بشري من الممكن أن يستوعب
ما حدث، ويخشى أن يخبر أصدقاءه فيستهزأون به ويصبح حديث
الساعة وكل ساعة في تجمعاتهم على القهوة.

حينها قرر العودة مجدداً إلى المنزل، هرول مسرعاً إلى غرفته،
فتادته أمه قائلة:

- ماجد، خد تعالا هنا.

= ایہ یا اُمیٰ فیں ایہ؟

أنت كنت فيه؟

= كنت عند واحد صاحبى بجىب حاجة.

-صاحبک دا ملوش اسم؟ و حاجه إیه دي؟

= عند ميدو صاحب، وكنت بحسب منه مواعيد الدروس، عشان نبدأ

نذاكر بقى.

ومالك كدا مش على بعضك؟

=مفيش حاجة والله بس متواتر بقى والدراسة خلاص دخلت ومش عاوز أضيع وقت، عاوز أجيip مجموع يدخلنى الكلية اللي بحلم بيها.

- طیب یا حبیبی رینا یو فلک، شد حیلک یا اپنی و متضیعش وقت.

ينصرف ماجد ويتجه إلى الغرفة الخاصة به ويهم بفتح الباب فينفتح من تلقاء نفسه، وقبل أن يضع يده على النور يضيئ النور الغرفة بأكملها، فيتوتر أكثر ويغلق الباب خلفه من دون مفتاح، ويسمع حينها تكاث المفتاح تصدر تلقائياً فيقول في قلق:

=عفر کوش، اُنت هنَا.

—أولاً ما اسميش عفر كوش، ثانياً لا مش هنا.

= أمال اسمك إيه؟

- قولتلك اسمي سمير بس ممكن تقولي سمورة؟

= سمير؟ هو فيه جن اسمه سمير؟

- هنبدأ نستظرف بقى، اه يا عم أبويا سماني كدا وطلع ينفع
عادى، وبعدين أنت داخل تكية، مش تخبط الأول؟!

= أخبط وأنا داخل أوضتى!

- كانت، كانت أوضتك، دلوقتي دي أوضتنا ولازم نراعي بعض،
أنت معاكبني جن نار ودم.

= نار ودم!... ممم حاضر يا سمورة أنت تأمر «قالها وهو يجز
على أسنانه»

- يلا قوم اعملي حاجة أشربها.

= نعم.

- إيه الاستغراب دا عندي برد وعاوز حاجة سخنة.

= برد؟! حاجة سخنة؟!

- اه يا عم إيه الغريب في دا؟

= طب تحب أعملك إيه؟

- نفسي أوي في نسكافيه جولد.

=نعم!! بس دا غلي أوي يا ابني.

-إحنا كمان ما بنجبوش من بعد ما غلي.

=هي الحاجات عندكم غليت هي كمان؟

-ياااه يا ابني إحنا عندنا الجن بقت طايرة تكلم نفسها والله،
غلاء بشكل مبالغ فيه، كل حاجة اتضاعف تمنها مرتين ثلاثة من بعد
التسويح.

=يعني إيه التسوبح؟

-مممم، افهمهالك ازاي دي؟ بص ياسيدي التسوبح دا حاجة
كده، شبه التعويم بس هي أعلى منها شوية، يعني الأول بيعملوا تعويم
وبعد كدا تسوبح.

=انتوا كمان عندكم تعويم؟

xx لحظات من التأثر وزيادة في معدل دخول وخروج أنفاس
سمير ثم اعتدل قائلاً xx

إحنا كنا زي الفل لحد ما الدنيا بدأت تحول غريب، ومن
 ساعتها وأحوالنا في النازل، انهيار العملة، تخيل السحتوت بعد ما كان
 بـ ٢٠ ريال سعودي، بقى بـ ٥ بس؟ بعد ما كان بـ ٦ دولار بقى الدولار
 الأمريكي المعن يساوي السحتوت؟! أنت متخيل؟ بعد ما كانت مصر
 العليا قبلة كل الدول الفنية في السياحة وكانوا يجوا يتفرجوا على الآثار
 اللي بناها أجدادي والحضارة اللي ترجع إلى ملايين السنين، بطلوا
 يجوا! متخيل حضارة ٧ مليون سنة اندثرت؟

ولا الإرهاب اللي ملا كل حة، مبقاش في حتة تطير فيها إلا وتسمع
صوت تفجير، وكل يوم تسمع عن حوادث موت واستشهاد جن مصرى
مجند، وللأسف مفيش فايدة.

=انت بتتكلم عن مين؟ مين اللي عمل كل دا؟

-الله يسامحه بقى خايف أقول ليكون في حد مخبر.

= جن مخبر یعنی؟

-اه يا عم، بقوا ماليين كل حته، دا حتى الفيس بوك الواحد مبقاش
عارف يقول كلمتين يبعبع بيهم، كل يوم يقفسوا حد ويحرقوله الأكونت
بتاعه.

=نعم؟! هو انتوا ليكوا رئيس في مصر للجن؟

-اه يا عم لينا، والمشكلة إن إحنا اللي جيناه بعد الثورة.

=ثورة! أنت بتتكلم بجد؟

-۳۵ ثورة ۲۵ يناير، والله-

۳۵ = ازای

-إحنا عندنا الشهور كبيرة، نزلنا عملنا ثورة ونادينا بالحرية، والكرامة الجنية، واللقطة الهنية، وجبننا جن غلبان كده، معرفش يمشي الدنيا، وكان كل شوية يعموله مشاكل، لحد ما الناس هاجت عليه وعملنا ثورة تاني.

= تاني؟

- آه يا عم ما إحنا مكناش لاقين حاجة نعملها، المهم جبنا
جن تاني كدا، أمي الله يسامحها قالتلي عليه دا جني سкси وحلو
وهيمشي أمور البلد، ونزلت رقصت دبكة عند اللجان وفعلاً نجح.

= إيه يا عم دا؟ دا حصل عندنا كدا بالظبط.

- أملك أنت كمان رقصت؟

= لا يا عم طبعاً، بس فيه ناس نزلت ورقصت.

- بس يا سيدي ومن ساعتها وهو عمال يغلي علينا المایة، ورفع
الدعم من عليها، دا غير السد اللي بيتبني بردہ، حوارات كتير والله يا
مجودة يا حبيب أبي.

تعجب حينها ماجد من كلام الجن ولكنه اقتنع أن تلك البلد
تشابه أحداثها على المستوى الإنساني والجني، فكلاهما يعيش نفس
المأساة وكأن الله قد كتب علينا أن نعيش نفس المأساة.

وسرعان ما تدارك أنه يجب عليه ألا ينشغل بحياة الجن السياسية
 وأنه يجب عليه البدء في مذاكرة دروسه فحلمه أمامه وطريقه صعب
يحتاج إلى جهد وعمل حتى يحقق مراده، فقرر النهوض وبدأ يستذكر
دروسه حتى غلبه النعاس.

بينما هو نائم يرى نفسه على منصة التكريم في مدرسته بعد أن
أصبح من أوائل مدرسته في الثانوية العامة واستطاع الحصول على

مجموع يؤهله إلى دخول كلية هندسة القاهرة التي طالما كان يحلم بها هو والداه طيلة عمرهم.

لم يستيقظ إلا على صوت صديقة الجديد سمورة الذي صاح فيه قائلاً :

-قوم يا ابني الساعة بقت ١ الظهر.

= إيه، الدرس راح عليا.

-قوم بسرعة طيب البس وشوف هتعمل إيه.

بالفعل ينهض ماجد من سريره مسرعاً ويقوم بدخول الحمام ويفسل وجهه ويتوضأ ويستعد للنزول لكي يلحق بالدرس الذي فات على ميعاده أكثر من ساعة.

ولكنه يفاجئ في وجهة أن أباء لا زال في المنزل ولم يذهب إلى عمله بعد.

= إيه يا بابا أنت مروحتش الشغل ليه النهاردة؟

-منا هلبس ونازل اهو.

= هتنزل الساعة ٦١

-يا ابني الساعة لسه ٦ ونص.

= ٦ ونص ١٥ ازاي الساعة ١ وأنت اتأخرت ع الشغ.....

«اها ممممممم ماشي يا سمير الكلب حينها ادرك اللعبة التي قام
بها الجن سمير»

تعجب والده متسائلًا :

- بتقول ايه؟

= يقول الحمد لله صحيت بدرني اذاكر.

- اها، طب ربنا يوفنك شد حيلك متضيعش شقايها وتعبي معاك
على الفاضي.

= حاضر يا بابا متقلقش.

يدخل ماجد إلى غرفته في غاية الغضب، ويطرق على المكتب
بشدة قائلًا :

= انت يا سمير الزفت اطلعلي هنا.

يخرج سمير متثائباً ويقول له في برود شديد:

- مالك بس يا مجودة؟ متعصب ليه؟

= أنت مصحيوني وبتقولي الساعة ١ ليه؟

- عشان تصحي كدا وتفوق عشان تذاكر أنا غلطان يعني؟

= اه طبعاً غلطان، وبعدين إيه شغل الأمهات دا! هو الجن كمان
بيكدب.

-دا مش كدب، أنا كانت أمي بتعمل معايا كدا على طول عشان
تصحيني، الله يرحمها.

= هو كمان أمهات الجن بيعملوا كدا؟

-اه يا ابني مصريين كلنا، راضعين من نفس الكتاب، حاجة غالب
والله يا ماجد يا ابني.

= طب ممكن ما تعملش كدا تاني عشان أبقى واثق فيك!

- حاضر يا عم، أنت خلقك طلع ضيقاوي.

= طب أنا هلبس ورایح لواحد صاحبي نذاكر شوية لحد الدرس،
عاوز حاجة!

- لا هعوز منك إيه، اتكل على الله، وأنا هنام بقى عشان لازم
أصحى كمان ١٢ ساعة.

= لية وراك إيه؟

- لا موريش حاجة، هصحى عشان أنام تاني، أصلی بحب الأنتخة
اوي.

= مممم ليه يا ربى رزقتني بجن بطيخة كدا ما بيعملش حاجة
مفيدة.

- بتقول حاجة؟

= لا بقول اتخمد نام، أنا هروح أذاكر سلام.

-في أمانة الله يا حبيب أبي.

بعد أن استعد ماجد وارتدى ملابسه، أخذ ملازمه وأوراقه وقام بإغلاق باب غرفته خلفه وخرج من الشقة وأثناء نزوله على السلم قابل عم زكي جاره، فألقى عليه السلام كعادته لكن في تلك المرة لم يسمعه ماجد أو كانت الأفكار تدور في رأسه بسرعة مما منعه وصول كلمات عم زكي لسماعه، وصل إلى باب المنزل فوجده مغلقاً بذلك القفل القديم وتلك السلسلة التي نهش الصدأ في حلقاتها، فقام بإخراج مفتاحه الصغير وفتح القفل وخرج من الباب وتركه مفتوحاً كعادته.

أخذ طوال الطريق يفكر في ما حدث له في تلك الفترة، منذ وصول ذلك المكتب الخشبي لظهور تلك الورقة التي تتحدث عن الكنز الحقيقي الكامن بداخل المكتب، والذي اتضح فيما بعد أنه الجن سمير، ولكنه جن لا يفيد فهو نائم طوال اليوم لا يستطيع فعل أي شيء خارق متحججاً بأن هذه هي قدرات الجن وأننا مخدوعون بتلك الصورة المبالغ فيها التي يصدرها لنا التلفزيون والأفلام عن قدرات الجن الخارقة.

أنا مبقتش فاهم حاجة، أنا مش عاوز الموضوع دا يأثر على المذاكرة وخصوصاً إن العفريت اللي طلعي شكله ملوش في شغل الجن والعفاريت دا وشكله على قده خالص، ياه الساعه بقت ٧ وربع أنا كدا اتأخرت ع الواد أنا لازم أركب.

- توكتوك، بسستستست.

- رايج فين يابن عمي.

= عند البوستة كدا.

- تعال بس هاخد ٣ جنيه.

= ليه يا عم ٣ جنيه، دي حته صفيرة.

- البنزين غلي وكل حاجة ولعت، انتوا مش عايشين معانا ولا إيه!

= هما ٢ جنيه حلولين.

- تعال، عشان شكلك طيب بس والله.

يركب ماجد ذلك التوك توك الذي امتلأ بالدباديب والقلوب وصور السائق في وضعيات مختلفة وهو جالس وهو نائم وهو يحتسي كوبًا من الشاي، وأسفل كل صورة حكمة يحبها السائق مثل:

«اتنين ملهمش أمان، الفرامل والنسوان» و «عضة حية ولا حب

بنية»

صوت الأغاني كان صاحبًا، كان يضع في سقف التوك توك سماعات كفيلة بإقامة فرح شعبي لا إن تسمعه هو ومن معه فقط، كان ذوقه في الأغاني غريبًا، لون جديد لم يسمعه من قبل، يعتقد أنها أغاني ممنوعة من العرض، إيحاءات جنسية وكلمات خارجة، على ألحان - إذا جاز تسميتها ألحان - غير متناسقة الآلات الموسيقية - إذا اعتبرناها موسيقية أيضًا -

وصل ماجد إلى البوستة حيث يسكن مجدي في أحد المنازل بجوارها ونزل من التوك توك بعد أن أصابه بصداع يحتاج إلى أسبوع من الراحة وتناول المسكنات والمهدئات حتى يعود إلى حالته الطبيعية كما كان قبل أن يركب معه.

بعد أن نزل من التوك توك، قطع ماجد بضعة أمتار حتى يصل إلى منزل مجدي وأثناء سيره وجد سيدة عجوزاً تبحث في صناديق الزباله عن شيء تأكله، فوقف في مكانه وأخذ يراقبها، فوجدها تخرج الأكياس وتعبث بها حتى تجد بعض لقيمات العيش أو ما تبقى من أرز أو أي شيء من الممكن أن يؤكل، كانت تشاركها القطط أيضاً في البحث كل منهم يبحث عن ضالته، شعر حينها ماجد بألم في قلبه من ذلك المشهد المؤثر، فحقاً هذا العالم مليء بالألم والقهر، حينها سمع صوتاً يردد في أذنه قائلاً:

«الخير يبقى، والشر يفني، مهما طال الزمان» لقد سمع تلك الكلمات من قبل ولكنه لا يذكر متى وأين.

تكررت عدة مرات في أذنه، حتى اقشعر بدنـه، وجد نفسه تلقائياً يخرج من جيـبه ٣ جنيهـات، كانت كل ما معـه، وذهب إليها وأعطـاها تلك النقود ومسح على رأسـها ورحل في صمتـ، وهو يحمد الله على ما هو عليه، فأكـبر مصـيبة في حـياتـه الآنـ، هو أنه سيـعود إلى المنـزل على رـجـليـهـ، فالـحمد للـلهـ فـهـنـاكـ منـ يـتـمـنـىـ تلكـ المصـيبةـ وهيـ أنـ يـمـشـيـ على رـجـليـهـ منـ الأـسـاسـ.

صعد ماجد إلى مجدي الذي كان في انتظاره دخل وجلس معه، واتفقا على أن يضع كل منهم هاتفه المحمول بعيداً وألا يفتحه ولا يتتصفح حسابه الشخصي على الفيس بوك الذي أصبح بمثابة دودة تأكل الوقت وتضيعه.

وبالفعل تمكنا من التغلب على إدمان ذلك الموقع الأزرق اللعين لم يكفا طيلة الأربع ساعات عن المذاكرة إلا حينما لاحظ ماجد أن الساعة قد قاربت على الثانية عشرة وقد اقترب ميعاد الدرس حينها قام مجدي ليرتدي ملابسه لكي يذهبا سوياً إلى الدرس.

انتهى ماجد وصديقة من الدرس، وقرر العودة إلى المنزل لكي يتناول غذاءه مع أسرته وينام قليلاً لكي يذاكر ما أخذه في الدرس ويحضر ما سيأخذه غداً، وكان دائماً يصبر نفسه قائلاً:

« هي سنة واحدة هتعب فيها عشان أحده طريقي، معلش مفيش حاجة حلوة بتبقى سهلة، ولو جت سهلة مش هحس بطعمها»

عاد ماجد إلى منزله وجد أمه قد قامت بتحضير الغذاء، كان عبارة عن رز وبامية، لم يحب البامية قط وكان دائماً يتشارجر معها ويطلب منها أن تستبدلها بشيء آخر، لكنه في تلك المرة قرر أن يبتسم لها ويقول « شكرأ يا سست الكل تسلم ايدك»

استغربته حينها أمه لكنها لم تعلق على سبب تغيره، فكان من المتوقع أن يغضب ويثور ويذهب إلى غرفته رافضاً تناول الطعام معهم أو يذهب إلى المطبخ لتناول ما قد يقع تحت يده في الثلاجة. كان

مشهد تلك العجوز التي تبحث في صندوق الزباله يدور في رأسه، كلما تذكره وجد لسانه تلقائياً يقول الحمد لله، أكل ماجد ودخل غرفته ففتح الأنوار وأخذ يطرق على المكتب قائلاً:

- أنت يا خم النوم، أنت يا سمير بيبيه، الساعة بقت ٤، هتتما
لحد امتى.

خرج سمير من المكتب متثائباً فارداً يديه وهو يقول :

- مجودة حبيببي، أنت جيت امتى؟

= جيت امتى؟ إيه أسئلة المتجوزين دي؟ وبعدين يا ابني أنت مش
جن المفروض تعرف جيت امتى؟

- لا اصل أنا جن خجول شوية.

= أنت بتهرج بقى.

- فرفش كدا ياعسل، بقولك إيه هاتلي كوبايطة ماية عشان عطشان.

= وحية امك.

- الله يرحمها.

= آسف مش قصدي بس هي ملهاش رد غير كدا.

- اه تصدق فعلًا.

= أنت يا ابني عبيط؟ هو أنت طالعي عشان أخدمك؟ ولا أنت
اللي تحقلي كل أحلامي.

-والله يا ماجد أنا تعبت، وخدمت ناس كتير زمان وجه الوقت
اللى تردولى فيه الجميل.

=وحياناً مش لاقى حاجة غيرها.

-مممم تصدق صح؟ هي ماينفعش غير وحياة أمك فعلاً.

= وحیاة أملک! یعنی أنا یوم ما یطلعلی جن یبقی مسن وعاوز حد

۱۶۴ مخدوم

-ثواب والله يا ماجد، أنت مش متخيّل ثوابها كبير ازاي.

= لا ياعم أنت اللي لامؤاخذة تقيلة شوية.

-هی ایہ

=مش عارف بقی اسمها ایه عندکم.

-اها، لا عادي نفس الاسم مش متغير.

= طب يلا خفها شوية و قوم اشرب و هاتلي بيبسي معاك.

-يا ابني أنت شايفني فاتح سوبر ماركت؟ أنا هجيلاك أي حاجة من عندكم.

يخرج سمير متوجولاً في أرجاء المنزل ليشرب بينما يجلس ماجد في غرفته يقوم بتغيير ملابسه ويستعد لكي ينام قليلاً يدخل عليه سمير بسرعة فيفزع ماجد ويصبح قائلاً:

= إيه يا ابني أنا لسه بلبس اطلع برة.

- وفيها إيه ياعم إحنا رجاله زي بعض.

= أيوة بس ماينفعش أقلع قدام جن عشان مایلبسنيش.

- يلبسك؟! أنت اهبل يا ابني؟

= انتوا مش بتلبسو الناس اللي بتقلع عريانة وكمدا؟

- دا كان زمان، دلوقتي فيه زارا بيربري وماركات كتير أوي
هنسيبها ونلبس مصري زيـك؟

= طب ولـا بدلق حاجة سخنة فيـ الحوض فـعلاً مـمـكـن تـطلع
وتـلبـسـنـي؟

- بـرضـه يـعنـي؟ أـنتـ غـبـيـ بـقـىـ؟ يا اـبنيـ أـنـاـ جـنـ منـ نـارـ يـعنـيـ مـهـماـ
تـدلـقـ مـاـيـةـ سـخـنـةـ هـيـ أـبـرـدـ منـيـ، بـلاـشـ غـبـاوـةـ بـقـىـ، مـينـ اللـيـ فـهـمـكـمـ
كـداـ وـبـعـدـينـ حـوـضـ إـيـهـ اللـيـ نـسـتـخـبـىـ فـيـهـ هـوـ أـنـتـ شـايـفـنـاـ صـراـصـيرـ؟

= لا مش القصد طبعاً.

- وبعدين حوض مصري بتلقوا فيه بقايا ملوخية بايته وشاي
وزيت محروق، تفتكر ممكـنـ نـسـتـخـبـىـ فـيـهـ؟!

= طب يا عم متزقـشـ أـنـاـ بـسـ بـتـعـرـفـ عـلـيـكـ أـكـترـ شـكـلـنـاـ مـكـمـلـينـ معـ
بعـضـ شـوـيـةـ فـلـازـمـ نـدـرـسـ دـوـاـخـلـ بـعـضـ.

-طب أمسك

= آية دا! فحمة!

-مش عارف أنا لقيتها في التلاجة، إيه اللي جابها هناك مش عارف، وبعدين إيه اللي انتوا حاطينه ده، قرن فلفل دبلان ونص لونة وشريط لبوس دولفين وفحم، وحقنة قديمة! إيه دا! دي تلاجة دي ولا إيه بالظبط.

= يا عم عادي دي حاجات في أي تلاجة في مصر.

-هي التلاجات بتتابع كدا يعني؟

= لا بس دي طقوس مصرية أصيلة.

-مممم طيب يا أبو طقوس أنت.

حالة من الصمت حلّت على المكان، ومن ثم ذهب سمير لينام،
أغلق ماجد النور لينام هو الآخر ولكن النوم لم يعرف إليه طريقاً،
بدأ يفكّر في ذلك الصديق الجديد الذي ظهر له فجأة والورقة التي
قرأها في المكتب

شعر وكأنه في حلم، فكل ما حدث معه في اليومين الماضيين أمر غريب بمتباينة حلم لا يعرف هل سيفيق منه أم لا، ظل يفكّر كثيراً حتى
غلبه النعاس وذهب في نوم عميق.

مرت الأيام وكان ماجد يستيقظ كل يوم مبكراً ليذهب إلى المدرسة ومن ثم دروسه الخصوصية ويعود إلى المنزل كي يذاكر أولاً بأول، وكانت حياته روتينية مملة يتخللها بعض الأحاديث والدعابات مع الجن سمير، ذلك الجن الكسول الذي تواجد في حياة ماجد فقط لكي ينام.

فقد كان يقضي طوال النهار نائماً، ويستيقظ فجراً، يتأمل في سقف غرفة ماجد في أنتخة بالغة ومن ثم يوقظه في السابعة صباحاً ليبدأ رحلته الطويلة مع النوم، فكان ينام يومياً حوالي ٢٠ ساعة أو أكثر، وكانت الاستفادة الوحيدة التي استفادها منه ماجد هو إيقاظه في السابعة صباحاً كل يوم، حيث تحولت علاقته ماجد بسمير، كعلاقة طالب ثانوية عامة بمنبه يستخدمه فقط لكي يوقظه كل يوم.

تمر الأيام، ويظل ماجد على نفس الوتيرة من الحياة الروتينية المملة، يستيقظ صباحاً ليذاكر دروسه ويدهب إلى مدرسته أحياناً وأحياناً كثيرة لا يذهب ويكتفي بحضور دروسه الخصوصية، ليعود إلى المنزل يرتاح قليلاً ليستيقظ في المساء لتحضير دروسه.

تقرب الامتحانات، ويبقى على تحقيق الحلم شهراً، ولكن يبدأ اليأس والخوف من الامتحانات يتسلل إلى قلبه، يبدأ ذلك الجد والاجتهد الذي استمر عليه قرابة السبعة أشهر يقل تدريجياً حتى كاد أن يتلاشى

فأصبح ماجد يذهب إلى الدروس ويعود إلى المنزل لكي ينام، ويستيقظ ليضيع وقته إما بين مشاهدته للتلفاز أو تصفحه لموقع التواصل الاجتماعي، أو للتفكير في حياة الجامعة وماذا سيفعل فيها، وهل حياة الجامعة أفضل مما يعيشه الآن، بالطبع فهي أكيد أفضل.

لم يلحظ سمير تأخر مستوى ماجد الدراسي وإهماله غير المبرر، والذي قد يضيع عليه مجهد كل تلك الشهور السابقة، وذلك بسبب نوم سمير المتواصل، إلا أنه بعد حوالي شهر قد لاحظ إن ماجد لم يعد حتى منتظماً في استيقاظه المبكر وذلك بسبب سهره المتواصل، أصبح لا يحضر دروسه بانتظام، بعض الكتب تراكم عليها التراب لأنه لا يفتحها ولا يحركها حتى من مكانها.

حينها قرر سمير مراقبة ماجد ومعرفة ما سبب تغير أحواله، فقرر أن يتخلى عن بضع ساعات من نومه الطويل ويجهز لكي يراقبه، انتظر سمير ماجد في ذلك اليوم حتى عاد من الخارج وكانت ملابسه قد اتسخت يبدو أنه كان يلعب الكرة مع أصدقائه لساعات، فمنظر ثيابه والحالة التي دخل عليها الغرفة وهو يتسبب عرقاً من كل سنتيمتر في جسده كانت تشير بأنه ظل ساعات يلعب في الشارع بلا هوادة.

أغلق ماجد باب الغرفة وفتح الدوّلاب لكي يحضر ملابس نظيفة ويدخل إلى الحمام لكي يغسل، فلاحظ شيئاً يتحرك في المكتب، حينها وجد سمير يقول له:

-حمد الله على السلامة ياريس، جيت من الدرس ولا إيه؟

= انت إيه اللي صحاك دلوقتي يا ابني، أنت مش بتبقى نايم؟

- لا ما أنا قلقت وحلمت حلم وحش فقومت.

= حلمت؟ هو انتوا بتحلموا؟

- اه بنحلم طبعاً عادي، إيه ملناش نفس يعني؟

= لا مش قصدي.

- بس أنت إيه اللي مبهدلك كده، هما كانوا بيجرروا وراك في
الدرس؟

= لا ياعم دا أنا بعد الدرس لعبت ربع ساعة كورة كدا مع الشباب.

- ممممم بس شكل الشباب بهدلوك في اللعب عشان كدا راجع
متهدل.

= لا يا عم بيهدلوا مين دا أنا جايب أكتر من ٢٠ جون النهاردة.

- ياه ٢٠ جون في ربع ساعة؟ لا دا إحنا نكلملك كوبر بقى ياخذك
المنتخب بدل محمد صلاح.

= أنت بتتربياً؟

- أنت اللي بتكتب يا ماجد.

= وهكذب ليه؟ هو أنا هخاف منك؟

-لا مش هتخاف مني ...بس دايماً اللي بيعمل حاجة غلط بيبيقى
خايف من المواجهة، ممكן تكون المواجهة دي مع الناس وممكן تكون
مع نفسه هو.

=قصدك إيه؟ بس أنا بيعملش حاجة غلط! هو شوية الكورة دول
غلط؟

-أنت عارف إنهم مكنوش شوية وعارف إن بقالك فترة ما
بتذاكرش ومنفض وبتنام ومبتروحش دروس كتير، عارف إنك لو
كملت كدا مش هتوصل لأي حاجة من حلمك، أنت مش صغير وفاحم
أنا بقول إيه كويـس.

=وأنت بقى جاي دلوقتي تعمل جن عليـا، وترافقـنـي !!

-أنا ما براقبش حد وفيـة الأول والآخر أنت مش صغير وأنا قولـتـكـ
هـسـاعـدـكـ لـحدـ ما تـحـقـقـ حـلـمـكـ، عـاـوزـنـيـ آـسـاعـدـكـ فـعـلـاـ وـلـأـ؟ـ

«سكت ماجد بعد أن شعر بأنه فعلًا مقصـرـ، وأنه يـحـيـدـ عنـ حـلـمـهـ،
فحـدـثـهـ قـائـلـاـ»

=هـسـاعـدـنـيـ اـزـايـ؟ـ

- سـيـبـلـيـ نـفـسـكـ قـوـمـ أـنـتـ غـيـرـ هـدـوـمـكـ وـخـدـ دـشـ وـتـعـالـاـ وـأـنـاـ أـقـولـكـ
هـنـعـمـ إـيـهـ.

حينـهاـ فـكـرـ سـمـيرـ أـنـ عـلـيـهـ مـسـاعـدـةـ مـاجـدـ لـتـحـقـيقـ حـلـمـهـ المـتـمـثـلـ فيـ
الـالـتـحـاقـ بـكـلـيـةـ الـهـنـدـسـةـ، فـبـدـأـ يـفـتـحـ الـكـتـبـ وـالـمـلـازـمـ الـخـاصـةـ بـهـ، وـيـرـىـ
الـمـوـاضـيـعـ الـمـوـجـوـدـةـ فيـ الـمـنـاهـجـ الـتـيـ يـدـرـسـهـاـ وـكـيـفـ سـيـسـاعـدـهـ.

أخذ يتصفح كتب اللغة العربية والفيزياء والرياضيات والاقتصاد والإحصاء، يرى تلك الملاحظات التي كتبها ماجد أثناء المذاكرة طوال العام، تلك السطور التي قام بتلوينها بقلم فوسفوري أخضر، لأنها معلومة مهمة لا يخلو أي امتحان منها.

حينها دخل عليه ماجد بعد أن اغتسل وغير ملابسه، وجده ممسكاً بالكتب في تركيز شديد وكأنه هو من سيدخل الامتحانات بدلاً منه، فقاطع تركيزه قائلاً:

= هو أنت ناوي تدخل مكاني الامتحانات ولا إيه؟

- لا مش هعرف للأسف.

= يبقى هتجبلي الامتحانات!

- لا بردة ...

= أمال هتعمل إيه؟!

- أنا هخليك تجيب ٩٨٪.

= بس؟!

- بس! يا ابني أنت بمستواك دا ما تجبيش ٥١٪

= وماله أدخل شرطة.

- ما للأسف مش معاك واسطة.

= وانت روحت فين!! أنت اللي هتوسطلي!

- لا أنا ليَا ملف فيِ أمن الدولة لو اتوسطلك هتدخل لاظوغلي.

= طب ما تخليني أجيب ١٠٠ %

- المشكلة إنك بني آدم قدراتك محدودة، أنت عارف لو بساعد جنبي زي هخليله يجيبي ١٠٠ %. بس أنت على قدرك.

= انتوا بتجيبيوا مجاميع عاليه؟

- كلنا بنجيبي ١٠٠ %

= عشان انتوا شاطرين؟

- لا عشان معندناش امتحانات، هاهها.

= نعم؟

- مش موضوعنا وبطل هري بقى، بص أنا هقولك إيه الحاجات اللي هتيجي في كل امتحان، مش بالظبط بس هديك معلومات مهمة الامتحان مش هيخرج منها.

= التوقعات المرئية يعني؟

- بالظبط كدا.

= يعني هذاكر برضه؟

- يا ابني كدا كدة هتذاكر بس أنا هديك الز-tone، هقولك المفيد، تذاكر إيه ومتذاكرش إيه، والدور والباقي عليك.

وبالفعل يجلس سمير مع ماجد يحدد له الأشياء المهمة في المنهج في كل المواد، تحمس ماجد وبدأ بالمذاكرة والاجتهد لأنه شعر أن المنهج قد تقلص، وبالفعل دخل الامتحانات وأبلى فيها بلاءً حسناً، فكل توقعات سمير كانت في محلها، وجاء يوم النتيجة والكل يجلس متربقاً في انتظار النتيجة، شبكات الإنترنت ثقيلة والمواقع تكاد لا تفتح بسبب الضغط عليها.

يدخل ماجد رقم الجلوس مرات عده ولكن لا فائدة، أم ماجد تجلس بجنبه في توتر شديد، والده يدعو الله من قلبه أن يوفقه وأن تصبح تلك الليلة سعيدة عليهم، ماجد في حالة توتر، بدأت يده تعرق وهو جالس أمام شاشة الكمبيوتر ينتظر ظهور النتيجة.

حينها فكر في أن يوقظ سمير لكي يستخدم قدراته العفريتية في أن يجلب له النتيجة.

= أنت يابني ما تقوم تجيب لي النتيجة.

- ناجح يابني إن شاء الله.

= ما أنا هأنجح إن شاء الله أنا عاوز أعرف جبت كام.

- مش ها تقل عن ٧٠٪ لا تقلق.

= نعم يا روح خالتك! منا عارف أنا كنت متفق معاك على ٩٨٪.

- متفق معايا إيه يا عم؟ هو أنا اللي بصح لك ما أنت عارف تعسف المصححين، المهم ماتقلقش سواء دخلت هندسة أو معهد فني تريكو أنت عملت اللي عليك.

= تريكوه! اه عشان أبويا يخيطني إن شاء الله، قوم هاتلي
النتيجة يا ابني النت واقع.

- طب ما تجرب تقفل الراوتر وتفتحه تاني كدا.

= نعم!

- سوري اندمجت شوية أصلي كنت شغال في tedata في الصيف
اللى فات.

= انتوا عندكوا؟ tedata?

- اه عادي يا ابني جن مصرى حياتنا شبهكم بالظبط.

= طب والعمل؟

- جرب تاني كدا بس وأنت هتللاقيها ظهرت.

لم يقطع كلامهم سوى صوت زغاريد أمه بالخارج، وصياحها
قائلة:

- يا ماجد، يا ولد، تعالا، أنت نجحت وجبت ٩٨٪.

لم يتمالك ماجد نفسه، جرى مهرولاً لكي يرى النتيجة بعينيه فوجد
اسمها قد ظهر على شاشة الكمبيوتر وأسفله رقم الجلوس ودرجاته في
المواد وفي النهاية النسبة المئوية وكانت ٩٨،٢٪

حينها ظل يهلهل ويصبح في المنزل فرحاً، وسط دموع الفرحة
من والده ووالدته، وأسرع بالنزول إلى الشارع لكي يقابل أصدقاءه،

فمنهم من حصل على مجموع عالٌ هو الآخر ومنهم من لم يحالفه الحظ و منهم من رفض النزول حزناً على ضياع حلمه هو الآخر، أما ماجد فكان يشعر بفرح و فخر، فالحلم عندما يتحقق بعد تعب يكون له طعم آخر، فلقد ساعدته سمير، ولكن مساعداته من دون مجهد ماجد لما كان لها أي أهمية.

تمر الأيام ويأتي ميعاد التنسيق واختيار الرغبات، فيختار ماجد كلية الهندسة جامعة القاهرة كرغبة أولى ومن ثم يرتب بعدها باقي كليات الهندسة والحواسيب والمعلومات كإجراء روتيني فمجموعه يضمن له بكل سهولة دخول الكلية التي يرغب فيها من دون قلق، فعادة كلية الهندسة تأخذ مجموعاً أقل من مجموعه بحوالى ٣٪.



ظهوٰر نتیجۃ التنسیق

تظهر نتیجۃ التنسیق، معلنة قبول ماجد بكلیة الهندسة، فلقد حقق حلمه وحلم والداه، حينها شعر بالفخر فهو الآن رسمیاً یدعى المهندس ماجد، وحينها أخبر أمه التي بدورها قامت بإطلاق الزغاريد لتسکن أرجاء المنزل وظللت تحضنه وتقبله قبلات عديدة في خده.

أول مرة يستشعر فرحتها بهذا الشكل، فقد كان في الماضي يستغرب ما يفعله الأهل من أجل أبنائهم، لماذا یهتمون بنجاحهم فنجاح الشخص سيعود عليه في النهاية، إن كان ناجحاً فله، وإن لم يكن فعليه، لن یفیدهما شيء ولكن تلك المرة استشعر معنى أن نجاحك وتفوقك من نجاح والديك، فهم یرونك كجزء لا یتجزء منهم، یفرحون لفرحك ویحزنون لحزنك.

أنت بمثابة الجزء الأهم في حياتهم، فأنت بمثابة روحهم - التي لا یرونها - متمثلة في كائن حي یتحرك وینطق ینجح ویخفق، أنت بمثابة أهم شيء في حياتهم، فالإنسان یحب أن يكون الأفضل في أي شيء متفوقاً على أقرانه ولكنه یسعد أكثر إذا رأى أبناءه یغلبونه ویتفوقون عليه.

أيقظ سمير وأخبره بالخبر السعيد، فظلا يرقصان في الغرفة على أنغام الأغاني الشعبية، وظل يهالء معه ونزل سوياً يتوجولان في الشوارع يتحدثان ويقهقحان، يخبره سمير بأن الجامعة هي أجمل أيام حياته فقد قضى في كلية التجارة أجمل أيام حياته.

فقط اقطعه ماجد قائلاً :

= حلوة الجامعة !

- حلوه، ألا حلوة ياد يا ماجد، دي حلوة جداً.

= طب احكي لي بقي فيه بنات في الجامعة؟

- يوووه أشكال والوان، الجامعة حياة مختلفة، خروج وفسح بتعرف ناس جديدة، من كل حلة، هتلaci معاك كل المستويات، الغني والفقير، الشاطر اللي منفض، الجدع والخبيث، الجامعة هي بداية حياتك الحقيقية، هي اللي هترفك الدنيا ماشية ازاي في الفترة دي بيبتدي يتغير تفكيرك، زي ما بيقولوا كدا بتبتدي تحديد ملامح مستقبلك.

= وهو فيه مستقبل في مصر؟

- لا ما أنت هتلaci الملامح اللي متحددة مشوهة عادي يعني.

= هاهاما الله يطمئنك.

- مبروك يا صحي أنت تعبت وستأهل كل خير.

= الله يبارك فيك يا أبو سمرة، أنا من غيرك بعد ربنا مكنتش
هوصل لكل دا.

- توصل لكل دا؟ أنت محسسني إنك بقيت مشارك أحمد أبو
هشيمة في قناة أون تي في، يا ابني أنت يادوب دخلت هندسة، أمال لما
تخرج هتعمل إيه، متأفورش يا ماجد بعد إذنك.

= أنت شايف كدا؟

- وشايف كدا وكدا وفي كل الاتجاهات عادي.

= طيب يلا نروح بقى عشان ننام أنا صاحي بقالى ٢٤ ساعة.
- يلا بينا.

يعود ماجد إلى منزله ويفتح الباب ويدخل سمير إلى غرفته لكي
ينام بينما ماجد يسمع صوت أمه وهي تتحدث مع والده في غرفتها
فيسترق السمع إلى حديثهم فسمع أمه تقول:

= أنا بفكر بكرة آخذ الواد ماجد وأجلبه ليبس جديد عشان
الجامعة.

رد عليها أبوه قائلاً:

- طيب خدي أنا معايا ٧٠٠ جنيه كنت شايلهم على جنب عشان لو
حصل ظرف ولا حاجة.

= لا يا بوماجد ربنا يخليك، أنا معايا ١٠٠٠ جنيه كنت محوش لهم
في دفتر التوفير.

-وايه المشكلا خليهم معاكي هما ١٠٠٠ جنيهه يعملوا حاجة اليومين
دول، الأسعار ولعث.

=منا عارفة والله بس هنعمل إيه خليهم معاك يمكن نحتاجهم.

-ربك اللي بيرزق يا أمينة، خديهم وهاتيله لبس كويس عشان
مايحسش إنه أقل من زمايله، أنت عارفة الجامعة ياما هيقابل فيها
ناس، عشان ميتعقدش.

=بس أنت

-مابسش خديهم، وانزل لي هاتيله لبس كويس، الولد تعب وعاوزين
نكافئه.

=حاضر، اللي أنت شايقة يا سيد ، أعملك تتعشى؟

-ماشي، ولا أقولك كوبایة شاي من ايدك الحلوة وخلاص، أنا
لسه الفدا كابس على مراوحى.

=ألف سلامة على مراوحك يا بو ماجد.

-اية الكلام الحلو دا؟ كل دا عشان قولتلك خدي ال ٧٠٠ جنيهه؟
او عي تكوني هتضرب بي عليهم.

=هاهاها، بقى كدا يا بو ماجد! طب خليني ساكتة بقى، أنا قايمه
أعملك الشاي.

حينها جرى ماجد نحو غرفته حتى لا تعرف أمه انه كان يسمع ما يقولانه، فدخل غرفته واستلقى على السرير وظل يفكر في كلام والديه، وعن تفكيرهما فيه، وأنهما بالرغم من ظروفهما المادية الصعبة إلا أنهما يحاولان إسعاده وإدخال السرور على قلبه.

حينها انتابته القشعريرة عندما تذكر أنه في لحظات أنانية كان يفكر في نفسه فقط عندما كان يبالغ في بعض الطلبات التي تفوق مقدراتهما وكان يشعر أنهما مقصران في حقه، لأنهم لا يليبيان له كل ما يتمناه بالرغم من أن تقصيرهما لم يكن إلا بسبب سوء أحوالهما المادية، بل إنهما كانوا يوفران في احتياجاتهم الأساسية حتى يليبيان احتياجاته هو وأخته.

فلم يذكر متى آخر مرة اشتريت أمه ملبيساً أو حذاءً جديداً، أما عن والده فهو لا زال يرتدي تلك البلوفرات التي كانت قد حاكتها له زوجته أم ماجد منذ عدة سنوات، وتلك الجزمة التي يرتديها قد ملأتها خياطات عم جابر الصرماتي حتى أخفت ملامحها الأساسية.

شعر ماجد بضالة نفسه وبأنانيته، وشعر أيضاً بأنه الآن قد كبر فجأة بل إنه تعب من المفاجأة، وقد نزلت دمعته، لم يقطع تفكيره غير طرقات أمه ع الباب ودخولها عليه قائلة:

-أنت لسه صاحي؟

=اه يا ماما خير؟

-جهز نفسك عشان تنزل بكرة نشتري لبس.

=لبس إيه؟

-لبس الجامعة، عاوزاك تبقى أشييك واحد في الكلية.

=ربنا يخليكي يا ماما أنا عندي لبس كتير مش محتاج.

-إيه يا أخويا الأدب دا من امتى إن شاء الله؟

=من النهاردة.

-طب اعمل حسابك بلاش دلع أبوك ادالي ١٥٠٠ جنيه عshan
أجلبك لبس

وهننزل بكرة بدرى شوف هنروح فىن واصحى بدرى عshan
المواصلات.

حينها أدرك ماجد عظمة أهله وحبهما له، وتضحيتهما من أجل
إسعاده ومكافئته على تفوقه الذي سيعود أولاً وأخيراً عليه هو فقط
فمن ينجح ينجح لنفسه، كما تمنى من الله أن يرزقه زوجة مثل أمه
تلك السيدة العظيمة التي استطاعت رغم ظروفهم الصعبة أن تدبر
١٠٠٠ جنيه من راتبها ومصروف المنزل لتلك المناسبة، ولم تخبره
بأنها هي من فعلت ذلك بل قالت له أبوك هو الذي أعطاني كل النقود
لكي نشتري لك ملابس جديدة تلبسها، حتى يظل في نظره أبوه هو
رجل البيت المسؤول عن الإنفاق.

تظاهر ماجد بالنوم وأغلقت أمه الأنوار والباب من خلفه، لكنه لم
ينم وظل يفكر فيما فعله أهله وفيما سيفعل غداً، هل سيأتي معه سمير
إلى أماكن شراء الملابس أم سيفط في نومة العميق كعادته.

قرر حينها أن يسأله فذهب إلى المكتب وفتحه حتى يثير قلق سمير ويستيقظ ولكن بلافائدة، قام بغلق أحد الأدراج وهو يغلقها لمح بطرف عينه ورقة فوق إحدى الملائم، فأخرجها، فإذا بها تشبه تلك الورقة القديمة التي وجدها عندما فتح المكتب أول مرة، وكانت الورقة من نفس النوع، والحبر المكتوب عليها قد أصابته عوامل التعرية أيضاً ولكنه بالكاد استطاع قراءة ما كتب عليها، وكان المكتوب هو:

«القشرة الخارجية لا تدوم، وتصيبها عوامل التعرية، اهتم أكثر بالباطن، فهو الأساس، هو من يبقى ويؤثر، فالشجرة بلا جذور لا تثبت وتميل مع الهواء والمنزل بلا أساس ينهار في أول اختبار»

لم يفهم ما مناسبة ذلك الكلام، أو ماذا تقصد الورقة، ومتى ظهرت تلك الورقة، هل سمير هو من يكتب ذلك الكلام؟ لكن من أين له بتلك الوريقات القديمة وذلك الحبر البالي، يبدو أنها كتبت منذ زمن بعيد، وأين الورقة الأخرى، هل تغيرت ملامحها أو أن الكلام الآخر قد كتب في ظهرها لا لا يوجد شيء فيها، يبدو أن تلك الورقة سحرية أيضاً كتبت بحبر مسحور مزجه عفريت تستطيع الحروف أن ترتب نفسها كما تشاء فتظهر كل مرة كلاماً مختلفاً بمعنى مختلف.

ظل يفكر كثيراً بينما هو مستلقٍ على سريره حتى غلبه النعاس، لم يشعر بنفسه إلا عندما أيقظته أمه في العاشرة صباحاً، لكي يستعد للنزول للتسوق وشراء ملابسه الجديدة.

لم يوقظه سمير في ذلك اليوم يبدو أنه هو الآخر ظل يفكر ليلاً
وغلبه النعاس، ولكن فيما يفكر سمير، فهو بلا فائدة، ينام طيلة اليوم
ولا يستيقظ إلا ساعات محدودة، هل من الممكن أن يكون قد مات
سمير؟ لا أعتقد فهو في ريعان شبابه الجني، ولكن هل للموت سن
معين؟ فكم من شباب في عمر الزهور يخطفهم الموت من بيننا بلا أي
شفقة أو رحمة، يحرم أهلهم منهم،

إلى متى سأظل في تلك الحيرة، يجب أن أتصرف.

يطرق على المكتب بشدة قائلاً:

=سمير، أنت يا خم النوم قوووم اصحى.

..... -

=سمير!! أنت يا ابني.

..... -

=ده مات ولا إيه! ...~~سمير~~

تررررا!! تررررررررررن ... يظهر سمير مرتدياً بعض ملابس
ماجد.

=أنت كنت فين يا ابني وإيه اللي أنت عامله دا!!

-كنت بلبس عشان تنزل نجيب أحلى لبس لأحل مجودة في الدنيا.

= وانت هتيجي معايا كدا؟!

-اه يا عم أنا بقالي سنة لابس اللبس بتاعي مغيرتوش لحد ما
ريحتي طلعت.

= وأنت ريحتك طلعت النهاردة؟

-لا هي طالعة من زمان بس دلوقتي هنخرج ونروح ونيجي وهيبقى
فيه بنات وبرستيجي قدامهم هييowitz، ترضى أخوك يبقى عرّة؟

= لا طبعاً، بس أنت فيه حد هيشفوك؟

-لا دلوقتي لا بس عشان منظري قدام نفسي مش أكثر.

= ممممممم طب مصحتيش بدربي ليه ألبس أنا كمان؟

-عشان كنت باخد دش وأنا بطول شوية.

= دش في الحمام.

-لا في المطبخ.

= هنستظرف بقى.

-لا يا عم في المطبخ والله.

= ازاي؟

-يا ابني أنا جن من نار يعني لو استحميت بماية أموت افهم بقى.

= اها؟ طب واستحممت في المطبخ ازاي؟

- ع البوتا جاز عادي، فتحت الأربع شعل وهيحست بقى يا معلم.

xx صوت نداء أمه xx

- ماماااجد، يا ابني غيرلي الأنبوة لحسن خلصت،
لسه مغيراها من أسبوع الرجال اللي معندوش ضمير مدبهالي ناقصة
منه لله، أنا مش عارفة نجيب الأنبوة بـ ٤٥ جنيه ومشوشة كمان،
منك لله يا اللي في بالي.

= اهو شوفت، الله يخربيتك، خلصتنا الأنبوة.

- هي أمك عرفت منين إني أنا اللي خلصتها!

= لا هي متعرفش إن أنت.

- أمال إيه منك لله ياللي في بالي.

= لا دا واحد تاني مش أنت ماتقلقش.

- دا جن برضه؟

= ياعم احمد بقى متوديناش في داهية، المهم أنا هروح أغير
الأنبوة وأرجع الأقيق في مكانك، ويا ريت ماتلبسش الجزمة اللي
حيلتي عشان مقولش لأمي إنك أنت اللي خلصت الأنبوة وأخليها
تطفيك بالماية.

-با اس خلاص یا عم حاضر، حاضر هست و هستاک آهو.

يذهب ماجد ليساعد أمه في تغيير الأنبوة ومن ثم يدخل إلى الحمام لكي يستحم ويرتدي ملابسه لكي يخرج مع والدته والجن سمير لشراء الملابس الجديدة التي سيدهب بها إلى الجامعة.

يصبح الآن جاهزاً للنزول هو وأمه، اليوم الوضع مختلف فسمير
سيصاحبهم في تلك الرحلة، رحلة البحث عن لبس جديد، لم يستقر
ماجد على المكان الذي سيذهب إليه مع والدته لشراء ملابسه
الجديدة، ولكنه يرغب تلك المرة في أن يذهب إلى أحد المولات التي
اشترى منها أحد أصدقائه ملابسه هذا العام، فيقترح على أمه أن
يذهبا إلى سينما ستارز، حيث تتوارد العديد من المحلات الكبيرة
التي يمكنه من خلالها أن يشتري ما يريد.

سالته أمه في استغراب:

-هوایه سیتی ستارز دا؟

= دا مول كبير في مدينة نصر فيه محلات كتير ممكن نشتري منها اللي إحنا عاوزينه.

-التوحيد والنور هناك؟!

=توحید و نور ایه یا ماما بقولک مول کبیر و فیه محلات عالمیة.

-اها ودا هنجيب منه ايه بال ١٥٠٠ جنيه؟ هنشتري أكياس فاضية؟

=يا ستي أهو نتفرج ويمكن نلاقي حاجة حلوة ورخيصة ..مش هنخسر حاجة.

يستقل ماجد وأمه ميكروباص متوجهًا إلى مترو الانفاق يجلس ماجد في الكرسي الذي يلي السوق مباشرة بجوار الشباك يتأمل في شوارع مصر حيث الخضراء الممتزجة بالتراب وعوادم السيارات، تلك الطبيعة الخلابة المبهجة التي تثير في النفس الفتيان، ولكنه اعتاد على تلك المناظر فقد أتم في تلك البلد ١٨ عشر عاماً بال تمام والكمال.

يجلس سمير أمام ماجد، ظهره في ظهر كرسي السوق ووجهه ماجد بينما تجلس أم ماجد بجواره ممسكة بشنطة يدها بإحكام لأنها تملك بداخلها نصف مليار دولار حصلت عليهم نظير بيع حصتها في فدادين البانجو التي تركها والدها لها في كوبا.

منذ بداية الطريق والسائق ممسك بهاتفه المحمول وبين كتفه وأذنه، ويقوم بلم الأجرة ممسكاً بيده ويمسك الدريلكسيون باليد الأخرى ، كان يتحدث فيه لفتاة لا يعرف أحد هل هي خطيبته أم زوجته أم عشيقته، ولكنه كان يلقي عليها السباب طوال الطريق بينما ابتسامة الهيمان على وجهه وصوته هادئ ، من الواضح أنهما كانوا يتبادلان السباب كنوع من أنواع إظهار الحب، وكأنه أمر معتاد بينهما، بل شك بعض الركاب أن السائق يتحدث مع خدمة عملاء تي أي داتا لا مع حبيبته، وأنها من المستحيل أن ترتبط بشخص بمثل هذا الأسلوب، ولكن كل تلك الافتراضات اندثرت فجأة عندما أنهى مكالمته بصوت حنون قائلاً:

- حبيبة دين أمي، خدي بالك من نفسك يا بسنت، اه يا قلبي
هأجيكم بليل، اه سلميلي على أبوكي، ماشي حبيبتي ماشي يا قلبي،
أمانة الله أمانة الله أمانة الله أمانة الله، سلام سلام سلام سلام سلام
سلام سلام سلام سلام.

وفجأة صاح في الركاب بصوت جهوري قائلاً:

- فيه واحد لسه مدفعش كدا يا جماعة.

الركاب في صوت واحد:

= لا ياسطى كله دفع.

- لا يا جماعة فيه واحد مدفعش، إحنا كدا نرجع الأجرة بقى وكل
واحد ياخد أجرته ونعيد من أول وجديد القصة دي عشان نشوف مين
مدفعش.

يخرج رجل عن صمتة قائلاً:

- باس باس ترجع إيه يا عم خلينا نخلص، امسك ٢ جنيه كمان
أهم وامشي، بس خلينا نخلص، إحنا هنلاقيها منك ولا من اللي
خربها الله يخرب بيته.

يدفع الرجل الناقص من الأجرة، ويسأل سمير ماجد في تعجب:

- مين اللي خربها دا يا ماجد؟

= دا واحد كدا.

-أيوة يعني ملوش اسم؟

=لا دا ليه أسماء كتير.

-طب اسمه إيه؟

=يا عم متوديناش في داهية بقى.

-يا عم قول هو أنا مخبر أنا بس فضولي مش أكثر.

=وزير النقل والمواصلات.

-المواصلات برضو × قالها وهو يغمز ×

=آة يا عم.

قاطعتهما أم ماجد:

-أنت بتكلم نفسك يا ابني؟

=لا لا أنا بغني .

-طب مش كنا روحنا التوحيد والنور ولا ميدان الجizza جبنا كل اللي نفسك فيه بدل السحالة دي؟

=يا ماما توحيد ونور إيه بس، أنا عاوز أجيبي لبس حلو يليق بالجامعة، من بول ان بير او زارا.

-زار إيه يا ابني دا؟

= زارا مش زار .. دا محل لبس بس حلو أوي كل أصحابي اللي
دخلوه انبهروا بيه.

- واشتروا إيه بقى منه؟

= لا هما انبهروا بس وروحوا عشان غالى.

- وانت واحدنا نتبهر؟ ولا نشتري؟

= لا نتفرج ويمكن نشتري.

ينادي السائق على الركاب، قائلاً:

- الآخر يا جدعان.

الركاب في صوت واحد:

= مش هتنزلنا عند المترو يسطري؟

- لا مش هيتفع يا جماعة في أمين شرطة كلح واقف هناك وهيأخذنا
مخالفة، اتمشوا الـ ١٠ متر دول معلش.

= عشرة متر! دا ولا نص كيلو.

- معلش يا جماعة، بسرعة بس.

ينزل الركاب مطلقين لعناتهم على السائق وأمين الشرطة وآخرين
لا نستطيع ذكر أسمائهم ولا صفاتهم، يسيرون بسرعة في اتجاه مترو
الأنفاق لكي يستقلوا مواصلة أخرى إلى مكان وجهتهم، فبعد غلاء

أسعار المواصلات والمترو أصبح الموضوع بمثابة عبء إضافي على
أعناقهم، كحبل مشنقة يضيق قليلاً قليلاً حتى يصيّبهم باختناق، لا
يتحمله البعض فيما نفسيًا، أو يقرر إنهاء حياته بنفسه لكي
يتخلص من أعباء الحياة التي لا تتناسب مع قوته احتماله.

يدخل ماجد وأمه سمير إلى المترو، يقطع سمير تذكرتين،
واحدة له وواحدة لأمه أما سمير فهو يتمتع بحق الدخول في أي مكان
بدون أي رسوم، يقف ماجد وأمه سمير على رصيف المترو ينتظرون
وصول عربة المترو، عند وصولها تتفق أم ماجد مع ابنها أن ينزلان سوياً
في محطة رمسيس، وتذهب لتركب عربة السيدات ومن المفترض أن
يركب ماجد وسمير عربة الرجال، ولكن سمير يجد أم ماجد متوجهة
نحو العربية فيلحق بها، فینادي عليه ماجد قائلاً:

= خد يالا تعالا هنا رايح فين؟

فيرد سمير ضاحكاً:

- رايح اركب بسرعة مع ماما.

= لا دي عربية سيدات ماينفعش.

- يا عم أنا عاوز أركب مع السيدات أنا حر.

= يا ابني أنت هتركب مع الرجالة أنت مش راجل.

- يا عم راجل بس متتحرش أنا لعین يا أخي سبني أركب بقى هناك.

= يا ابني تعالا بس عيب كدا والله.

- يوووه بقى، يا أخي فيه إيه سيبني أحب وأتحب بقى.

صمت ماجد حينها برهة مفكراً فيما قاله سمير، يبدو عليه أنه مجروح عاطفياً، أو أنه كان يحاول الدخول في علاقة حب ولكنه فشل، ظل يفكر كثيراً هل ارتباط الجن بمحبوبته يواجه مصاعب عندهم أم ماذا يحدث، هل يبالغ أهالي الجنية في طلباتهم كما يفعل بنو آدم، أم ماذا يدور بينهم؟

لم ينتبه ماجد إلا عند سماع صفارة باب المترو التي توشك على غلق الباب، فشد سمير من يده ودخلوا مسرعين عربة الرجال قبل أن يغلق المترو الباب، ظل سمير وماجد واقفين، فلا يوجد مكان في المترو للجلوس، ولا للوقوف، فالعربة مكتظة بالركاب ولا يوجد موضع لقدم.

وكان المصريين كلهم في تلك العربة، وللأسف العربة لم تكفي بالموجودين فقط، بل كانت الناس تتزايد في كل محطة، ومع كل تلك الأعداد الغفيرة كانت العربة تحتويهم وكأنها تتسع وتنمدد في الحجم في كل محطة حتى تستوعب تلك الأعداد الغفيرة من البشر.

كان ماجد يقف في ملل ينظر إلى انعكاس صورته في زجاج المترو بينما كان سمير يتأمل في وجوه كل تلك الأعداد الكبيرة من البشر التي تجمعت في مكان واحد لهدف واحد وهو الوصول في الميعاد، هؤلاء الناس لكل منهم حياته ومشاكله وهمومه المختلفة التي يخفيها في قلبه، كل منهم لديه أحلامه وطموحاته التي يريد أن يحققها،

فمنها ما يمكن تحقيقه ومنها ما سيظل بين جنبات خياله يتوطن
عقله لا يمكنه مغادرة تلافيف مخه.

لم يقطع شرود سمير إلا ماجد وهو يشده من يده لكي ينبعه للنزول
إلى محطة الوصول حيث تنتظرهما أميه بالخارج، يخرج ماجد وأمه
وسمير من المترو، ليجدوا ميكروباص متوجهاً إلى أول مكرم حيث
سيتي ستارز، فيركبوا ذلك الميكروباص ويصلوا إلى وجهتهم المقصودة
بعد أن قطعوا حوالي ساعة ونصف في الطريق.

دخل سمير وماجد ذلك البناء الضخم، كانت أول مرة لماجد يرى
مولانا بذلك الحجم، وكان سمير منبهراً أيضاً، بينما كانت أم ماجد
تشعر بأنها تواجهت في المكان الخطأ فكل ما تمتلكه هم ١٧٠٠ جنيهها،
أخبرت ماجد انهم ١٥٠٠، يبدو أنهم سينفقونهم في منطقة الطعام
ويرجعون إلى المنزل يجرؤون أذىال الخيبة.

لم يمر كثير من الوقت حتى لمح ماجد محل ملابس شهيراً كتب
عليه ZARA فنادي على أميه قائلاً:

= ماما يلا ندخل.

: فردت متعجبة

- ندخل فين يا ابني؟

= المحل دا؟

- هو دا محل؟! دا فندق يالا.

= لا دا محل لبس.

-بس شكلة غالى أوى.

= هندخل نتفرج يمكن نلاقي حاجة كويستة.

يدخل ماجد وأمه وسمير المحل، وتبدأ أم ماجد في تفحص الملابس المعروضة، فتجد أشياء غريبة، وملابس عجيبة، لا تعرف منذ متى ترعرعت تلك الموضة في وادينا المصري.

كانت تتفقد الملابس وتقرأ الأسعار على التكت، لم تكن تعرف الفرق بين السعر والكود وذلك لتقارب الأرقام بينهم وجد ماجد بنطلوناً جديداً أو على الموضة كما قال، دخل غرفة تغيير الملابس لكي يقيسه ودخل معه سمير، ومن ثم خرج لكي يبهر أمه بجمال ذلك البنطال المقطوع لكي يتماشى مع الموضة الحديثة، حينها قالت له أمه:

- هو حلو ومظبوط بس شوف واحد غيره عشان دا مقطوع من فوق الركبة، خلية يجبلك واحد جديد.

= لا ما هو كدا.

- يعني إيه هو كدا!

- هو الموضة إنه مقطوع.

= بلاش هبل فين الرجال اللي هنا.

xx يسمعها أحد البائعين في المحل فيذهب إليها قائلاً:

- خير يا فندم؟

= عاوزين بنطلون زبي دا بس مفيهوش العيب دا.

- عيب إيه حضرتك؟

= القطع دا.

- لا دا مش عيب حضرتك دا هو كدا . Ripped Jeans

= لا هو كدا إيه؟ هو انتوا عاوزين تخلصوا من بضاعة بايظة
فتقولوا دي موضة.

ماجد يتدخل قائلاً لأمه في اذنها : «في إيه يا ماما هتفضحينا دي
موضة، خلاص مش عاوزه».

- ياقندم دي موضته كدا حضرتك مش مننا إحنا وفيه غيره سليم
عادي.

= وده بкам بقى إن شاء الله؟

- المقطع ولا العادي.

= الإتنين.

- المقطع ب ١١٠٠ والعادي ب ٨٠٠ .

= يعني المقطع أغلى؟ لا دا أنا جيب منكم بقى بنطلونات سليمة
وأقطعها في بيتنا وأجي أفرش قصادركم وأبيع هنا الواحد بألف بس.

- إيه؟

×× يشد ماجد في أمه خلاص يا ماما خلاص يلا نمشي، يلا
نروح التوحيد والنور ××

- استنى بس يا واد عشان ما يضحكوش على الناس اللي هتيجي
بعدنا بلاش سلبية بقى.

«خلاص يا ماما بقى والنبي».

قالت أم ماجد في حدة:

- طب استنى بس انت، .. بقولك إيه يا أخ، .. لو أخدنا البنطلون
اللي مش مقطع دا هتحسبهولنا بкам آخره يعني؟

= آخره إيه يافتدم دا توكليل أسعاره ثابتة.

- بص هناخد منك الواحد على ٢٥٠.

= نعم؟ ×× قالها عامل المبيعات في دهشة ××

«يا ماما يلا بقى نمشي خلاص بالله عليكي».

- يا واد استنى بس، خلاص هناخده على ٢٧٠ مش هدفع مليم
زيادة والله.

= يافتدم الأسعار ثابتة ما بننزلش جنيه دا بار كود ومسعر.

- أنا عاوزة البنطلون بس من غير البار كود.

قال ماجد لأمه وقد احمر وجهه خجلاً xx

«يا ماما خلاص بقى أنا مش عاوزه يلا نمشي والنبي».

- استنى يا ابني بس أصل إيه الأسعار ده، انتم معنديكمش دكتور

جراحة هنا؟!

= ليه يا فندم؟

- عشان نبيع كلاويننا أو فص من الكبد عشان نجيب لبس.

= لا يافندم معنديناش.

- طب عشان يشيلي المرارة اللي فقعتوهالي.

«خلاص يا ماما يلا بینا، شكرًا يا باشا».

يأخذ ماجد أمه وسمير ويخرجون من المحل عازمين على ترك المول، ماجد كان يشعر بالخجل مما حدث، أما سمير فكان يضحك بهيستيريا شديدة مما استفز ماجد، فسألته:

= أنت بتضحك على إيه يا مستفز أنت؟

- لا أصلـي افتكرت أمي الله يرحمها.

= اشمعنى؟

- أصلـها كانت بتعمل مع البياعين كدا برضه وهي بتجيبـلي لبس.

= ازاي؟

- كانت تدخل تفاصيل وتهزأ البياع اللي واقف على انحدار الموضة
وازاي الذوق العام وصل لكته وكأنه هو اللي عمل الموضة دي أو هو
اللي فصلها.

= يظهر إن الموضع منتشر بين الأمهات كلها فعلًا.

خرج ماجد وأمه سمير وذهبوا إلى أحد المحلات المتواجدة في
ميدان الجيزة، توجد ملابس تشبه تلك التي وجدها هناك ولكن
أسعارها أرخص بكثير، بالطبع هناك فرق في الخامات ولكنه لا يبرر
الفرق الرهيب في الأسعار.

استطاعت أم ماجد أن تشتري له عدد ٣ أطقم وحذاءً جديداً،
ومارست هوايتها المفضلة في الفصال مع الباعة، بل كانت تخرج مع
ماجد وتنتظر البائع ينادي عليها معلناً استسلامه ورضوخه لطلباتها
وفرضها للأسعارها التي حددتها.

فكم من مرة طلب البائع في الشيء ٢٠٠ جنيه، وأخذته أم ماجد
ب ١٠٠، خصم ٥٠٪، عروض أم ماجد أكبر من عروض البلاك
فرايداي، تعجب ماجد من نصاحة أمه في الشراء في حين أنه لو
مكانها كان سيرضخ بكل سهولة لطلبات البائع بل وكان من الممكن أن
يعطيه زيادة إذا استعطف البائع بتلك الكلمات التي يرددونها دائمًا
مثل.

«والله أنا مش كسبان فيها غير اتنين جنيه»

فطالما قيل لأمه تلك الكلمات كثيراً وكانت تأخذ القطعة أرخص بـ ١٠٠ جنيه من كلام البائع، فعلى كلامه هو خسران في تلك البيعة جنيهأً أو أكثر، ولكن كما قالت له أمه:

×× بصن يا ابني متاخدش حلفان من بيعا، هو بينزل من بيته
الصبيح يحلف انه مش هيحلف حلفان صدق النهاردة ××

يبدو أن كلامها كان صحيحاً بالفعل، أما ماجد فقد استطاع شراء ملابس جديدة، أنيقة بأسعار مناسبة غير مبالغ فيها حالة من الصمت تسود طريقة وهم عائدون إلى المنزل، قطعتها أم ماجد

اللي بيهم بالمظهر الخارجي وبينسى جوهره دا بيتنسى بسرعة
ويبقى بلا قيمة، يعني أنت لو معاك فلوس ممكن تشتري بيها لبس
واسعة وجزمة، أو ممكن تاخد بيها كورس وتطور من نفسك وما
عملتش كدا تبقى خسرت كتير، تبقى عامل زي اللي جاب كيكة
محروقة وحط على وشها كريمة، لا كدا بقى طعمها حلو وهتتاكل ولا

هو حل المشكلة الأساسية، المظاهر أحياناً تكون مهمة بس مش هي الأساس، الأساس هو البني آدم، هو أنت يا ماجد.

قيمتك في شخصيتك وعقلك وعلمك وأخلاقك مش في لبسك ولا بنطalonك المقطع الفالي اللي جاييه بكمدا ألف.

صمت ماجد يفكر في كلام أمه ، يبدو أنها شرحت له هذه المرة ما قرأه في تلك الورقة البالية التي وجدها في المكتب.

«القشرة الخارجية لا تدوم، وتصيبها عوامل التعرية، اهتم أكثر بالباطن، فهو الأساس، هو من يبقى ويؤثر، فالشجرة بلا جذور لا تثبت وتميل مع الهواء والمنزل بلا أساس ينهار في أول اختبار»

حينها فهم ما المقصود بالاهتمام بالباطن، وما هي القشرة الخارجية، عادوا إلى المنزل وقام ماجد بلبس ملابسه الجديدة التي أثني عليها والده، وقام بوضع ملابسه في دولابه، واستعد للنوم، فها هي إجازة آخر العام توشك على الانتهاء وتبدأ الرحلة الجديدة، رحلة الجامعة.

تنتهي أيام الإجازة ويستعد ماجد مساء يوم الجمعة الذي يسبق الدراسة إلى أول أيام الجامعة، تلك الأيام التي تعتبر أحلى أيام الحياة كما سمع من أصدقائه وأقاربه الأكبر منه.

قد قام ماجد بتجهيز ملابسه الجديدة وحذائه وبحث عن سمير فوجده يجلس حزيناً في أحد أدراج المكتب، فتعجب ماجد وسأله:

=مالك يا ابني في إيه؟

- خلاص يا ماجد هتروح الجامعة وهتنساني.

= يا ابني هو أنا رايح جامعة ميتشجن؟! دي جامعة القاهرة يعني هتشوفتي كل يوم.

- هيبي ليك صحابك وشلتك وهتمسك المسطرة ال T وتنساني.

= يا ابني إيه الكلام دا؟

- هتحب واحدة زميلتك وترتبط وتفضل طول اليوم تكلمها في التليفون تقولوا كلام حب ومحن وهضطر أسمعه وأنا عندي حساسية من المحن والحب الصراحة.

= هاهها يا ابني مفيش الكلام دا.

- طب خدني معاك.

= آخذك فين؟

- الجامعة ... عاوز أعيش حياة الجامعة تاني وأحب وأتحب.

= طب هبقى آخذك معايا متزعش.

- وعد؟

= وعد يا عم يلا قوم بقى اعدل وشك ونام عشان هصحى بدرى.

- حاضر يا مدير.

يغلق ماجد النور ويغط في نوم عميق، لكي يستيقظ مبكراً فبدأ أول أيام الدراسة وأول أيام التجربة الجديدة التي سيخوضها..



أول أيام الجامعة

توقف أم ماجد ماجد في تمام الساعة السادسة صباحاً، لكي يستعد للنزول إلى الجامعة، فيقوم من على سريره في نشاط غير معهود عليه، فكان دائمًا يستيقظ «بضرب الجزم» كما كانت تقول دائمًا والدته ولكن تلك المرة الوضع مختلف فهو ذاهب إلى الجامعة، دخل ماجد الحمام وقام بالاستحمام ومن ثم خرج وارتدى ملابسه الجديدة وظل واقفاً أمام المرأة ما لا يقل عن ربع ساعة يمشط شعره وي Hendم نفسه وكأنه ذاهب إلى ميعاد غرامي أو أنه سيقابل حبيبته التي لم يرها منذ زمن طويل.

هم بالنزل ولكنه نسياليوم أن يطمئن على صديقه سمير، يبدو أن شكوك سمير كانت في محلها وأنه مع الوقت سينساه وينشغل ب حياته الجامعية، حينها عاد ماجد إلى المكتب وفتحه فوجد سمير نائماً يبدو عليه أنه سهر ليلة أمس، فربما كان يفكر في شيء هو الآخر.

نزل ماجد ووقف في طابور طويل وسط زحام من الناس منهم من في عمره ومنهم من هو أكبر منه بعقود، يتشاركون في هم واحد وهو كيفية اللحاق بمكان في أحد الميكروباصات.

فلقد خرج من منزله في السابعة صباحاً أول أيام الدراسة، فلقد تجمع الطلبة والموظفوون وكل من يخرج صباحاً ليطلب الرزق في تلك الحلبة يتصارعون من أجل الركوب لكي لا يتأخروا عن الميعاد سواء كان عملاً أو دراسة.

وبعد صراع طويل وشد وجذب وجري وتحليق على الميكروباصات، استطاع ماجد الركوب، بعد أن اتسخت ملابسه الجديدة وأصبح يتصلب عرقاً من كل مليمتر من جلد جسده، فقال لنفسه:

شكلها هتبقى أيام سودة لو كل يوم الوضع على كدا.

- أستاذ أستاذ.. الأجرة ياريس.

=اه معلش اتفضل.

- نص جنيه كمان بعد إذنك.

= هي مش بـ ٢ ونص؟

- اه دا طول اليوم بس أنت مش شايف الجو عامل ازاي دا غير إني
هرجع فاضي عشان زي مانت شايف الشغل كله رايح بس.

= طب ودا مش استغلال؟!

- إيه ياعم الكلام الكبير دا أنت هتعمل فيها المهراجا غاندي.

= أولاً اسمه مهاتما ... مهراجا دا محل الأكل الهندي اللي لسه
معديين عليه.

-ياعم أهم هنود في بعض شعراً إحنا مالنا ... المهم ايدك ع النص جندي.

=امسک یاعم ...بس خلی بالک دا استغلال.

- تمام أنا إقطاعي استغلالي رأس مالى متواحش ...

= طیب یا متوجه شد، الدنیا کل یوم بتبقی کدای!

-بص يا أستاذ ، اسم الكريم اييه؟

مأحد =

-الكابتن ماحد بنفسه!

=ابتدئنا الاستظراف بـقى.

-ياعم بنضحك معاك ... بص يا سيد الكباتن، لو الساعة عدت
٧ بتبقى فرصك في الركوب قليلة، زي فرصك في الحصول على حياة
كريمة في مصر بالظبط.

=أمال اركب امتى أنا وكريمة؟

ضحك السائق بشدة قائلاً:

خيم الصمت على أرجاء الميكروباص، فالكل في حالة صمت وكانهم لم يفيقوا بعد، يدفعون زيادة عن الأجرة نصف جنيه من دون

جدال، فلقد تعود ذلك الشعب المسكين على الاستغلال، الذي تمارسه عليه الحكومة ويمارسه الشعب على بعضه، حينها قرر أن يدخل ضمن القطيع ولا يعترض، وألا يعيش دور المهاتما غاندي أو كما قال له المهراجا، حقاً فكلهم هنود ونحن مصريون للأسف لسنا هنوداً.

وصل ماجد إلى الجامعة ودخل المدرج ليحضر أول محاضرة في العام الدراسي الجديد، كانت محاضرة في الفيزياء، تلقىها عليهم إحدى أعضاء هيئة التدريس، يبدو أنها في منتصف الأربعينات، قصيرة وممتهلة، صوتها يكاد يسمعه الطلبة بصعوبة، لم يفهم منها أي شيء فكانت الدراسة باللغة الإنجليزية وهو كان يدرس في المدرسة باللغة العربية.

وفي أثناء الشرح، رفع ماجد يده فلم تلتفت إليه، ظل رافعاً يده حتى أصابها الوهن ولم تأخذ بالها أيضاً، فقام وسط صمت الجميع وقال:

=أبلة ممكن سؤال؟

حينها انفجر المدرج ضاحكاً، وكأنه القى على مسامعهم نكتة أو أنهم رأوا مشهدًا من فيلم الناظر لعلاء ولـي الدين، لم يفهم ماجد شيئاً ولم يدرك ماذا حدث، وأحس أنه غريب وسطهم لأنـه هو الوحـيد الذي لم يضحك، فقام بالضحك معهم وهو غير مدرك لماذا يضحك، حتى قاطعته الدكتورة التي تـشرح قائلة :

- أبلة! أنت فاكر نفسك في مدرسة؟ اسمها يا دكتورة.

= آسف يا دكتورة مش قصدي.

- انت كنت مدرسة إيه؟

= تحيا مصر الثانوية بنين.

- عشان خاطر مصر بس هعديهالك المرة دي ... اتفضل اقعد.

جلس ماجد بعد أن أنساه ما حدث سؤاله بل وأنساه أيضًا اسم المادة وفي أي كلية قد ألحقه التنسيق، وشعر بخجل شديد جعله يترك باقي المحاضرات ويعود إلى المنزل، متمنيًّا أن يختفي ذلك اليوم من حياته، عاد ماجد إلى المنزل حزيناً، ودخل غرفته فوجد سمير يجلس على المكتب وكأنه كان يعلم أن ماجد سيعود اليوم قبل ميعاده، ودار بينهم الحوار التالي:

- مالك حصل إيه؟

= مافيش.

- إيه يا ابني شغل البنات ده، ما تتجز تقول في إيه؟

= اتفضحت في الكلية.

- اتحرشت بيانت هناك؟ احكي لي عملت إيه بالتفصيل.

= يا عم اتحرشت إيه بس هو أنت كل تفكيرك كده؟

- سوري أصلي مكبوت شوية، أمال حصل إيه؟

xx حكى له ماجد ماحدث في المدرج xx

فانفجر سمير ضاحكاً قائلاً :

-هاهاهاهها أبلة؟ رايح تقول لدكتورة جامعة أفت حياتها في المذاكرة والبحث العلمي يا أبلة؟! دا كويس إنها ممسكتش في زمارة رقبتك.

= زمارة رقبتي؟ أنت قديم أوي.

- معلش يا جديد أنت يا صايع يا بتابع ممكن سؤال يا أبلة.

= أنت بتترياً عليا؟! دي ضحكت عليا المدرج كله.

- معلش.

= هو دا اللي ربنا قدرك عليه؟! أنا بفكر ما تروحش الكلية تاني.

- ماتروحش إيه بس يا عم بطل هبل ... أنا هخالصاك الموضوع دا.

= ازاي؟

- من غير ازاي، ماتروحش الكلية بكرة بس .. وانا هخالصاك الموضوع دا كله ومحدش هيفتكر الموضوع دا أساساً.

وبالفعل لم يذهب ماجد الكلية في اليوم التالي، وذهباليوم الذي يليه، وحضر محاضراته وكأن شيئاً لم يكن فعلاً، يبدو أن سمير قد قام بحل الموضوع كما وعده، فبغض النظر عن كونه جنًا ثقيل الحركة إلا أنه في وقت الشدائـد مفـيد جـداً.



أول قلب

تمضي الأيام في الجامعة، ويصبح ماجد شلة كبيرة من الأصدقاء يقابلهم في الجامعة ويخرجون سوياً، يلعبون الكرة مع بعضهم البعض وفي أيام الامتحانات يتشاركون في تصوير الملازم والمذكرات التي لا يفتحون معظمها ولكن من باب الأمان النفسي يجب أن يكون لديهم كل ما يتعلق بالمنهج سواء من قريب أو من بعيد.

تمر السنة الأولى والثانية والثالثة والرابعة ويستطيع ماجد الحصول على تقدير جيد جداً، فسنة تلو الأخرى أصبح ماجد يتخطى الحاجز الدراسية كفرس في سباق خيول يسعى للحصول على مركز متقدم، وطوال تلك السنوات بالرغم من تكوين ماجد صداقات عديدة إلا أن علاقته بسمير أصبحت أقوى وأقوى، فهو بمثابة السندي الذي يعتمد عليه ماجد في الشدائيد يأخذ بنصيحته العاقلة التي دائمًا يكون لها أثر كبير في حياته.

في يوم من الأيام قرر ماجد أن يصريح مريم بحبه، مريم تلك الفتاة الهدئة الجميلة التي دق قلب ماجد نحوها منذ أن عرفها في السنة الأولى، فلم يعد ماجد صغيراً، فقد أوشكت أيام الدراسة

أن تنتهي، ويخرج ماجد من كلية الهندسة ويصبح مهندساً كبيراً
تتصارع الشركات من أجل أن تظفر بخدماته الجليلة، لذلك هو يبحث
عن نصفه الثاني لكي يحقق لنفسه الاستقرار العاطفي حتى يستطيع
التركيز في مستقبله، وعمله، كي يصبح من أكبر المهندسين في مصر
والوطن العربي.

فبعد فترة طويلة من الصراع الداخلي بين قلبه الذي كان يدفعه
إلى أن يخبرها ما يكتن لها من مشاعر وبين عقله الذي كان يرفض
الموضوع جملة وتفصيلاً، معللاً ذلك بصغر سنها وأنه غير جاهز ولن
يستطيع أحد من أهله مساعدته على الزواج وذلك لظروفهم الصعبة،
ولكن بعد شد وجذب بينهما، انتصر فيها قلبه على عقله وقرر أن
يصرح لها بحبه ويطلب منها أن يأخذ ميعاداً من والدها حتى يتقدم
لخطبتها في إجازة آخر العام من السنة النهائية لهم في الكلية.

ولكن كعادته قبل أن يفعل أي شيء يرجع إلى الجن سمير لكي
يأخذ رأيه الحكيم الذي يكون في أغلب الأحوال أقرب إلى الصواب،
وعندما عاد إلى المنزل دخل غرفته مسرعاً وتبدو على وجهه علامات
الفرح، فهو الآن تفصله خطوات عن الإفصاح عما يحمله قلبه من
مشاعر فياضة تجاه من يحب، فعندما نظر إليه الجن سمير قال له:

-أخبارك إيه يا عم روميو؟

=روميو!! أنت عرفت منين؟

-يا ابني هو أنت مربي دولفين في البيت؟ أنا عفريت.

= لا بجد عرفت منين؟!

- شكلك باين عليه إنك واقع لشوشتك.

= شوشتي؟ يعني إيه؟

- معرفش معناها إيه الصراحة بس أنا بسمعهم بيقولوا كدا.

= ممممممم طب أنت إيه رأيك؟

- لا.

= أنت عارف هي مين طيب؟

- ومش عاوز أعرف.

= ليه بس؟

- مش وقته ماتفلطش غلطتي.

= غلطه إيه؟

- إنك ترتبط وأنت صغير كدا.

= ليه في إيه أحكيلى؟

- دا موضوع كبير يا ماجد، متقلبس عليا المراجع.

= مراجع؟ أنت مجروح يا سمير؟

- اه يا ماجد موجود يا أخي، أنت ليه فاكر إني مابحشش؟! ليه فاكرین نفسكوا بس اللي عندكم مشاعر وبيحبوا وتنحبوا، تجرحوا وتتجزحوا وكان ربنا مخلقش الكون دا كله غير ليكم أنتم بس.

= انتم؟ هي بقت كدا يا صاحبي! بقينا بنقول أنتم واحدنا؟ إحنا واحد، ايد واحدة ، معلش اهدى بس واحكيلي.

- احكي لك إيه ولا إيه!

= أنا هسمع اللي هتحكيه، أتكلم وفضفض أنا سامعك يا صاحبي.

يبتسم سمير ابتسامة جريحة، يبدو انه تذكر ذكريات عصيبة، ينام سمير على الأرض ناظراً إلى سقف الغرفة ويبدأ في الحديث:

- كنت في آخر سنة ليا في الكلية، وشوفتها، خطفت قلبي كنت بفكر فيها ليل ونهار، كنت شايف إن دي بمثابة الزوجة الصالحة اللي ممكن تجييلي كام جني صغير يملو عليا المكتب، خصوصاً إني كنت وحيد.

ساعتها عملتلها ادد على الفيس بوك عشان أعرف أكلمها وأتعرف عليها، سنة ونص يا ماجد سايباني متعلق برة ومش راضية تعمل اكسبيت، دا لو كان اللي عملها ادد قتفذ كان صعب عليها وعملته اكسبيت.

بس أنا مزهقتش، وفضلت كل شوية أشيل الاحد وأرجعه تاني عشان تاخد بالها مني، أعملها Poke ، كنت بعمل شير لصور البروفايل بيكتشر بتاعتتها وأكتب سبحان الله.

قاطعه ماجد متعجبًا وقال له:

= سنة ونص! وبتعمل شير لصور البروفايل بيكتشر بتاعتتها ليه؟
هي تايهة؟

تنهد سمير وقال :

- ممکن متريأش! أنا كنت بحاول ألفت انتباها عشان تاخد بالها مني، كنت شاب طايش بس كنت بحبها، عارف يا ماجد أول حب دا عمره ما بيتنسي، بيبقى طعمه مختلف، بتحس ساعتها إن أول مرة قلبك يدق، يوم تيك يوم.

قاطعه ماجد قائلاً :

= يوم تيك يوم؟! وايه كمان يا عم وائل جسار؟

أكمل سمير وكأنه لم يلاحظ سخرية ماجد منه:

- حاولت ألفت انتباها بس كانت حطاني في «المتعلقين زون»، كنت كل يوم أدخل على الأكونت بتاعها ع الفيس بوك أكثر ما بدخل عندي، كنت بحاول أشوفها بتحب إيه، بتكره إيه من خلال الحاجات اللي بتعملها شير.

لحد ما جه في يوم صحيت من النوم ببص في النوتيفيكشنز لقيتها عملتلي اكسبت، مكتنش مصدق إني بقىت عندها في قائمة الأصدقاء، ساعتها فضلت أتقطط من الفرحة، فضلت أعمل طيارة أبو تريكة في قلب المكتب مش مصدق.

قاطعه ماجد متسائلاً :

- طيارة أبو تريكة؟! أنت تعرف أبو تريكة؟

فتعجب سمير من السؤال قائلاً:

- مين مايعرفش أبو تريكة؟! دا أمير القلوب يا جدع، محدث
مايحبش أبو تريكة مع إني زملكاوي بس بعشقه.

= أنت زملكاوي؟

-للأسف.

= والزمالك عندكم زي عندنا كدا!

- الزمالك يا ابني واحد في كل حته، منه لله «مرتقى مندور»

= دا مين دا!

- دا رئيس نادي الزمالك عندنا، بس جن شراني والكل بيختلف منه، ماسك النادي مش راضي يسيبه، وخربه، على العموم مش موضوعنا سيبني أكمل.

= طب كمل إيه اللي خلاها تعملك اكسبت بعد كل الفترة دي؟

حيتك!

تنهد سمير وقال له :

- أنا كنت فاكر إن قلبها مال ساعتها وخلاص الفرق ما بينا اتشال زي ما أستاذ عمرو دياب عندكم بيقول، وبدأت تحس إني بكراش عليها، بس لما قلت في باقي النوتيفيشنز اكتشفت إنها عملتلي اكسبت عشان فجأة أنا بقية مشهور.

=مشهور ازاي؟

-هحكيلك يا سيدى بص:

في يوم من الأيام كنت قاعد بهزز مع ناس صاحبى وبنعمل فيديوهات على أغاني، كنا بنشغل أغاني ونحرك عليها شفافينا، فصورت أغنية وأنا بحرك بقى على أغنية «العب يالا» نزلت الفيديو ودخلت أنام، صحيت من النوم بيص بعد ما فرحت إنها قبت الاذر بتاعي، لقيت الفيديو بتاعي جايب ٥٠ ألف لايك و ملیون جن شافوا الفيديو، وكمية جن مش طبيعية بتعمل فولو.

قاطعه ماجد قائلًا:

- إيه! انتوا عندكم أغنية العب يلا مشهورة برضه؟!

صمت سمير هنيهة ثم قال :

- اه عندنا بس فيه شوية اختلافات في الكلمات، يعني مثلا الكلمات عندنا بتقول «قاعد لوحدك كدا سرحان «بني ادم» يوزك في سكة شمال يفضل يقولك، العب يلا».

بس مش موضوعنا، سيبني أكمل، المهم يا سيدى بقى عندي نص مليون فولور ع الفيس بوك، وبقيت مشهور وواحد من الجن الانفلونسرز اللي عندهم متابعين كتير اللي كل شوية يعملوا إعلانات لمطاعم ومزيل لرائحة العرق وكل شوية يتتصوروا صدفة في مكان ويقابلوا ممثلين في مكان

قاطعه ماحد متوجهان:

- هي قالتك بجد حموموموموت؟

-اه و قالت أنت ازاي كدا

= هو انتوا عندكم انفلونسرز برضه؟

-اه يا ابني عندنا انفلونسرز كتير، بس زمان ماكناش كتير كان
كام واحد، كنت أنا و «جن الهواري»، و «جن بن جمال» وكام واحد
كمان، بس دلوقتي كلنا بقينا نعمل فولو لبعض فبقينا كلنا مشاهير
زي بعض.

=مممممم بس مين جن بن جمال دا و جن الهاوري؟

-جن الهاوري، دا صاحبي بس محدش يعرف شكله، ودائماً
يتصور بحواره بس، أما بقى «بن جمال»، بتاع رحلتي من الجن
إلى الألس! بيكتب حاجات ساخرة كدا وبيأش، عيل سخيف، شعره
طويل وناعم.

ناعم =

-اه عادي، يعني لا هيبقى ناعم لا في عالم الإنس ولا الجن؟

= عندك حق، طب كمل.

- المهم اتصاحبنا شوية واتعرفت عليها أكثر، بدأت اكتشف إنها شخصية تافهه، بس أنا كنت بحبها، يمكن عشان أنا تافه برضه، وجه الوقت الحاسم في أي علاقة.

تسائل ماجد في لهفة:

= إيه هو؟

- جاتلي الكليةاليوم دا معيطة، وقالتلي، سمير، أنا جالي عريس وبابا موافق، وأنا مش عارفة أرفضه زي كل مرة، عشان أهلي بدأوا يشكوا فيا وأنا مش عارفة أعمل إيه، أنت لازم تعمل حاجة، لازم تيجي تتقدم بسرعة.

= طب وهي فعلاً جالها عريس؟

- لا طبعاً ولا حد عبرها بس حركات بنت جنية طبعاً.

= طب وعملت إيه؟

- ساعتها مكتنش عارف أعمل إيه، أنا لسه مخلصتش، هروح أقول لأبوها إيه؟!

= عندك حق، طب كمل حصل إيه بعد كدا؟

-مفيش فضلت تزن عليا، تزن عليا عشان أتقدم، وأروح أقابل
باباها، وأنا أفهمها إني لو روحت هترفض بس هي كانت شايقة إن
باباها جن جدع ومتفهم وعمره ما هي بتص لحبنا بنظرة سطحية وإن
آخر حاجة تفرق معاه هي الفلوس، وإنه بيشتري جن مش أكثر.

= طب وبعدين؟!

نزلت لا بوار اشتريت شيكولاتة، ولبست قميص وبنطلون، حلقت
شعرى وظبطت حوافرى، وروحت لهم المكان اللي ساكنин فيه.

= كانوا ساكنин فين؟

- كانوا ساكنин في شجرة كبيرة في المهندسين، أبوها كان وارثها
عن أبوه، كانت شجرة كبيرة ؟ فروع وجزعيم وكانت واحدة ناصية.

= ما شاء الله كانوا أغنى يعني؟

- لا كانت بتحور عليا، ووطلعت قاعدة في بولاق ومفهمني إنها من
المهندسين.

= طب عملت إيه؟

- ولا حاجة كنت بحبها يا أخي وتفاضيت عن كدبها عادي.

= طب كمل كمل يا قفص.

- هنفاط بقى! طب مش مكمل.

= ياعم أنا آسف، افضل كمل.

- المهم دخلت وقعدت شوية مستني أبوها يجي يقابلني، ساعة مستنيه، قال يعني كان مشغول ومش فاضي، كان عامل فيها الوليد بن طلال مع إنه كان قاعد جوة بالفانلة الحمالات لا شغلة ولا مشغله.

بس قولت معلش يا واد كله يهون عشان خاطرها، شوية ولقيته داخل عليا، وقالي منورنا يا أستاذ سمير والله.

وساعتها دار بیننا الحوار دا:

- أنا سمعت من داليا إنك عاوزني، خير يا ابني؟

= والله يا عمي أنا يسعدني ويشرفني إني أطلب أيد بنتك.

- طب ممكن تكلمني أكثر عن نفسك.

= اسمى سمير شاب في مقبل حياتي، آخر سنة لي في كلية التجارة، عايش لوحدي في مكتب وارثه عن أبويا الله يرحمه، والدتي متوفية ومنديش أخوات، أقدس الحياة الزوجية، وإن شاء الله أبقى نعم الزوج الصالح لبنت حضرتك.

- والله يا ابني أنا في الأول والأخر بشتري جن، ومايفرقش معايا الماديات دي خالص.

= إن شاء الله أكون عند حسن ظنك يا عمي.

- طيب أنا معنديش مشكلة، تحب نتكلم في تفاصيل؟!

= تفاصيل إيه أنت مش قولت إنك بتشتري جن؟

- تفاصيل بسيطة كدا مش أكثر.

= طب اتفضل يا عمي طلباتك إيه؟!

- لا يا ابني طلبات إيه، أنا قولتك أنا بشتري جن وما يفرقش معايا
الماديات دي خالص هي بس حاجات بسيطة كدا مش أكثر.

= اتفضل يا عمي أنا سامعك.

- بالنسبة للشبكة، هتجيبها دهب ولا أملاظ؟

= أملاظ!!!!

- اه حاجة خفيفة كدا قيراط وربع ولا نخليها دهب؟!

= لا نخليها دهب طبعاً.

- طيب نقول ١٠٠ جرام كويس.

= ١٠٠ جرام! أنت عارف الجرام بقى بкам دلوقتي؟

- يا حبيبي الذهب دا هيبقى في بيتك ليك وللزمن، هو أنا هاخده
عندى، دا ليكوا انتوا.

= بس يا عمي ١٠٠ جرام كتير.

- والله أنا مديك أحلى سعر واسأل بره، خد لفة وتعال.

= أخذ لفة؟! هو أنا بشتري مروحة؟

- لا بس دا حلق، والحق مايز علش.

= خلاص يا عمي موافق، طلباتك إيه كمان؟

- المكتب.

= ماله؟!

- هتكتبه باسم دالي.

= إيه؟ ليه؟!

- حبيبي أنت في الأول والأخر جن ذكر، يعني ملکش أمان، ممكن في أي يوم ترميها في الشارع وتحجوز عليها أو تجلبها ضرة، إيه اللي يضمن حقها؟

= بس يا عمي أنا مش كدا وبعددين دا ورثي من أبويا!

- حبيبي مفيش مشكلة مدام أنت واثق من نفسك وإنك بتحبها ومخلص ليها، إيه اللي هيقلقك؟

= طب وإيه كمان؟

- الفرح، بص مش عاوزين حاجة أقل من فرح بنت خالتها كوثر، كان معمول في كيمبنسكي اللي في التجمع، كان حلو الصراحة وكان البوفية فيه شوية فراح بانية وبيف استرا جانوف، تحفة، نفسي آكلهم تاني والله.

= يعني وأنت عشان نفسك تاكلهم تاني تلبسني في فرح وأكلهم لـ ٣٠٠ واحد كمان!

- يا حبيبي دي ليلة العمر.

= أنت عارف ليه سموها ليلة العمر؟

- عشان بتعمل مرة واحدة!

= لا، سموها ليلة العمر عشان بتصرف فلوس العمر كلها في ليلة واحدة.

- يعني إيه؟

= يعني مش هعمل فرح.

- نعم!

= ومش هكتب المكتب باسمها.

- إيه!

= ١٠٠ جرام دهب شبكة إيه اللي هجيبهم! هتخلفلي محمد صلاح يعني يلعب في الدوري الإنجليزي! دي آخرها تجibli جن بكرش وفانلة بحملات مقطوعة زي جده كدا بالظبط.

- أنت قليل الأدب.

= أنت اللي استغلالي، قال بشتري جن قال.

-ولد.

= بلا ولد بلا زفت، خليها عندك، خللها كدا وحنطها.

-اتفضل اطلع برة.

= برة برة يعني هتطردني من الجنة.

انفجر ماجد ضاحكاً وقال له:

= جدع والله يا سمير، جدع إنك أخذت موقف ومقبلتش بالهبل دا
تحت مسمى الحب.

- عيب عليك أنت شاييفني جن فرفور! أنا من المعادي وأعجبك
أوي.

= طب وهي عملت إيه!

- مفيش شوية بستات ع الفيس بوك من نوعية اللي كنت فاكراه
ذكر طلع ذكر بط، وشوية تلقيح عليا ع الفيس بوك وصحابتها بقوا
بيدخلوا يقولولها معلش يا قلبي دا عيل، وعمره ما كان راجل، وكانت
بتشير أغاني الأستاذ هاني شاكر كتير.

= طب وأنت عملت إيه!

- كنت بلعب كاندي كراش وابعتلها ريكوستات.

= هاهاهاها يا مستقرز، طب وبعدين؟

-عملتلي بلوك.

= أقل واجب طبعاً، طب وأنت مكتتش متضايق؟!

- كنت متضايق جدًا طبعاً.

= أكيد طبعاً دي حب كذا سنة وعافرت لحد ما وصلتها، أنت فضلت سنة ونص تعمل شير لصورها وتكتب سبحان الله، دا غير إنك كنت بتتحبها بقالك زمن، أنا عارف إن الموضوع صعب فعلًا.

- بااااس بااااس إيه يا عم الأفورة دي! أنا كنت زعلان على علبة الشيكولاته اللي جبتها من لابور وأبوها المعفن اللي ضربها لوحده، يلا بالسم الهاري.

= هاهاهاهها وأنا اللي كنت فاكرك زعلان عليها.

- بص يا ماجد، اللي يتعامل معاك على إنك صفقة ويقيمك كشخص بشوية فلوس هتدفعها أو شوية فلوس معاك دا يبقى شخص مريض، ومش سوي، أهلها مكانوش كويسين وهي كانت موافقة على اللي عملوه ومش شايفاءه غلط، فكدا خلاص مبقتش تلزمني.

ده بعيداً عن إنها تافهة يعني دي كانت بتضحك على فيديوهات شادي سرور والخليل كوميدي يا راجل.

= بجد!

- والعشرة دول يا عم.

= طب الحمد لله إنك خلصت منها بس اللي عاوز أقولهولك إن
مريم مش كده، مريم غير كل البنات يا سمير، أنت متعرفهاش، لازم
اعرفك عليها.

- طب وريني ياعم تنزل في يوم الكلية سوا وأشوفها وأحكم بنفسي.

= اتفقنا يا صاحبي.

تمر أيام الامتحانات يوماً تلو الآخر وتوشك الامتحانات أن تنتهي،
فها هي الخمس سنوات توشك على الرحيل ليتخرج ماجد مهندساً
يبدأ الصراع في سوق العمل من أجل وظيفة مرموقة، لكنه لم يعلم
بعد ماذا يخبا له الجيش، هل سيتحقق به كجندي مجند لمدة سنة أم
سيكون حظه عاثراً فسيضيع من عمره ٢ سنوات في اللاشى كظابط
احتياطي.

في تلك الفترة قرر ماجد أن يصارح مريم بحبه، فأخذ سمير معه
لكي يتعرف على مريم ولكي يساعدده ويشد من أزرها.

في ذلك اليوم انتظر ماجد مريم بعد آخر امتحان لهم في السنة
الخامسة، كانت تسير لوحدها كعادتها بعد أن أنهت الامتحان متوجهة
نحو باب الخروج من الكلية، لم يكن ماجد يعرف عنها أي شيء،
 مجرد تعاملات بسيطة في إطار الدراسة، ورصد لتعاملاتها مع باقي
صديقاتها، تلك التعاملات المحدودة جعلته يشعر أن هذه هي الفتاة
المناسبة له.

التقت إلى سمير قائلاً :

١٣٠

= ولا يا سمير أهي دي مريم.

- هي فين دي يا ماجد!

= اللي هتخرج من الباب دلوقتي دي.

- اه تصدق حلوة فعلًا، وشكلها هادي ومحترمة.

= عيب عليك، هو أنا اختار أي حد!

- طب وأنت هتسبيبها تخرج!

= منين؟!

- يا مغفل البنـت هـتـخـرـجـ منـ الـكـلـيـةـ وـأـنـتـ مـكـلـمـتـهـاـشـ لـسـهـ.

= اه تصدق، يالهوي

يشد ماجد سمير من يده ويجري بسرعة نحو مريم، منادياً عليها
قائلاً:

= مريم، مريم.

- أيوة، ازيك يا ماجد.

= ازيك انتي، مبرووك ع الأجازة خلاص كدا اتخربنا وبقينا
مهندسين.

- الحمد لله بس لسه النـتـيـجـةـ رـبـنـاـ يـسـتـرـ بـقـىـ.

سمير من خلف ماجد متهكمًا:

× اسألها يالا ازاي الحج والحجارة وأهلها اللي في البلد، وإيه خططها في عام ٢٠١٨ على الصعيد السياسي والاقتصادي.

يلتفت ماجد إليه وشرار الغضب يتطاير من عينه:

= ممكن تخرس خالص دلوقتي!

تتسأل مريم في تعجب:

- أنت بتكلم نفسك يا ماجد!

يرد ماجد ببراهة:

= لا أكلم نفسى إيه، أنا كنت بعطس.

- طب الحمد لله.

= الحمد لله عشان بعطس.

- لا قصدي قول الحمد لله.

= اه اه صبح بعطرس فأقول الحمد لله، معلش.

- ماجد أنت فيك حاجة؟!

= يعني.

- يعني إيه؟

= مريم أنا كنت عاوز أقولك حاجة.

- افضل يا ماجد.

من الخلفية سمير يسمع صوت سمير متهكمًا:

× أنت على ما تقولها بحبك، وعاوز أتجوزك ه تكونوا دخلتوا في
سن اليأس وهتبقو أخوات.

يقول ماجد غاضبًا:

= اللهم طولك يا روح!

فتتسائل مريم في تعجب:

- في إيه يا ماجد أنا مش فاهمة حاجة!

= لا لا مفيش حاجة يا مريم، أنا كنت عاوز بس أقولك إني معجب
بيكي وعاوز أتقىملك.

- إيه!

= أنا معجب بيكي من زمان، ومكانتش عندي الشجاعة إني أقولك
كده، بس دلوقتي خلاص، خايف مانتقابلش تاني بعد الجامعة،
وحايف معرفش أشوفك تاني وأقولك كده، قررت أقولك كدا آخر يوم
امتحانات وأستنى ردك سواء دلوقتي أو يوم النتيجة، بس لو مرديتنيش
عليا هعرف إنك مش موا.....

-بس أنا موافقة.

=إيه!

لم يصدق ماجد أذنيه حينها، ولم يدرك معنى الكلام، توقف به الزمان، فلم يعد يعرف أين هو ولا لماذا وقف ذلك الموقف من الأساس، نظر إلى سمير فوجده يغمز له غمزة خبيثة، وقال له «أيوة بقى يا عم»، التفت حينها مريم فوجدها قد نظرت في الأرض من خجلها فقال لها:

=أنا بس عندي شوية ظروف هظبطها وأجي أكلم باباكي، بس بعد ما أظبط أمري الأول.

-وأنا مستنياك.

=هقولك ازاي ع المعاد؟

-خد وقتك، وهنتقابل تاني كمان شهر يوم النتيجة، تكون ظبطة أمورك عشان تقدر تكلم بابا، هستنالك اليوم ده، وهرعف أنت وصلت لإيه، لو جيت يبقى أنت فعلًا نيتك خير، لو ماجتش يبقى خلاص.

=خلاص ماشي، خدي بالك من نفسك.

-وأنت كمان، مع السلامة.

قالتها مريم وأدارت له ظهرها وانصرفت، بينما ظل ماجد رافعًا يده مشيرًا لها وظل يردد لسانه، مع السلامة، مع السلامة، مع السلامة حتى قاطعه سمير قائلاً :

-جرا إيه يا روميو! خلاص مشيت، دي زمانها بتتغدى في بيتهم.

فقال ماجد غاضباً:

=يا أخي أنت مابتحسش! معنديكش مشاعر، أنا عرفت ليه أبو داليا عمل فيك كدا.

صمت سمير هنيهة ووضع يده على قلبه قائلاً:

-بتعايرني يا ماجد يا خوياد! بتعايرني! حسيبي الله ونعم الوكيل، داين تدان، داين تدان.

=لاااا وحياة أمك يا سمير، بلاش داين تدان، أنا لسه مروحتش لأبوها وأخاف يطلع زي أبو داليا.

-طب بيقي نحترم نفسنا بقى ونتلم كدا.

=حاضر يا سمير.

-سمير حاف كدا، دااااين تداااان، حسيبي الله، يارب دا بيترية عليا انتقملي منه يا رب.

=باس باااااس، يا أستاذ سمير، يا سمير بي، خلاص بقى يا أخي.

-خلاص يا رب، أنا مسامحه يا رب.

=أصيل يا أبو سمرة، أبو سمرة بي طبعاً.

- جدع یاد یا ماجد.

عاد ماجد وسمير إلى المنزل، في فرحة فيها هي الامتحانات
تنقضي ويأخذ ماجد إجازة آخر العام، فلا يوجد مذاكرة بعد اليوم،
ولقد أبلى بلاءً حسناً في الامتحانات، وأخيراً قد صرخ بحبه لحبيبه
مريم، وأخبرها أنه يريد الارتباط بها، ووافقت في الحال.

كان ذلك اليوم بمثابة أسعد الأيام التي قضاها ماجد في حياته
منذ ولادته لم يعكر صفو يومه إلا عندما عاد إلى المنزل ودخل فوجد
أباه جالساً، على غير العادة، ففي مثل ذلك التوقيت يكون في مصنع
الكرتون الذي يعمل به.

دخل وسلم عليه، وأخبره أنه أبلى بلاًء حسناً في الامتحانات، وأنه في انتظار النتيجة، ومن ثم دخل على أمه المطبخ ليحكى لها ما حدث له اليوم في الامتحان وما حدث مع مريم، ويأخذ رأيها لكنه وجدها مهمومة وعندما سألها عن حالها أحياناً في حزن:

-الحمد لله كويستة، بس يابا مش كويست.

-لا بعد الشر عليه، يأيا ساب الشغل.

= يعني إيه ساب الشغل؟

-النهاردة قالوله إنه هيخرج معاش مبكر، عشان بدأوا يمشوا الموظفين والعمال عشان يقللوا النفقات أنت عارف المصنع مبقاش يكسب زي الأول بعد ما الحال بقى وحش والأسعار اترفعت.

=بس بابا بقاله ٢٠ سنة شغال معاهم.

-هو كدا الشغل الخاص يا ماجد ملوش أمان، هما خيروه بين إنه يكمل بنص مرتبه، أو إنه ياخذ مكافأة نهاية الخدمة ويمشي.

=طب وعمل إيه!

-أبوك مستحملش حد يكسره، فقرر يمشي.

=طب وبعدين؟

-ولا قبلين، ادوله ٣٠ الف مكافأة نهاية الخدمة ومشي.

=خدمة ٢٠ سنة ياخذ عليهم ٣٠ الف! ودول هي عمل بيهم إيه!

-دول مش هيكلوا معانا سنة، وبعد كدا هنشحت.

=طب والعمل؟

-العمل عمل ربنا، اطلع اقعد معاه واتكلم متحسسوش إن فيه حاجة عشان هو شايل في نفسهاوي، وأنا خايفة عليه، أبوك ضغطه بيعلى وربنا يسترها.

=حاضر حاضر متقلقيش إن شاء الله خير.

يخرج ماجد ليتحدث مع أبيه، ويواسيه ببعض الكلمات، قائلاً:

= جرا إيه يا عم سيد هم اللي خسروك أنت مش عارف قيمة نفسك ولا إيه؟

حاول أن يشد من أزره، ولكن يبدو أن كلمات المواساة أحياناً لا تفيد، فبعض الأحداث لا ينفع معها تلك الكلمات الباردة التي تسمى موالاة فهي لا تغنى ولا تسمن من جوه، فالجرح لا تشفيه كلمة سلامتك، والآلم لا تهونه كلمة معلش.

دخل ماجد الغرفة وجلس يفكر كيف يساعد والده فهو قد أنهى دراسته حالياً ولكنه لا يستطيع أن يعمل بعد لأنه ما زال في انتظار الكشف الطبي للجيش، جلس ماجد يفكر كثيراً حتى شعر بصداع نصفي كاد أن يفتكر بالنصف الأيسر من رأسه.

حينها طلب من سمير أن يحضر له قرصاً مسكنأً للصداع، لأن رأسه تكاد تتفجر من التفكير، الذي يقوده إلى اللاشيء، سكت سمير حينها وباغتهة بسؤال يحمل بين طياته جدية غير معهودة من سمير:

- ماجد هو عم سيد ما يعير فش يعمل حاجة أو مش متميز في حاجة غير شفله اللي في المصنع؟

= يعني إيه؟ تسائل ماجد متعجبًا.

- يعني مكنش ليه صنعة أو بيحب حاجة ومتميز فيها، يعني أنا أبويا الله يرحمه كان بيعشق الكهرباء، كان بيصلح أي حاجة، كان بييفك ويركب أجهزة، كان بيجمع حطة من الجهاز ده، على حطة من الجهاز دا ويعمل جهاز جديد، كان شاطر جداً في الحاجات دي.

=مش عارف أبويا بقاله ٢٠ سنة بيشتغل في المصنع مشوفتوش
ييعمل حاجة مختلفة.

سكت ماجد وسمير قليلاً ومن ثم انتفض ماجد من على السرير
فائلأ:

=افتكرت، بابا أحسن واحد بيعمل كبدة، في مرة كانت ماما
تعبانية وهو اللي عمل يومها الأكل، كانت أطعم كبدة أكلناها في حياتنا
حتى الناس اللي جم يزورو ماما اليوم دا داقوها ومكنوش مصدقين
إن إحنا مش شارينها وإن بابا هو اللي عملها.

-طب وهو اتعلم طريقة عمل الكبدة دي فين؟

= ساعتها لما استغربنا هو ازاي بيعملها حلو كده، قالنا إنه بيعملها
بأكثر من ٥ طرق، وقالنا إنه وهو في الكلية كان بيشتغل مع واحد
صاحب محل كبدة، كان راجل اسكندراني فاتح محل في وسط البلد،
كان بيحب أبويا أوي وعلمه سر المهنة، مكنش عاوزه يسيبه وكان معتبر
سيد دا ابنه، مكنش عنده غير بنت واحدة اتجوزت وسافرت ومراته
ماتت، وكان كل حياة عربية الكبدة.

-طب وحصل إيه؟

= في يوم من الأيام، جت المصنفات وكسرت عربية الكبدة، ولمت
الحاجة، ساعتها الرجل مستحملش يشوف مشروع حياته اللي كان
بيضيع فيه وقته وكان بيقابل فيه زبانيه، اللي بقوا أكثر من أصحابه
وعشرة سنين بينهار قدام عينيه، جاتله ذبحة صدرية ومات، من

ساعتها أبويا مبقاش بيعدي في الشارع ده، المكان دا ارتبط بأسوأ ذكريات في حياته، خصوصاً إنه كان بيعتبره زي أبوه، أبوه اللي مات وهو عنده ٨ سنين.

-بس لقيتها هي الكبدة.

= يعني إيه!

-هندفع عربية كبدة وهنسميها كبدة السيد أصل الكبدة في مصر.

= أنت عبيط يا ابني؟

-أنا بتكلم بجد، إحنا هنعمل عربية كبدة، وهتكسر الدنيا.

= عربية كبدة إيه بس! أبويا مش هيوافق طبعاً.

-اكيد مش هيوافق لوقناله هندفع عربية كبدة.

= أمال هنقوله هندفع عربية إيه؟ كتاب وكفتة!

- بلاش استظراف، إحنا هنعمل عربية كبدة مودرن، هنسسيطر على سوق الكبدة في مصر، كبدة السيد في أقل من سنة هتبقى رقم واحد في مصر، أنت مش بتقول أبوك أحسن واحد بيعمل كبدة ولا بتحور علياً!

= والله أحسن كبدة هتاكلها في حياتك.

- خلاص سيبلي أنا الموضوع ده، مش أبوك أخد ٣٠ الف مكافأة
نهاية خدمة؟

= ٥١.

- تمام سيبني أفكروأعملك دراسة جدو وأقولك هنعمل إيه.

يجلس سمير حينها مع نفسه يفكر في دراسة جدو مناسبة مع المشروع، يدرس الموضوع من كل جوانبه، المكان، والعمالة، التكاليف، طرق الدعاية، يبدأ في رسم كروكي لشكل العربية التي سيبيع فيها الكبدة، اختار المكان المناسب، بحث عن أماكن مضمونة لشراء الكبدة البلدي الطازجة بأسعار مناسبة، العمالة، في البداية يحتاج إلى ثلاثة في بداية المشروع، أخذ سمير الأوراق وذهب إلى ماجد قائلاً:

- خلاص لقيتها.

= هي إيه.

- بص يا سيدي، أنا عادة عمري ما بتكلمش معاك جد، بس النهاردة الموضوع كله جد.

= في إيه يا ابني قلقتني.

- إحنا هنفتح عربية كبدة، في كايرو فستيفال سيني.

= نعم أنت عبيطا!

- اصبر بس، أنت نسيت لما روحنا وكان فيه عند النافورة الراقصة هناك عربيات أكل!

= اه فاكر بس دي كانت مطاعم عالمية.

- ولا عالمية ولا حاجة، الأسامي بس أجنبي وأنت عشان حمار في الإنجليزي فافتكرت إنها مطاعم عالمية.

= حمار! يا أخي احترم نفسك بقى.

- مش موضوعنا دلوقتي، أنا بعتهم، وبعتهم تصميم العربية، وهما عاوزين يقابلونا.

= نعم!

- مش دي المشكلة، المشكلة إن العربية هتكلف حوالي ١٠ ألف جنيه بال حاجات اللي هنعمل فيها الأكل.

= طب ما الفلوس بتاعة المكافأة ٣٠ ألف.

- أنا كنت متوقع الكلام دا من واحد سطحي زيـك.

= يا ابني احترم نفسك.

- بص يا ماجد المول هيأخذ ٢٠ الف تأمين، هما كانوا عاوزين إيجار سنة مقدم بس أنا بعتهم ميل استعطفتهم وحكت لهم القصة دي، وعرفتهم إني هكتب بوست على الفيس بوك هحكي فيه موقف المول معانا وكده.

= وهما قدروا الظروف بتاعتـنا طبعـاً.

-لا هما وافقوا لما قولتهم هنكتب بحسب مدى طيبتهم وحننتهم
وقفهم جنبنا في قصة الكفاح دي.

=ممممم، .. مفيش حد بي عمل خير أبداً يا جدع.

-المهم كدا يبقى الـ ٣٠ ألف ضاعوا.

=هو المشروع كله هيتكلف كام!

-يعني بعد ما ظبّطت كل حاجة وقرّطت على نفسنا في المصارييف
هيتكلف ٣٣ ألف دا غير تمن البضاعة اللي هنبدأ بيهَا طبعاً.

=طب إحنا معتقدش معانا في البيت ٣ آلاف.

-ممكّن نستلفهم.

=لا بابا ما بيحبس يستلف ملييم من حد.

-تمام يبقى الموبايل.

=موبايل إيه.

-هندبيع الموبايل بتاعك، بعد التعوييم بقى سعره ٥ آلاف يعني لو
يعناه مستعمل يعمل بالميّت ٣ آلاف.

=أبيع موبايلي، أنت مجنون!

-خلاص يبقى نقطع الورق واطلع اقعد جنب أبوك بالفانلة
الحملات بقى.

= خلاص خلاص هبيعه.

- تمام باقي آخر نقطة.

= إيه كمان!

- الدعايا.

= ازاي؟

- هنعمل بوسٌت ع الفيس بوك، واحد صاحبك هي عمله، أنا هكتبهولك، بطريقة جذابة عن حلاوة وطعمامة وجمال ونضافة كبدة السيد.

= بس كدا!

- لا مش بس، هنجيب عيل انفلونسر من العيال اللي بتروح مطاعم وتتصور هناك صدفة وتمدح في أكل المكان دا وتعملنا فيديوهين في العربية بتاعة الكبدة، هما بيحبووا يعملوا فيديوهات في العربيات فإحنا هنخليهم يعملوا فيديو في عربية الكبدة بتاعتنا وفي آخر اليوم نديهم ٥٠٠ جنيه وسندوتشين كبدة ومخلل زيادة.

= وهما هيرضوا؟!

- يا ابني دي شغلانتهم، وبعدين ليهم متابعين كتير وعيال أندرايدج هي جوا يقلدوا الانفلونسر بتاعهم ويأكلوا كبدة زيه.

= دي طريقة ناجحة يعني؟!

-يا ابني دا الماركتنج الجديد.

= طب كدا فيه حاجة تانية؟!

-اه فيه، آخر حاجة، العمالة.

= هنجيبهم منين؟

-أبوك هيبيقى الشيف، هجيبله يونيفورم محترم، وأمك هتساعده
في تجهيز الحاجات في البيت.

= تمام.

-لا مش تمام محتاجين واحد تالت عشان لو فيه ضفت شغل
وعشان يجهز الأوردرات ويبتسم ابتسامة سمنجة وهو بيدي الأوردر
للزبون ويقوله كلمتين إنجليزي مصرى مكسرین.

= مش فاهم.

-أنت هتشتغل معاهم وهتقف في المول وتبيع.

= لا دا أنت مجنون بقى فعلًا، لا فاكس فكك من المشروع دا.

- اسمع مني بس.

= انت عبيط يا ابني!! أقف أبيع كبدة! أنا مهندس اتصالات يبني،
أنت عاوز أصحابي يسموني «ماجد كبدة».

-مش أحسن ما يسموك ماجد العاطل، ماجد الفاشل، ماجد اللي
أبوه قاعد جنب أمه.

= انسى شوف مشروع تاني وبعدين بابا مش هيواافق.

- أبوك هيوافق عشان هو بيحب الشغل ومبيحبس قعدة البيت، ولو
وريته دراسة الجدوى دي هي عملها فوراً، صدقني المشروع دا لو اشتغل
هيجب تكاليفه في أقل من شهرين وهينقلكم نقلة تانية، مصر ما
ينجحش فيها غير حاجتين، محلات الاكل، والقهاوي والكافيهات.

=مش هعمل أنا كدا المهندس ماجد ما يشتغلش بتاع كبدة.

-المهندس ماجد المهندس ماجد، فلقتنا بالمهندس زفت، أنت
فاكر نفسك هتشتغل فين؟! أنت بكرة تدخل الجيش وتشتغل سيكا
عند القائد تفسله غياراته أو تنزل تجيب لمراتة الخضار من السوق،
أو تودي عياله المدرسة، أنت فاكر نفسك هتدخل الجيش تمسك قائد
كتيبة؟!

وبعدين لما تخرج من الجيش أنت فاكر نفسك هتشتغل إيه؟
مهندس ب ٢٥٠٠ جنيه في أي شركة، وهتبقى عقد مؤقت، مش متثبت
ممكنا تتألش في أي وقت، هتشتغل في مصنع ١٠ ساعات ومواصلاتك
هتبقى ٤ ساعات هترجع ع النوم وهتصرف فلوسك في الأكل برة
البيت. ولا هتجوز مريم ولا هتخطبها حتى، ولو خطبتها هنعمل
فر حكم في دار مسنين إن شاء الله وانتوا على اعتاب الستين.

-طيب براحتك بقى أنا عملت اللي عليا، أنا هقوم أنام تصبح على خير.

=وانت من أهله يا عم، قال كبدة قال ، غلبان أوى الواد سمير ده، هكذا قالها ماجد بسخرية ومن ثم غط في نوم عميق.

تمر الأيام ولا جديد، ينتظر ماجد نتيجة السنة النهائية لكي يصبح مهندساً رسمياً، ولا يزال والده يبحث عن عمل بلا فائدة، فإما مرتب هزيل لا يتناسب مع خبرته وسنّه، وإما تغلق المصانع الباب في وجهه بحجة أن لديها عمالة زائدة ولا تحتاج إلى عمالة بسبب قلة الإنتاج وركود البيع في السوق المصري في تلك الحقبة الزمنية التي جاءت بعد اتخاذ السيد الرئيس قرار تعويم الجنيه المصري ورفع الأسعار، وفرض ضرائب ومعوقات كثيرة على المصنعين والمستوردين.

يرى ماجد الأوضاع تسوء أكثر فأكثر، كيف سيتقدم لخطبة مريموها هو والده الذي كان من الممكن أن يساعد له قد ترك عمله، وأصبح بلا وظيفة، بالطبع سيظلمها معه، فهو سيقضى على أقل تقدير سنة في الجيش، ومن ثم يخرج بعدها ليبدأ طريق كفاحه المظلم الذي لا يعرف له بداية.

ففي أحد الأيام بينما كان ماجد يقوم بترتيب المكتب، فكان يجمع الكتب والمذكرات في أحد الأكياس ليضعها أسفل سريره لكي يصبح المكتب خالياً من كل أوراق الدراسة التي ذهبت بلا عودة إن شاء الله، وجد حينها ورقة قد كتب فيها بحبر واضح تلك المرة العبارة التالية

«المرونة وفهم الآخر هي مفتاح النجاح، كلما عملت أكثر كلما عشت أكثر وفهمت الحياة أكثر فأكثر، لا تخجل من شيء فقط لأن المجتمع يرفضه أو يستنكره، فعندما تتحقق مرادك وتنجح فيما تسعى له، سينسى المجتمع كل هذا ويتحول ذلك الرفض إلى فخر ومثل أعلى»

قرأ ماجد تلك العبارة مرات عديدة وتدبر معانيها، لا يعرف من كتبها ولم كُتب، ولكن كل ما جاء بها كان منطقياً، يقبله عقله وتميل له روحه.

خرج ماجد ليجلس مع والده، والده الذي أصبح يجلس في المنزل طيلة اليوم، قد ساء مزاجه وتحول إلى شخص عصبي، لا يعجبه أي شيء دائم الانتقاد فيمن حوله، قد فارقت ابتسامته الجميلة وجهه، ضحكته التي كانت تهز أرجاء المنزل كاشفة عن ضرسه المخلوع قد اختفت تماماً.

ولكن الكل كان يلتمس له العذر، فما يحدث منه ما هو إلا بسبب تركه لعمله، الذي كان يقضي به معظم وقته، بالإضافة إلى شعوره بلا فائدة بعد إن كان بمثابة القبطان الذي يقود السفينة إلى بر الأمان.

حينها فكر ماجد في عمل شيء يساعد به والده، ولكن سرعان ما تذكر أن ما باليد حيلة، فهو لا زال غير قادر على العمل للمساهمة في مصروف البيت، ولا يمتلك أي شيء يقدمه له.

لكنه تذكر الكلمات التي قرأها في الورقة التي وجدتها تلك المرة في المكتب، تذكر كلام سمير عن ذلك المشروع الذي من الممكن أن يحقق لهم آمالهم وأحلامهم.

دخل حينها ماجد غرفته وقام بفتح النور وأغلق الباب من خلفه وأحكم الغلق وفتح المكتب ونادى على سمير قائلاً:

=سمير، سمرة حبيبي.

استيقظ سمير متثائباً وقال له في كسل:

-خير! عاوز إيه من زفت؟

=بقولك إيه هو أنا هشتغل كام ساعة في اليوم؟

-تشتغل في إيه؟

=عربية الكبدة

-بجد؟ يعني وافقت؟

=مم يعني.

-حبيبيبيبي، أنا قولت برضه إنك مش هتسيب أبوك كدا ولازم هتساعده.

=المهم أنت متأكد من نجاح المشروع دا؟

-بعد إن شاء الله طبعاً، متأكد بنسبة ١٠٠٪.

= طب هنبدأ ازاي وهنقنع بابا ازاي؟!

- بص يا سيدى، دي دراسة الجدوى اللي عملتها وشارح فيها كل حاجة، هتديهاله وہتشرحله الكلام اللي هقولهولك دلوقتي بالنص.
= تمام.

وبالفعل يأخذ ماجد الورق من سمير ويستمع إليه بإنصات شديد، يفهم منه إليه عمل المشروع وكل تفاصيله حتى يتمكن من الإجابة على أي سؤال قد يسأله له والده.

يذهب ماجد إلى والده ويعرض عليه فكرة المشروع وأبعاده، ترسم ابتسامة بالغة على وجه والده، فقد تذكر أيام الشباب حينما كان يعمل مع الشيف محمد الإسكندراني، ذلك الرجل الطيب الذي كان يعامله كواحد من أبنائه وعلمه سر المهنة ولم يدخل عليه قط.

لم تكن تلك الابتسامة بسبب تذكره أيام الشباب فقط، ولكنه شعر بأنه عرف كيف يربى ابنه، شعر بأمان بالغ لأنّه أحس أن وراءه رجلاً قد يستند عليه وقت الحاجة، فذلك الطفل الصغير قد كبر سنه ورجح عقله وصار يفكر ويدع.

أعجب أبو ماجد بالفكرة وتحمس لها تحمساً شديداً وقرر حينها البدء فوراً في تنفيذ المشروع، فتحدث حينها مع صديق له يمتلك ورشة نجارة وعرض عليه الفكرة لكي يصمم له عربة مودرن تجذب العيون، ويحاول أن يخفض له في الأسعار قليلاً.

وقام بشراء أدوات الطبخ والبهارات، وقام بعمل تجارب واستطلاع رأي عن أفضل طريقة لديه لعمل الكبدة، حتى استقر في النهاية على طريقة واحدة، بدأ ماجد ووالده في العمل بعد حوالي أسبوعين، قد قضوا تلك المدة في تجهيز العربة واستخراج الشهادة الصحية وإجراءات التعاقد مع المول.

وبعد الانتهاء من تلك التجهيزات والبدء في العمل، كانوا يعملون يومياً ما لا يقل عن ١٠ ساعات، وكانت أمه تساعدهما من المنزل، تقوم بغسل الكبدة وتتجهيزها وتقطيعها، ويقوم أبو ماجد بعمل الخلطة وتتبيلها، أما ماجد فكان يقوم بحفظها في الثلاجة ونقلها هو ووالده إلى المول حيث يتم تجهيزها على النار لكي تباع للزبون طازجة وساخنة.

وفي أحد الأيام كان ماجد يجلس حزيناً في غرفته بعد يوم عمل طويل، وعندما وجده سمير في تلك الحالة سأله عن سبب ذلك الحزن فأجابه قائلاً:

= بكرة النتيجة، أنا كنت واعد مريم إني هروح لها أحدد معاد مع باباها، أنت شايف الظروف اللي بقينا فيها، حياتي مش مستقرة، ومستقبلني مش باينله ملامح، يظهر إني كنت غلط لما ماسمعتش كلامك.

- بس أنت بتحبها! وهي كمان بتحبك.

= الحب مش هيحب لنا شقة ولا هييجوزنا، الحب حلو، بس مابيأكلش عيش ولا بيفتح بيت يا سمير.

-طب هتعمل إيه؟

=ربنا يوفقها ويكرمها، أنا قدامى ولا ٥ سنين عقبال ما أقدر آخذ خطوة، هفضل مقعدها جنبي كل ده، أنا خايف نعمل فرحتنا في دار مسنين زي ما كنت بتقولي.

-بس أنا كنت بهرج معاك، محدثش عارف بكرة مخبي إيه.

=ما هو عشان محدثش عارف وعشان بكرة في مصر بيبقى أسوأ من امبارح فأنا هنسحب في هدوء.

-يعني إيه؟

=أنا كنت متفق معها إن يوم النتيجة هنزل وأحدد معاد مع باباها، ولو منزلتش بيبقى خلاص، هي عارفة إن أمري مش متقططة، وأنا مش عاوزها تعاني معايا.

-طب والنتيجة؟

=أي حد هيجبهالي وأنا متأكد إني مش هقل عن جيد جداً زي كل سنة.

صباح اليوم التالي :

تذهب مريم إلى الكلية، وقد ارتدت ثوبها الجديد، فتلك هي المرة الأولى التي ستقابل فيها ماجد بعد أن صرخ لها بحبه وأنه يريد خطبتها والزواج منها، فاليوم سيتفقان سوياً على ميعاد مقابلة والدها

ليتقدم له ويطلب خطبتها، وقفت مريم في انتظار أن يقوم العاملون بتعليق النتيجة، حينها قامت بالبحث عن اسم ماجد أولاً لطمئن على درجاته، فوجده قد نجح بتقدير جيد جداً، ومن ثم تتبع الأسماء حتى وجدت اسمها، مريم على أحمد عبد الرحيم، وقد حصلت على تقدير امتياز.

كانت الفرحة تغمرها، لا لنجاحها وحصولها على تقدير امتياز ولكن لنجاح ماجد، فهو الآن أصبح مهندساً، ولا يوجد عائق بينه وبين التقدم.

انتظرت مريم ماجد كثيراً ولكنه لم يصل، ولم تلمحه، وجدت أصدقاءه كلهم ولكنه لم يكن بينهم، بحثت عنه بعينها في أرجاء الكلية فلم تجده، انتظرته كثيراً، لكنه لم يأتِ، لا تعرف ماذا حدث له، بدأ القلق عليه يتسلل إلى قلبها، فهل من الممكن أن يكون قد أصيب بأذى؟! هل حدث له مكروه ما؟!

كانت تخجل من أن تسأل أحد أصدقائه عليه، فهي لم تفعل مثل ذلك الأمر من قبل، ولكن الساعة الآن الرابعة، وقد أمضت في انتظاره منذ تعليق النتيجة على اللوحة حوالي أربع ساعات.

حينها قررت أن تسأله أحد أصدقائه ولا يهم ماذا سيقول، كان سؤالها عليه حتى يطمئن قلبها أنه بخير، فسألت حينها أحد أصدقائه في خجل شديد قائلة:

- ازيك يا أحمد، كنت عاوزة أسألك هو ماجد مجاش النهاردة؟!

فأجابها أحمد قائلاً:

= تقريباً اتخايلت بيه الصبح بس مش عارف راح فين؟! تلاقيه
خرج مع الجروب بتاعه.

لم يكن أحمد متأكداً من إجابته، ولكنه مصرى أولاً وأخيراً، يجب
أن يجيب على أي سؤال سواءً عرف إجابته أم لا.

فقالت له في توتر وهدوء:

- تمام شكرًا يا أحمد، أنا كنت هديله حاجة كان نسيها في المدرج
في آخر يوم امتحانات.

= تمام هاتي أنا أديها له مفيس مشكلة.

أجابته في توتر وهي تصرف:

- لا لا مش مشكلة هبقى أديها له أنا.

لم يكن يعلم أحمد، أن ما نسيه ماجد مع مريم هو وعده لها، أنه
سيأتي يوم النتيجة، سيأتي ويتحقق معها على ميعاد مقابلة والدها بعد
أن يضبط أمره؛ لكنه لم يأتِ.

ظللت الأفكار تدور في رأسها، هل من الممكن أن يكون قد غير
رأيه؟! أو وجد أنه يحتاج إلى وقت أكثر، أو أن أمره ليست على ما
يرام ولن يستطيع أن يقدم على تلك الخطوة.

أيًّا كان السبب فالهروب ليس هو الحل، لماذا لم يأتِ ويصارحها
أيًّا كان السبب، فالمواجهة بصدق أفضل بكثير من جعل الأمور عائمة،
على الأقل كان سيتيح لها الفرصة أن تبدأ حياتها من جديد، غير
عاقدة أي آمال على عودته يومًا ما.

عادت مريم في ذلك اليوم إلى منزلها، والدموع تملأ عيونها، لم
تفرح ذلك اليوم بنتيجة، عادت والحزن يملؤها بالرغم من حصولها
على تقدير امتياز، حين رأتها والدتها حسبتها قد رسبت في إحدى
المواد أو في السنة كلها، فهيئتها وشكلها كانا يوحيان بذلك، ولكنها
عندما عرفت أنها حصلت على تقدير امتياز، أحسست بفحة في قلبها،
تلك المرة ليس خوفاً على النتيجة ولكن خوفاً على ابنتها.

في نفس الوقت اتصل أحد أصدقاء ماجد لكي يطمأن عليه ويخبره
بتفوقة نتنيجته، لم يفرح ماجد كثيراً حينها وكأنه أمر عادي، وسأله
بكل لهفة قائلاً:

= ماتعرفش مريم اللي معانا في السكشن عملت إيه؟

فأجابه صديقة مندهشاً:

- لا معرفش طبعاً، تلاقيها جابت امتياز، أنت عارفها دجاجة.

= يا أخي قول ما شاء الله.

- بس اشمعنى مريم اللي بتسائل عليها؟

= عادي يا عم.

-لا مش عادي اشمعنى بجد؟

=عشان دحاحة، ارتاحت كدا؟

-هاهها، آه، طب قول ما شاء الله.

=ما شاء الله، أنا هقف عشان عندي شغل.

-شغل؟ أنت شغال فين؟

=هقولك بعدين، سلام يا صاحبي.

-ماشي، هنتقابل وهتقولي، سلام يا صاحبي.

لم يفرح ماجد هو الآخر بنتيجه، وكأنه لم يوفق في هذا العام، كان على وجهه بؤس وعبوس، كان يفكر في مريم، ماذا فعل بها ، كيف خذلها، ولكنه كان يظن أنه تصرف التصرف الصحيح، فلا يجب عليه أن يعلقها به وهو غير قادر على الارتباط في الوقت الحالي، لا أحد يعرف متى ستتحسن ظروفه، ومتى سيصبح قادراً على الزواج، ولكنه قرر أن يشغل نفسه بالعمل ليلاً نهاراً، فلقد بدأ مشروعه هو والده، ويحتاج كل ذرة عرق وتعب حتى يتمكن من إثبات نفسه.

لم يكن يعلم أن المواجهة أصدق من الهروب وأكثر صحة، الصراحة برغم قسوتها تكون أفضل وأكثر صحة بكثير، غلق الباب يكون أفضل أحياناً من جعله موارباً، لا هو مفتوح يسمح بالدخول ولا هو مغلق يحقق السلام والأمن.

مرت الأيام وماجد يعمل مع والده، ليلاً ونهاراً، قاما بعمل إعلانات ودعایا على موقع التواصل الاجتماعي، أخبر ماجد كل أصدقائه أنه يعمل على عربة الكبدة، ذلك المشروع الصغير الذي بدأه والده ولا أحد يساعدته فيه إلا ابنه المهندس، لم يعد ماجد يخجل من العمل، فما دام العمل شريفاً لا يوجد شيء يجعله يخجل.

كان سمير يقف مع ماجد ويجلب له الأفكار التسويقية ويساعده في انتشار أخبار تلك العربة الصغيرة التي تنتج أطعمة كبدة في مصر، ذاع صيت كبدة السيد في القاهرة الكبرى فأصبحت الناس تتواتد من أماكن بعيدة لتذوق تلك الكبدة التي صنعت بكل مهارة وحب.

وفي غضون شهور قليلة، قام أبو ماجد بالتوسيع وتحولت العربة إلى محل في هذا المول، بدأت الأموال تتدفق عليهم، وحاول العديد من المستثمرين المشاركة مع أبي ماجد للتوسيع، وأن تصبح سلسلة محلات بدلاً من محل واحد.

وبالفعل وافق أبو ماجد، وتم فتح عدة فروع لمحل «كبدة السيد» في أقل من عام. كانت الناس تتدفق بالمئات على فروع المحل في القاهرة والجيزة، وبعد أن بدأ المشروع بعربة كبدة، تحول إلى سلسلة محلات يمتلك أبو ماجد نسبة كبيرة فيها ويشاركه بعض المستثمرين.

في تلك الفترة اشتري أبو ماجد شقة جديدة، وقرر ترك شقتهم القديمة، فبعد أن فتح عليه الله، قرر ترك ذلك المنزل القديم، من كان يعرف أن يصل أبو ماجد إلى كل تلك الشهرة وتتدفق عليه

الأموال، فبعد أن أسودت الدنيا في وجهه وظن أنها نهاية العالم بعد أن خرج من المصنع معاشاً مبكراً، لم يكن يعرف من أين سيبدأ أو كيف، يرزقه الله رزقاً ونجاحاً من حيث لا يحتسب، ففي تلك السنة قد حقق نجاحاً وأموالاً تفوق تلك التي حققها في حياته كلها.

فاليآن أصبح له مطبخ يشرف هو على تجهيز الكبدة فيه، والآن لديه أكثر من ٣ فروع في مناطق راقية في القاهرة، يعمل بها أكثر من ٤ موظفاً وشيف وكاشير.

فسبحان الله الذي قطع رزقه من مكان، لكي يرزقه رزقاً طيباً مباركاً و يجعله سبباً في توظيف أكثر من ٤٠ شخصاً آخر، الآن ماجد أصبح مديرًا للفروع، لم يعد ذلك الشاب الذي يقف ويقدم الوجبات للزبائن، يمسح الطاولات ويفسّل الأواني التي تم طبخ الكبدة فيها.

أصبح دوره الآن هو مراقبة الجودة والخدمة، ومحاسبة المقصرين، التعاقد مع الموردين وإدارة الدعايا الخاصة بسلسلة محلات، في أقل من عام أصبح ماجد وظيفة تدر عليه آلاف الجنيهات شهرياً، بالإضافة إلى ذلك المرتب الضخم، فهو يعمل في ماله، ومشروعه الخاص هو والده.

كان يقضي ماجد معظم وقته في العمل، وبالرغم من تلك الأوقات الطويلة في العمل إلا أنه ما زال يفكر في حبه القديم مريم، لا زال قلبه ينبض عندما يرى واحدة تشبهها، أو عندما يسمع اسمها.

بل كان يتخيل وجهها البريء في وجوه البنات التي تمر أمامه ، فلو كان يعلم ما سيحصل له في وقت وجيز لأخذ تلك الخطوة منذ عام ولم يخذلكا، بالطبع قد خطبت، ومن الممكن أن تكون قد تزوجت وأنجبت أول أولادها، بالطبع سيشبهها في جمالها وبرائتها.

عاد ماجد إلى المنزل حزينًا يفكر في مريم، التي لم ينسها يوماً منذ أن رأها في جامعته، دخل المنزل كان خاوياً من أغلب أثاثه. إن لم يكن كل أثاثه، قامت أمه بتوزيعه على المحتجين ، فكلها أيام معدودة وسينتقلون إلى بيته الجديد بأثاثه الجديد.

فتح غرفته ليجد المكتب قد وضع جانباً وبجانبة مرتبة صغيرة لكي ينام عليها هذا الأسبوع فقط استعداداً للانتقال إلى المنزل الجديد، جلس على مرتبته، وأسند ظهره على الحائط يفكر في اللا شيء، يبدو أن يومه كان صعباً ما بين عمل وتفكير ذهني، لم يقو حتى على تغيير ملابسه.

خرج سمير من المكتب ليجد ماجد على تلك الحالة، فيبادره بسؤال:

-لسه بتفكر فيها يا ماجد!

أجايه ماجد في تعجب:

= هي مين؟

-مريم، هو فيه غيرها!

= أنت عرفت منين!

- يا ابني هو أنا لسه عارفك النهاردة! إحنا عشرة يا ميجو.

= اه يا سمير لسه بفكر فيها، النهاردة شوفت واحدة شبهها، فكرتني بيها، فكرتني بيها أكثر، أنا عمري ما نسيتها يا سمير، وحساس إني فرطت فيها، بس كان غصب عنى.

- لا يا ماجد أنت فرطت فيها، ومكنش غصب عنك ولا حاجة.

= أنت بتقول إيه!

- بقول اللي أنت مش عاوز تسمعه، بقول الحقيقة والواقع.

= ازاي يعني فرطت فيها! أنا ماحبتش حد غيرها ولا هحب حد غيرها!

- التفريط مش معناه إنك مابتحبهاش، التفريط والخذلان ممكن يكون بسبب جبنك، خوف من المستقبل، خوف غير مبرر.

= بس أنا كنت خايف أظلمها معايا.

- ظلمتها بعيد عنك، في النهاية كانت المحصلة إنك كدا كدا ظلمتها، مش معنى إنك مش شايف حزن الشخص، إنه مش حزين، مش معنى إنك غمضت عينك وقت حصول المصيبة ومشوفتهاش إنها محصلتش.

= كنت عاوزني أعمل إيه!

-تواجه، كان لازم تروح وتكلمها تفهمها، تسمع منها تحكيلها ظروفك بكل صدق، يمكن كان عندها كلام كتير يطمئنك، يمكن كان ليها رأي تاني، بس أنت غمضت عينك، يمكن كانت هي اللي خلصت الموضوع، وكان اختيارها، ومكتش زمانك دلوقتي بتتعذب عذابين، عذاب إنك ظلمتها، وعذاب إنها مش معاك، كان هيبقى وضعك أحسن بكثير.

=أنت أكتر واحد كنت معايا وعارف الظروف.

-الظروف! أنا بستغرب منكم كبني آدمين، خايفين من المستقبل وانتوا مش عارفين هتعيشوا ولا لا، بتشيلوا هم بكرة ولسه النهاردة مخلصش، خايفين من اللي جاي وهو باید ربنا، بتعملوا حساب للناس وكلامهم وهم مش هينفعوكم، العيب عندكم أكبر وأعظم من الحرام.

نسيت ساعة ما أبوك ساب الشغل، الحياة كانت مسودة ازاي في عينك، حتى أبوك كان مكتئب، مكتش مصدق إنه بعد ما قضى ٢٠ سنة في المصنع، اداله من وقته وعرقه وراحة باله، إنه في يوم وليلة يتخلوا عنه، وكان صاحب المصنع هو اللي بيরزقه، مش وسيلة لرزقه، وسيلة باید ربنا اللي بيরزق الكل.

نسيت مكتش راضي تشتعل ازاي وكنت خايف الناس تقول عليك إيه؟! فين الناس اللي كنت خايف منها! دلوقتي بتقولك يا ماجد بيه! مش كدا! دلوقتي مبقتش ماجد كبدة، بقيت ماجد الناجح اللي عنده مشروع، مش كدا! لو كنت فضلت خايف كان زمانك زي ما أنت، كنت خايف تدخل جيش وتضيع سنة، اديك أخذت إعفا، كنت خايف من حاجات كتير.

الخوف مش وحش يا ماجد الخوف الزيادة هو اللي وحش، الخوف
بيخلينا ناخد حذرنا ونفكـر صح، مش بيوقفـنا.

= عندكـ حق بـس ملوـش لـازمة الكلام دـلوقـتي.

- يعني إـيه مـلوـش لـازمة؟

= يعني النـدم مش هـيرجـع مرـيم.

- وأـنت مـين قالـك إن مرـيم رـاحت؟

= أـكـيد اـتـخطـبـت ولا اـتـجـوزـتـ.

- وـإـيه اللي أـكـدـ الكلام دـا! شـايـفـ يا مـاجـدـ! بـرضـه بـتفـترـضـ الأـسوـأـ
وـتـخـليـه يـوـقـفـكـ.

= قـصـدـكـ إـيهـ؟!

- قـصـديـ إن مرـيم مـمـكـن تكون لـسـه مـسـتـنيـاـكـ!

= إـيهـ! مـعـقـدـشـ.

- طـبـ جـربـ، حـاوـلـ، يـمـكـنـ تـطـلـعـ مـسـتـنيـاـكـ، وـيـمـكـنـ لاـ، مـتـأـخـرـشـ
تـانـيـ وـتـنـدـمـ مـرـتـينـ، اـعـمـلـ الليـ عـلـيـكـ، مشـ مـهـمـ إـنـكـ تـقـلـطـ المـهـمـ إـنـكـ
ماـتـسـتـمـرـشـ فيـ الغـلطـ، حـاوـلـ تـصـلـحـهـ، يـمـكـنـ عـشـانـ غـلـطـتـ أـولـ مـرـةـ بـسـ
نـيـتـكـ كـانـتـ خـيـرـ رـبـنـاـ يـوـقـفـكـ دـلـوقـتيـ.

= تـفـتـكـ! يـعـنـي اـرـوحـ لـهـاـ، بـسـ أـنـاـ مـعـرـفـشـ عـنـهـاـ أـيـ حاجـةـ، وـمـشـ
هـعـرـفـ أـوـصـلـهـاـ.

- يعني إيه! يعني خلاص كدا!

= شكلها كدا يا صحببي.

- اللي عاوز حاجة هيوصلها، أنت اللي هتوصلها المرة دي أنا مش
هساعدىك.

= اوصلها ازاي بس!

- حاول، اتعب نفسك، الموضوع مش صعب، اعرف عنوانها وروح
كلم باباها.

= ودة هعرفه ازاي.

- اللي عاوز حاجة بجد هيوصلها، تصبح على خير يا هندسة.

= ماشي يا سمير نام، اتخمد.

ظل يفكر ماجد كيف يصل إلى مريم، ظل يتذكر أصحابها، لم يكن لديها أصدقاء إلا منها، ومني، لم يرها قط مع أحد غير هاتين البنتين، منها كانت صديقة معتز صديقه، حينها كلام معتز وكانت الساعة الواحدة صباحاً، أيقظه من نومه وسألته في لهفة:

= معتز أنت لسه بتتكلم منها دفعتنا؟

- منها دفعتنا؟ أنت متصل ومصحبني من النوم عشان تسألني
عن منها!

= ياعم انجز وجاوب!

-لا ياعم مها اتجوزت ابن خالتها وسافرت معاه الكويت.

=مممممم طب تعرف مني اللي كانت معانا في السكشن، لسه
مخطوبة لمحمد حسن ولا لا؟

-لا ياعم فركشوا من زمان، أنت جاي تطمئن على دفعتنا دلوقتي؟
في إيه يا ماجد؟

=مفيش حاجة روح كمل نوم، سلام.

-سلام.

كيف سيصل لها إذاً، فلم يكن لديها حساب على الفيس بوك أما بالنسبة لصديقاتها الذي أرسل لهم رسائل على الفيس بوك أخبرنه بأن أخبارها قد انقطعت عنهم منذ عدة شهور وأن الحياة قد شغلتهم جمياً ولم يعد بينهم تواصل كما كان أيام الدراسة، حتى رقم هاتفها القديم لم يعد يعلم يبدو أنها غيرت ذلك الرقم القديم وكأنها لا تريد ان تتواصل مع أحد يذكرها بالجامعة وأيام الدراسة.

فقد الأمل، فهو دائمًا يهتز وي فقد الأمل مع أول عقبة، لا يثق في قدراته، يبدو أن كلام سمير عنه وعن بنى جنسه كان صحيحاً، أنسد ظهره ماجد على الحائط وغط في نوم عميق.

وفي تمام الثامنة أيقظته أمه لكي ينزل إلى عمله، فوالده ينتظره في سيارتهم الجديدة بالأسفل ولكنه كعادته كان نومه أثقل من الدين المصري الداخلي والخارجي، فصاحت فيه أمه قائلة:

-انت يا ماجد ... أنت يا زفت.

= إيه يا ماما في إيه!

-قوم يا ابني أبوك مستنيك بقاله ساعة تحت البيت.

= هقوم حاضر وبعدين أنا كبرت على زفت دي.

-كترت! أنت مهمما كبرت مش هتكبر على أمك.

= اكيد يا أمي انتي الخير والبركة.

-طب يلا قوم وتعال شوفلي ازاي أدخل أجيبي فاتورة تليفون البيت
من على النت.

= ادخلني على موقع المصرية للاتصالات واكتبي رقم التليفون.

-أدخل منين؟

= من البراوزر.

-وده فين؟!

= في الموبايل.

-طب طلعهولي أنت عارف أنا مبفهمش في الآيفوناوي، وقولت
لأبوك يجيبلي موبايل عادي، راح يجعلي آيفون اكس ويقولي أنا عندي
كام أم ماجد.

= ياسيدي ياسيدي، طب وريني كدا.

-امساك.

= إيه اللي انتي عامله دا في التليفون حاطاله خمس جرابات وست
اسكرينات! كل دا ليه!

- بحافظ عليه، أنت عارف دا بкам!

= مش قد التليفونات الفالية بت Shirleyها ليه!

- يعني اللي بي Shirleyها أحسن منا يا واد!

= ده انتي ناقص تجبيه وتعمليله حجاب.

- منا هعمل كدا بالليل رايحة لدكتور عظام يلفلي عليه جبس
وجبيرة عشان أبقى مطمئنة عليه.

= نعم! انتي بتهرجي؟!

- ما أنت تافه وبتربياً على امك، افتح شوفلي الفاتورة يلا وانجز.

= حاضر.

يفتح ماجد الموقع ويقوم بفتح صفحة الفواتير، يكتب رقم تليفون
منزلهم ليجد تفاصيل الفاتورة تظهر على الشاشة، فيعطي التليفون
لوالدته قائلاً:

= أي خدمة، اتفضلي يا ستي.

- سلملي يا حبيبي، يلا البس بسرعة بقى عشان أبوك ما يتزربنس
عليا، ما أهو أنا الحيطة المائلة اللي في البيت.

= حاضر خمس دقائق ونال.

بالفعل يقوم ماجد بارتداء ملابسه، والاستعداد للنزول، ولكنه يحدث نفسه قائلاً:

إيه دا! ازاي مجتش في بالي! أنا وأنا بدخل رقم التليفون كان فيه بحث بالاسم! أنا ممكن أجيب رقم تليفون بيت مريم باسم باباها! طب هجيب اسمه كامل منين! اه النتيجة! أنا معايا صورة النتيجة على الكمبيوتر.

وبالفعل يفتح ماجد الكمبيوتر ليجد صورة النتيجة، كان قد صورها أحد أصدقائه بالموبايل، وكان اسم مريم هو آخر اسم في الكشف، الآن وجد اسم والدها كاملاً «مريم علي أحمد عبد الرحيم»

كتب ماجد الاسم في خانة البحث، وبحث عنه فظهر له رقم الهاتف والفاتورة تفصيلاً، كتب رقم التليفون على هاتفه، وأسرع للنزول حتى يتتجنب توييخ والده له ولوالدته، ركب ماجد مع والده ووصل العمل وهو يفكر فيما سيفعل، ما هو السيناريو المتبقي، فليس من المنطقي أن يتصل ويسأل عن عنوانهم، أو يسأل هل خطبت مريم أم لا، هل تزوجت أم لا زالت تنتظر نصيتها وقسمتها.

ظل ماجد يفكر حتى جاءت في باله فكرة، هو أن يتصل ويخبرهم أن أحدهم أرسل لهم طرداً ويحتاج إلى العنوان بالكامل حتى يتمكن من إيصاله، وبالفعل يحصل ماجد على العنوان، فالآن قد قطع نصف المشوار، يتبقى أن يعرف هل ارتبطت مريم أم لا، ولكن كيف سيحصل على تلك المعلومات؟

ذهب ماجد إلى العنوان الذي وصفته تلك السيدة التي يبدو أنها أم مريم، كان منزلهم في منطقة شعبية، ويوجد أسفل منزلهم قهوة شعبية تشبه تلك القهاوي الموجودة في منطقته، جلس ماجد على القهوة وفكر كيف سيسأل عن أبي مريم، لم يكن يهمه السؤال عن والدها بقدر اهتمامه بمعرفة أين مريم وماذا عنها، هل خطبت أم تزوجت، أم ماذا حدث.

بعد أن شرب ماجد قهوته، ودفع الحساب، ذهب إلى ذلك البقال الموجود في البناءة التي توجد بجوار منزلهم واشتري زجاجة مياه غازية ودفع حسابها وسألة في خبث قائلاً:

= اسم الكريم إيه؟

-هاني.

= ازيك ياعم هاني!

-الحمد لله يا باشا.

= أنا كنت بسأله عن واحد هنا اسمه أبو مريم، كنت جاي أوصله حاجة حد باعهالي من برة بس مش عارف أوصله.

-أبو مريم مين؟

= مش عارف بنته لسه متجوزة من قريب أو مخطوبة باین! × قالها ماجد بخبث لكي يجعله يحكى له.

فقال له عم هاني:

-اه اللي كان فرحتها من كام شهر على الطيار دا؟!

وقع الخبر على مسامع ماجد كالصاعقة، لفت الدنيا به ودارت،
شعر أن قدمه لم تقو على حمل جسده الهزيل الذي شعر بثقل غريب
فيه وكأنه ازاد مائة كيلو من الجرامات فجأة.

قد تزوجت مريم، وقد انتهى الموضوع، لا بد أن تكون تلك هي
النهاية الحتمية، فالقدر لن ينصف الجبناء، أنصاف الرجال،
هكذا وبخ نفسه في قسوة ، ترك ماجد المكان وتحرك ليرحل وكان
يجر قدميه جراً، كانها لا تريد التحرك أو لم تعد تقوى على المشي
كأنها هي الأخرى توبخه على فعلته فتعاقبه بعدم امثالها لأوامر مخه
وأجهازه العصبي.

ذلك المخ الغبي الذي ظن أنه يحسن صنعاً عندما فرط فيها أول
مرة، لم يقاطعه غير صوت صاحب البقالة قائلاً:

-امسك الباقي يا أستاذ، باقي الـ ١٠٠ جنيه بتاعتكم، بس استنى
هنا اللي اتجوزت دي مسمهاش مريم.

لم يعد قلب ماجد حمل مفاجأت لا حزينة ولا سعيدة، ازدادت
ضربات قلبه وخفقانها، وقال له في لهفة:

أمال إيه ياعم هاني!

-دي اسمها داليا، أنت قصدك على مين؟

=أبو مريم، أستاذ علي.

-اه أنت قصدك على الأستاذ علي! الراجل الطيب ده، بنته
مهندسة صح؟

=اه مهندسة.

-بس دي مكنش فرحة قريب ولا حاجة، دي مش مخطوبة حتى.

حينها تدفق الدم في عروقه وكأن الحياة عادت له من جديد،
بعد ما انخفض معدل ضربات قلبه، وكأن قلبه رفض الحياة بعد ما
سمعه، عاد ينبعض من جديد بقوة، وقال في فرح بالغ:

=يبقى أكيد أنا اتلخبطت، طب هو شغال فين؟ عشان أوصله
ال حاجات اللي معايا.

- هو شغال في البوستة اللي على أول الشارع الرئيسي اللي هناك
دا.

=متشكر يا عم هاني ربنا يخليك.

هم ماجد ليرحل فنادي عليه عم هاني قائلاً:

الباقي يا ابني؟

فلوح له ماجد من بعيد، خلي الباقي يا عم هاني، شكرًا، سلام
يا راجل يا عسل.

تعجب عم هاني قائلاً:

تسيب باقي ١٠٠ جنيه! مين دا الواد دا عبيط ولا إيه!

أسرع ماجد إلى عمل والدها وانتظره حتى أتيحت له فرصة
ليحدثه أثناء العمل، فحدثه قائلاً:

=أستاذ علي، أنا مش هاخد من وقت حضرتك غير دقيقة.

-أفضل يا ابني خير!

=أنا كنت عاوز أطلب أيد بنت حضرتك مريم!

-هنا! أنت بتهرج يا ابني!! يا ابني الحاجات دي في البيت مش في
الشغل.

=والله أبداً ياعمي، أنا جاد جداً، أنا ممكناً آجي لحضرتك البيت
النهاردة لو تحب .

-لا لا النهاردة إيه! خليها بكرة، ممكناً تيجي الساعة ٦٧

=تمام شكرًا يا عمي، مش هعطلوك عشان شغلك، سلام.

-طب مش هتاخد العنوان؟

=عارفه عارفه.

قالها في لهفة، وانصرف مما جعل والد مريم، يخبط كفًا على
كف، قائلاً في سره «إيه البلاوي اللي بتتحدف علينا دي بس يا رب،
الواد شكله مجنون»

عاد ماجد إلى العمل ليخبر والده بأنه سيدهب في اليوم التالي
لكي يتقدم إلى إحدى الفتيات التي كانت معه في الجامعة، وحكي له
عن ما حدث، فنظر له والده، في حب وقال له:

والله وكبرت يا ابني، وهشوفك عريس وهشوف ولادك.

فأجابه ماجد، بعد أن قبل يده وقال له:

ربنا يخليك ليما يا أبويا، لولا مجهدوك معايا أنت وأمي مكنش
زماني قدرت أعمل أي حاجة.

سأله والده في تحمس:

-أكيد طبعاً قولت لأمك!

= لا والله لسه.

-طب يلا روح قولها ومتقولهاش إنك قولتلي، عاوزها كأنها هي
أول واحدة تعرف، الستات بتحب كدا.

= أيةة بقى يا أبو السيد أنت يا جامد يا رومانسي.

-بس يا واد احترم نفسك.

= حاضر هروح أقولها.

ذهب ماجد إلى أمه التي لم تصدق أذنها، وأطلقت الزغاريد من
الفرحة، فقال لها ماجد في خجل:

= باااس باااس، أنا لسه هروح أتقدم، مقولتكيش أنا اتجوزت.

- دا يوم المنى يا ابني أخيراً هشوفك عريس يا واد يا ماجد، أنا
قلبي هيطير من الفرحة والله.

أنا هروح بكرة إن شاء الله، هنزل أجيـب قميص وبنطلون جداد
عشان أروح بيهم.

انزل هات اللي أنت عاوزه أحلى وأغلـى لبس، بقولك إيه، روح هات
من المحل الغالي بتاع زمان دا اللي اسمـه فازـه، هـات أحسن حاجة.

= فـازـه إـيه بـس يا ماما اسمـه زـارـا.

- فـازـه ولا زـارـا أـهي كلـها أـسامـي.

= حاضـر .

يدخل ماجد إلى غرفته ويفتح المكتب فيخرج سمير منه، يحكـي له تفاصـيل ما حدث وكيف وصل إلى مريم ولحظـات الأـمل فقدـانـه التي عـاشـها في نفسـ اليومـ، أـخـبرـهـ بأنـهـ سيـذهبـ غـداـ ليـقـابلـ والـدهـاـ، فـهـلـ سـمـيرـ فـرـحاـ وـظـلاـ يـتـراـقـصـانـ كـعـادـتـهـماـ، وـسـطـ أحـضـانـ منـ مـاجـدـ لـسـمـيرـ وـفـرـحةـ بـالـغـةـ، فـيـقـولـ لـهـ سـمـيرـ:

- هوـ دـاـ مـاجـدـ اللـيـ أـعـرـفـهـ، وـصـلـلـهـاـ اـزاـيـ؟

= لاـ دـاـ سـرـ المـهـنـةـ أـنتـ فـاـكـرـ نـفـسـكـ أـنتـ بـسـ اللـيـ بـتـفـكـرـ.

- ياـ وـادـ ياـ جـامـدـ، طـبـ هـتـعـملـ إـيهـ؟

= هنzel أشتري لبس جديد وهجهز نفسي لبكرة.

وبالفعل يذهب ماجد ليشتري لبسًا جديداً، يستعد لمقابلة أبي مريم، بينما تجلس أمه في المنزل تنتظر أن يعود لها ويخبرها ماذا حدث له في هذا اللقاء؟



لقاء مريم بماجد من جعید

يذهب ماجد وقد ارتدى ملابسه الجديدة، يتذكر أول يوم رأى فيها مريم في أول أيام الجامعة، كان حينها يرتدي أيضاً ملابس جديدة، ولكن تلك المرة من أموال قد تحصل عليها بتعبه وجهده من خلال العمل مع والده في مشروعهما.

ذهب ماجد ليخطبها وقد أصبح رجلاً ناجحاً له مشروعه الخاص، مشروع كبير يدر عليهم أموال طائلة.

طرق ماجد على الباب ففتحت له مريم، لم تكن تعلم أن ماجد هو العريس، بل لم يخبرها والدها أيضاً بأن هناك عريساً قادماً الليلة مقابلته وخطبتها، فتحت الباب فوجدت شخصاً يقف وقد ارتدى قميصاً وبنطالاً، ويحمل في يده لفافة من الشيكولاتة، عندما دققت النظر في وجهه، إذ به ماجد، ذلك الحبيب القديم، الحبيب الذي انسحب بلا مبررات وبلا أذار.

ابتسمت مريم عندما رأته ومن ثم عبس وجهها بعد أن قام المخ بتجمیع صورته، تغيرت ملامحها من الابتسام إلى العبوس، كان بمثابة نتیجة طبيعية وبدیهیة لذكريات بدأ مركز الذكريات السيئة

في المخ بعرضها بسرعة بالغة وكأنه هو الآخر أصيب بجرح من فعلة ماجد فقام بإخراج ما في جعبته، ليذكرها بما فعل، وكأنه اندهش من ابتسامتها الأولى، كأنه يخبرها كيف تبتسمين لهذا الوغد الذي أبكاكِ، الذي شغل بالك وفكرك بينما كان هو في وادٍ آخر.

لم تنطق مريم حينها كانت نظراتها كفيلة بشرح ما بداخلها، لمعة عينها توحى بكسرة ذلك القلب الهادئ الأبيض. صمتت حينها لم تقو على الكلام، وهكذا ماجد تسمر في مكانه، فبداخله كلام كثير، يريد أن يقوله ليحسن موقفه ولكنه يعجز عن التعبير، فقد خانته حروفه وكلماته واختبأت أمام نظرتها.

بعد أن استجتمع ماجد نسبة ضئيلة من قوته، استطاع أن يقول لها بصوت مكتوم:

= ازيك يا مريم، لسه زي ما انتي.

صمتت مريم كأنها لم تسمعه، فما يدور في بالها من ذكريات تعرض أمام عينها كشريط سينما، جعلها لا ترکز في كلامه ، ولكن بعد مرور ثوانٍ أجا به في هدوء:

-الحمد لله.

لم يقطع تلك المواجهة الصامتة غير صوت والدها من الخلفيه،
قائلاً:

-مين يا مريم؟

فقام ماجد بالإجابة بدلاً منها قائلاً:

- أنا يا عمي، ماجد سيد اللي جيت لحضرتك امبارح في الشغل.

فقال والدها:

- اتفضل يا ابني هتفضل واقف ع الباب كدا

دخل ماجد منزل مريم، بعد أن فتحت له الباب على مصراعيه، ودعاه والدها للجلوس في غرفة الضيوف، كان منزل مريم بسيطاً، يشير إلى أنهم أسرة مصرية بسيطة تعيش كباقي المصريين، يبدو أنهم لم يستطيعوا اللحاق بر Kapoor الطبقة المتوسطة.

جلس ماجد مع والد مريم، وتحدث معه عن نفسه وعرفه بنفسه قائلاً:

- أولاً يا عمي أنا آسف إني جيت لحضرتك في الشغل كده، بس أنا كان لازم آخذ ميعاد مع حضرتك ومكنتش عاوز آجي البيت على طول.

أنا اسمى ماجد سيد، خريج هندسة اتصالات بتقدير جيد جداً مع مرتبة الشرف ، دفعة مريم، كانت معايا في نفس السكن، أخذت إعفاء من الجيش، ومن حوالي سنة والدي عمل مشروع وأنا كنت معاه، فتحنا مشروع «كبدة السيد» والحمد لله بعد مرور سنة بقى عندنا كذا فرع.

فقال له والد مريم مازحاً:

- طبعا مين ما يعرفش كبدة السيد، دي أحلى وأطعم كبدة في مصر.

فأجابه ماجد في خجل:

- ربنا يخليك يا عمي، دا شرف ليا والله، أنا كان نفسني آجي أتقدّم لمريم من زمان بس كانت ضروريّة مش مساعداني، بس الحمد لله دلوقتي الأوضاع اتحسنّت كتير وبقيت أقدر أتجوز وافتتح بيّت، وإن شاء الله أقدر أسعد مريم بنت حضرتك.

فقطّاعه والدها قائلًا:

- طب وبالنسبة لأهلك؟

- والله أنا والدي كان شغال محاسب في مصنع كرتون لأكتر من ٢٠ سنة والناس كلها بتشهد له بالامانة والنزاهة لكن بسبب الأحوال الاقتصادية للبلد، قرروا في المصنع إنهم يقلّلوا العمالة، ومن ساعتها وأبويها فتح مشروعه الخاص، والفضل لله أولاً ثم للمشروع ده، هو اللي نقلنا نقلة تانية.

أما أمي فهي موظفة في مجلس المدينة، وعندي أخين، عبد الحميد وصافي، عبد الحميد كان بيشتغل مع خالي بس دلوقتي رجع وبيشتغل معانا وصافي لسه في الجامعة في كلية طب بيطرى.

- بس اشمعنى مريم بقى اللي اختارتها دونا عن الدفعه كلها؟!

هكذا القى أبو مريم السؤال وانتظر إجابة ماجد، تنهى ماجد ونظر أمامه غير ملتفت لأبي مريم، كان قد سرح بفكره وكأنه تذكر أول مرة رأى فيها مريم وقال بحب بالغ:

- مريم، عشان مفيش غير مريم واحدة بس، الطيبة والأصل، الهدوء والاحترام، كل دى حاجات بتبان يا عمي، الناس النقية مش تحتاج تتعامل معها عشان تعرف إنها كده، بيبقى حوالיהם هالة من الطاقة الإيجابية المريحة اللي تحسسك بالأمان بمجرد وجودهم في نفس المكان اللي أنت فيه، ومريم كانت معايا في السكشن وكانت قدام عيني ٥ سنين، مكنش ينفع بيبقى قدامى حد بالمواصفات دى، وأفكر في حد تاني.

ابتسم أبو مريم ابتسامة فخر بابنته وقال له:

- أشكرك يا ابني ع الكلام الجميل ده، مريم دي اللي طلعت بيها من الدنيا، وأتمنى ربنا يفرجني بيهَا، مع الشخص المناسب، أنا يمكن معرفتش بس ارتحتك، وأكيد لو فيه نصيب واتعرفت على أهلك هيبقو ناس متتخيرش عنك، أنت قطعت عليا شوط كبير لما قولتلي إنك كنت زميل مريم وكمان كنتوا في نفس السكشن وده هيسهل الأمور كتير إن شاء الله.

ثواني هنادي على مريم تيجي تقدر معاك.

نادى أبو مريم على ابنه الصغير محمود وأمره أن يخبر مريم أنهم بانتظارها في غرفة الضيوف، وبالفعل حضرت مريم وجلست معهما، لم تتحدث بكلمة واحدة، آثرت الصمت، فقطع والدها صمتها قائلاً:

- ده ماجد دفعتك كان معاكي في نفس السكشن، مش عارفاه ولا

إيه!

= لا عارفاه طبعاً يا بابا، مهندس ماجد كان من الناس المعروفة
ف الكلية.

- طيب الباشمهندس ماجد كان جاي يتقدملك، وبما إنكم عارفين
بعض، أنا هسيبيك نص ساعة تتكلموا مع بعض شوية، وبعد كدا
هرجعلكم.

ينصرف أبو مريم تاركاً ماجد ومريم لكي يتحدثا سوياً ومن ثم
يأخذ رأي ابنته، كانت مريم صامتة لا تنظر إلى ماجد، فقاطع
صمتها ماجد وقال لها:

= هتقضلي ساكتة كدا كتير؟

- هتكلم أقول إيه؟

= قولي بتفكري في إيه، قولي قولتي عليا إيه، اسمعي مني، افهمي.

- أسمع! جاي بعد سنة تقولي أسمع، في حين الوقت اللي كنت
محتجة أسمع فيه ماكنتش موجود، اختفيت.

= طب مش تعرفي حصل إيه!

- أيًا كان اللي حصل، كان لازم تيجي تفهمني، تيجي تقولي،
تعرفتي، سواء هنكمي أو لا، لكن الهروب عمره ما كان حل، إنك
تسيب المواضيع معلقة، لا هي مقفولة نقدر نتجاوزها ونساها ولا هي
مفتوحة هنكمي فيها لحد مانوصل للآخر.

١٨٠

= أنا يمكن اتصرفت غلط، بس مكانتش عاوز أظلمك معايا.

- وأنت كدا مظلمنتيش! إنك تسيبني مش عارفة أي حاجة دا مش ظلم؟! إنك تختفي فجأة دا مش ظلم! أنت كنت بتفكر ازاي!

= عندك حق والله، أنا يمكن حسبتها غلط بس ربنا عالم أنا نبغي كانت إيه، أنا منسيتكيش يوم أنا كنت بشوف وشك في كل مكان، كنت بسمع صوتك وبتخايل بيكي كل يوم، أنا يمكن اتصرفت غلط، بس أنا ضروري في كانت صعبة، الدنيا قفلت في وشي من كل مكان، افتقربت لما أبعد أنا بعمل الصح عشانك قبل ما يكون عشاني، افتقربت إن كل يوم هيعدني هيبدأي وبعد وهينسيبني، بس اكتشفت إن الأيام كل يوم بيفوت بيتوسح الجرح أكثر وأكثر.

مريم أنا كنت بشتغل ليل ويا نهار عشان أعدى الأيام، بس مكانتش بتعدني، أنا كنت بحاول مفكريش فيكي عشان كنت متأكد إنك أكيد اتخطبتي أو يمكن كمان تكوني اتجوزتي، انتي مش عارفة أنا تعبت على ما وصلتلك ازاي، أنا مش هلومك على قرارك دلوقتي، يمكن تكوني نسيتيني، يمكن الجرح اللي جرحتهولك وجودي هيزوده مش هيبدأويه، يمكن بقيتي شايقاني مش مناسب، أنا هتقبل أي حاجة، هتقبل قرارك، وسواء سامحتيني أو لا، فده هيكون نتيجة اللي عملته، وانتي مفيش أي لوم عليكي، مريم أنا بحبك، والله العظيم بحبك ومش متخيلاً حياتي يوم واحد من غيرك.

- ماجد وأنا كمان بحبك ولسه بحبك.

لم يصدق ماجد أذنه، أخذ قلبه ينبض بشدة وكأنه يريد الخروج من قفصه الصدري ليحتضن مريم، ويعذر لها بنفسه، أراد الخروج ليخبرها أنه أيضاً ضحية نتيجة تلك الكتلة الهمامية التي تقع في جمجمة ماجد التي من المفترض أنها تسمى مخا، ومسؤولة عن التفكير، ولكن يبدو أنها تخصص تفكير أحمق فقط لا غير.

يدخل أبو مريم قاطعاً تلك اللحظات، ويوجه سؤالاً إلى ابنته قائلاً:

-ها إيه رأيك يا مريمومة؟

= على إيه يا بابا؟

- على إيه؟! شوف البنت.

تخجل مريم، وتنتظر إلى الأرض قائلاً:

- اللي أنت شايفه يا بابا، أنا مدرس أكسر لك كلمة.

= يعني موافقة؟

- اللي أنت شايفة يا بابا.

= شوف البنت، ألف مبروك يا ولاد.

تطلق أم مريم زغاريد من خلف الستار، فقد كانت تسترق السمع، يحرر وجه مريم خجلاً وتدخل إلى غرفتها مسرعة، بينما يجلس ماجد ترسم على ملامحه تعابير الفرحة فيقاطعه والد مريم قائلاً:

- هستاك أنت وأهلك الخميس بعد الجاي عشان نقرأ الفاتحة
ونتفق على كل حاجة، وربنا يتمملكم على خير يا ولاد.

خرج ماجد من منزلهم في غاية السعادة لا يصدق نفسه، تحدث إلى أمه ليخبرها ما حدث، فأطلقت أمه الزغاريد في المنزل، أخذ والده منها التليفون لكي يبارك له، وطلبا منه العودة سريعاً لكي يحكي لهم ما حدث بالتفصيل.

عاد ماجد إلى المنزل مسرعاً، احتضنته أمه وأبوه، وجلسا معه حتى الساعة الثانية صباحاً يحكي لهم تفاصيل الموضوع منذ البداية حتى التقى مريم مجدداً، فقالت له أمه في لهفة:

- أنا نفسي أشوف مريم دي، أنا حبيتها من كتر كلامك الحلو عنها.

فأجابها ماجد في هيام بالغ:

= وهي تتحب أوي يا ماما، إن شاء الله هتحببها أكثر لما تشوف فيها وتعرف فيها وهتقولي ابنك عرف يختار.

دخل أبو ماجد وأمه لكي يناما فهذا آخر يوم لهم في ذلك المنزل القديم، دخل ماجد غرفته، وخلع ملابسه وهم ليحكي إلى سمير ما حدث، فكانت المفاجأة التي هزت ماجد وسحبت الدم من عروقه.



الثانية سمير ورجل الثالث

خلع ماجد ملابسه وارتدى ملابس النوم، ومن ثم أضاء النور والتقت ناحية المكتب ليفتحه، فيخرج سمير ليتحدثا ولكنه لم يجد المكتب، حينها لم يصدق عينه، أخذ يبحث عنه في غرفته الضيقة وكأنه يبحث عن قلم لا عن مكتب خشبي كبير، فهول الصدمة جعلته لا يفكر.

خرج من الغرفة وظل يبحث في المنزل فلم يجده أيضاً، فتح باب المنزل ونظر على السلم، فمن الممكن أن تكون أمه قد وضعته على السلم استعداداً لنقله إلى المنزل الجديد ولكنه لم يجده، أصبح وجه ماجد شاحباً، والدماء اختفت من عروقه تماماً، فاصفر وجهه ولم يعد قادراً على الوقوف، فأتكأ بظهره على باب الشقة عندما أغلقه وكان يفكر فيما حدث، عقله رافض بشدة ضياع المكتب أو بالأحرى ضياع سمير.

طرق على باب غرفة النوم الخاصة بوالده ووالدته، فهبا من النوم فزعين، وقامت أمه بفتح الباب قائلة في رعب:

-مين في إيه، في أي يا ابني؟

= المكتب، المكتب يا ماما.

- ماله يا ابني؟

= مش موجود، مش عارف راح فين.

- وأنت مصحيينا عشان كدا! متخافش شيلت كل الحاجات المهمة
اللي فيه الأول.

= حاجات إيه! سمير فين!

- سمير مين! أنت شارب حاجة؟

= وديتي المكتب فين يا ماما؟

- اديته لبائع الروبابكيا يا ماجد في إيه!

= ليه يا أمي عملتي كدا! حد قالك إني مش عاوزها!

- يا ابني إحنا وزعنـا العـفـش بـتـاعـ الـبـيـتـ كـلـهـ، دـاـ الـوـحـيدـ الـلـيـ كـنـتـ
مـسـتـحـرـمـةـ أـدـيـهـ لـحدـ، عـشـانـ مـبـهـدـلـ، فـاستـتـيـتـ بـتـاعـ الرـوـبـابـكـيـاـ يـجـيـ
يـاخـدـهـ، طـبـ وـالـلـهـ مـرـضـتـشـ آـخـدـ مـنـهـ فـلوـسـ، كـانـ عـاـوزـ يـدـيـنـيـ فـيـهـ
جـنـيـهـ.

كانت كلمات أم ماجد تنزل عليه كالصاعقة، كانت تخرج منها
بسلاسة وهدوء وذلك لأنها لم تكن تعلم أهمية هذا المكتب بالنسبة
لاماجد، بل بالنسبة لعائلتهم كلها.

ذهب ماجد إلى غرفته لكي ينام، أو كي يتظاهر بالنوم حتى لا يشعر أهله بشيء غريب، فهذه أول مرة منذ سبع سنوات سينام فيها ماجد في غرفته بدون رفيقة سمير. بات طوال الليل يفكر فيما سيحدث له ولشارييعهم، هل سينتهي كل شيء وينهار بضياع سمير، أم ماذا سيحدث، فسمير هو سبب كل شيء.

يرجع ماجد بذاكرته ليتذكر دور سمير في حياته منذ أن ظهر له في أوائل الدراسة وأثناء الجامعة وبعد ترك والده العمل، وأثناء بحثة عن مريم، فسمير له دور بارز وعلامة مضيئة في حياة ماجد، الآن قد انطفئت، ومن يعلم هل سيقوى ماجد على أن يكمل الطريق بدون سمير أم سينهار.



رحلة البحث عن سمير

كان ماجد قد فقد الأمل في أن يجد سمير، فهو لا يعرف من هو بائع الروبابيكيا الذي اشتري المكتب، ولو عرف مكانه فهو بالطبع قد باعه إلى تاجر أكبر منه ليبيعه إلى تاجر أكبر منه وهكذا.

فالبحث عن المكتب بمثابة البحث عن إبرة في كومة كبيرة من القش، ولكنه قرر ألا يفقد الأمل، فقد تعلم من سمير أن اليأس خيانة، خيانة لقدراتك ولنفسك، وفي الصباح الباكر، اعتذر ماجد لوالده عن الذهاب إلى العمل معه لأنه يجهز ليوم الخميس بعد القادر يوم خطبته على مريم.

فوافق والده ومنحة إجازة أسبوعاً لكي يرتب فيها أموره، لم يكن يعلم والده أن تلك الإجازة التي طلبها ماجد ما هي إلا للبحث عن المكتب المتهالك، أو بمعنى أصح البحث عن سمير ذلك الجن الذي غير حياة ابنه دون أن يشعر أحد.

نزل ماجد من المنزل وذهب إلى أحد الجيران، عم رمضان ذلك الرجل الكهل الذي يعرف كل من في المنطقة سواءً كان كبيراً أم صغيراً، فبالرغم من كبر سنه إلا أنه يمتلك ذاكرة حديدية قوية،

ذهب ماجد إليه وسأله عن بائعي الروباليكيا المشهورين في المنطقة، فأخبره بأسمائهم وكان عددهم ٣ هم، عطية، رشاد، صفت، أكبرهم الحاج رشاد، فهو يعتبر كبير بائعي الخردوات والروباليكيا في المنطقة.

عرف ماجد من الحاج رمضان عناوين بيوتهم، فذهب في البداية إلى عم عطية، ذلك الرجل الذي فقد كل أسنانه ولكنه بالرغم من ذلك كان يحدثه وهو يأكل ولا يكف فمه عن التحرك والمضغ، سأله عن مواصفات مكتب خشبي قديم، كان عند والده وأخذه أحد بائعي الروباليكيا، لا يعرف اسمه، ولكنه أجاب أنه لم يعمل منذ أسبوع بسبب مرضه فمن المستحيل أن يكون هو من أخذ ذلك المكتب.

ودعه ماجد وانصرف في طريقة إلى العنوان الثاني، عم صفت، ذلك الرجل الأربعيني الذي لا يبدو عليه مطلقاً أنه يبيع روباريكيا، ولكن تحسبه عندما تراه لأول مرة أحد العاملين في السلك الدبلوماسي السويدي، وذلك بسبب شعره الأصفر وعينيه الزرقاوتين، سأله ماجد عن مكتب خشبي متهاalk قد أخذه أحد هم من منزلهم البارحة. سكت هنيهة وقال له:

- لا يا باشمهندس، أنا ما اشتترتش مكاتب خالص من زمان، طب ما تسأل عند عطية هو ليه في الخشب.

=منا سألت قالـي انه مشتغلـش بقالـه أسبوع عـشـان تعـبـان.

-تعبان! هو دا بيتعب! دا شغال اكل زي التاكس، تلاقيه بس كان
عنه إمساك عشان بيبلע على طول، على العموم مقدمكش غير
الكبير بقى.

= حاج رشاد!

-أنت روحته هو كمان!

= لا لسه.

-طيب بيقى إن شاء الله تلاقي ضالتك عنده، دا كبيرنا وعارف
كل حاجة، وعارف كمان كبارات المهنة.

= تسلم يا عم صفوتو ربنا يخليك.

-حبيبي على إيه، سلملي على والدك بقى.

= يصل.

خرج ماجد وقد فقد ثلثي الأمل، فالآن لم يتبقَّ أمامه إلا الحاج
رشاد، هو الأمل الأخير، ذهب ماجد إلى منزل الحاج رشاد، وعرفه
بنفسه فرحب به، ودعاه للدخول فاعتذر ماجد وسألَه عن مكتب
خشبي قديم هل وصل له، فأجابه الحاج رشاد قائلاً:

-مكتب خشب، مكتب خشب، طب شكله عامل ازاي؟

= قديم كده، متھالك خالص ومبهدل.

-ما هو أكيد مبهدل يا هندسة، هو فيه حد هيدي مكتب من ايكيا
لباتاع روبيايكيا.

=اه عندك حق، هو مكتب خشب، تقيل، بدرج واحد في النص،
ودرجين صغيرين ع الجناب.

-اه عندي حاجة جت امبارح بالمواصفات دي.

=بجد!

لم يتمالك ماجد نفسه من الفرحة، كاد أن يحتضن عم رشاد
ولكن خوفه من أن يشك في أمر المكتب، تمالك نفسه، وقال له:

=طب ممكن أشتريه!

-تشتريه! بس دا مش مقامك يا أستاذنا.

=لا هو مكتب عزيز عليا، كنت بذاكر عليه وأنا في ثانوية عامة
ومرتبط بيها بذكريات حلوة.

-تمام معاك عربية تاخده فيها؟!

=معايا عربية اه.

-نص نقل؟

=لا عادية.

-لا هات عربية نصل ما يجيش في عربية عادية دا.

= طب ثواني وهجيلك.

يذهب ماجد ليبحث عن عربة نصف نقل، لكي يضع فيها المكتب، وينقله مباشرة على المنزل الجديد، ذهب ماجد بعد أن اتفق مع سائق السيارة أن يأخذ المكتب من عند عم رشاد إلى منزلهم الجديد، وقف ماجد بجوار السيارة بينما كان صبيان المعلم رشاد يحملون المكتب بعدم اكتتراث ليضعوه على السيارة حتى صالح ماجد فيهم قائلاً:

= إيه اللي بتعملوه دا!

صالح فيهم الحاج رشاد موبخاً إياهم قائلاً:

- بالراحة يا بهائم شوية على مكتب الأستاذ.

قال ماجد في توتر:

= بس دا مش مكتبي!! مش دا المكتب يا عم رشاد.

- مش دا المكتب! أنت مش قولت قديم وبدرجين على الجانب؟!

= بس مش هو، مش هو.

- يا أستاذ خلصنا بقى وخد أي حاجة.

= أي حاجة إيه بس، مش هو المكتب، أكيد فيه غيره.

قال أحد الصبيان:

- لا يا معلم رشاد مفيش في المخزن مكتب إلا دا!

فقال ماجد:

= طب ممكן أدخل أبص في المخزن يمكن ألاقيه!

- ماتعطلناش بقى يا أستاذ، طب هتشتري المكتب دا ولا لا؟

= أدخل أبص بس وهدفعلك فلوسة مفيش مشكلة.

هكذا قالها ماجد في يأس وبالفعل دخل إلى المخزن ليبحث عن المكتب فلم يجد له أي أثر، حينها أحبط ماجد إحباطاً شديداً، كان يجر ذيول الخيبة جراً، فقد ضاع المكتب وضاع سمير، بل قد ضاع ماجد أيضاً.

خرج ماجد من المخزن ودفع لعم رشاد ثمن المكتب وطلب منه أن يعطيه لأحد محتاج، فربما هناك طالب غير قادر على شراء مكتب يستذكر عليه دروسه قد يفرح به فرحاً كبيراً.

هم ماجد بالرحيل، فقال له الحاج رشاد بص يا ابني.

التفت إليه ماجد في حزن، فقال له الحاج رشاد:

- أنت ممكן تلaci ضالتك دي عند المعلم زكريا، بس دا مش هنا دا في حته اسمها الحيتية.

= أروحله أي مكان، معاك عنوانه؟

يعطي الحاج رشاد ماجد العنوان فيأخذ ماجد العنوان وينطلق إليه فهذا هو الأمل الأخير، يذهب ماجد ليجد مكاناً كبيراً يعج بالأأخشاب

والخردوت، يعمل به عشرات الشباب والرجال، لم يكن يعلم ماجد أن على وجه الكرة الأرضية مكاناً كهذا.

المكان كان أشبه بمخازن شركات البترول، التي يتم تصوير المطاردات بين عصابات المافيا فيها، فأصوات القرقعة التي تصدرها الخردوات الحديدية عند رميها فوق بعضها أشبه بصوت طلقات الرصاص التي تصطدم بالحواجز والبراميل الحديدية في المواجهات المسلحة.

يسأل ماجد أحد العاملين عن المعلم زكريا، فيشير له إلى رجل يجلس على مكتب في نهاية هذا المخزن العملاق، يمسك بيده اليمني سبحة وبالأخرى لبي الشيشة التي لا تفارقها، يذهب ماجد إلى المعلم زكريا، يعرفه بنفسه ويقول له:

= ازيك يا معلم زكريا، أنا مهندس ماجد جاي لحضرتك من طرف المعلم رشاد، رشاد الزنفري.

- يااه رشاد، دا رشاد دا أكثر من أخيها، فكرتني بأيام زمان والله دا أنا وهو كنا، ..

ظل يحكى عن ذكرياته هو ورشاد وكأنه رشاد ذو الفقار وزكريا عزمي، لم تكن تلك القصة مثيرة إطلاقاً ل Mageed بل كان كل ما يشغل باله حينها هو معرفة أين ذهب سمير.

لذلك قاطعه ماجد قائلاً:

= ذكريات جميلة فعلًا، بس أنا كنت جاي من طرفه عشان بسأل
على مكتب خشب قديم جه هنا امبارح أو النهاردة الصبح.

- ياااه، يا ابني إحنا كل يوم بنزل خشب كتير وبيخرج من عندنا
خشب كتير مكتب إيه اللي بتدور عليه.

= أرجوك يا معلم المكتب دا فيه حاجة مهمة جدا بالنسبة لي ولازم
أوصله.

- ياءة فكرتني برشاد، ياااه، أيام.

= ياحاج هو إيه خزنة الذكريات اللي افتحت مرة واحدة دي ، عم
رشاد مش فاكرك أساساً، أنا بس عاوزك تساعدني إني ألاقي المكتب.

- هساعدك يا ابني، عارف ليه!

= أكيد طبعاً عشان خاطر رشاد، إجابة متوقعة يعني.

- لا رشاد مين، دا أسوأ صاحب عرفته في حياتي، يلا الحمد لله
أنه غار.

= أمال هتساعدني ليه!

- عشان خاطر بدرية، اخت رشاد، حب عمري، اللي مش قادر
أنساها، خمسة وتلاتين سنة وهي في بالي كل يوم، كل ساعة، كل
دقيقة، ياااه عليك يا بدرية، بدرية دي بقى.

يقاطعه ماجد قائلاً:

=أنا مقدر والله، بس أنا متوقع كل اللي هتقوله إنك من بعدها
ماحبتش، واترهبنت وقررت ماتتجوزش تاني وكل شوية تفكر فيها.

تعجب المعلم زكرياء وقال:

-مين يا ابني اللي قال كدا! أنا متتجاوز أربعة وعندي ١٧ ولد وبنت!
أنا اتجوزت بعد ما سبت بدرية بأسبوع، هل أبدول لك ذلك الممحون يا
ولدي ١٦

=ايه!

-آسف يا ابني اندمجت شوية، قصدي يعني إن الحياة ما بتوقفش
على بدرية ولا غيرها.

=أمال إيه المحن بتاع كل دقيقة وكل ساعة من خمسة وتلاتين سنة!

-لا يا ابني أنا بفتكر ازاي سرقتنى، وسرقت الحماره اللي كنت
بجر بيهها عربية الروبابيكيا بتاعتي قبل ما ربنا يكرمني، بنت الحرام
قلبتني قبل ما تمشي، هي وأخوها ولاد ستين XXXXXXXX

=خلاص يا عم زكرياء، طب أنا مليش دعوة بيهم، هتساعدني أنا
ولا لا!

-هتساعدك يا ابني، عارف ليه!

=يادين النبي، مش عاوز أعرف ساعدني من غير ما أعرف،
فاجأني بالله عليك.

ينادي المعلم زكريا على الصبي نصّة، ويقول له:

- تاخد الأستاذ عند الواد عفيفي، تخليه يوريله كل الخشب اللي
في المخزن.

- اتفضل معاه يا أستاذ ماجي.

= ماجد، ماجد يا عم زكريا.

- ماجد، ياااه، فكرتني بأعز أصحابي، ماجد أخو فتحية.

= يااااس أبوس ايدك ما أنت مكمل، يلا يا عفيفي، يلا أبوس
ايدك.

يذهب ماجد مع عفيفي إلى مخزن الأخشاب، يبحث عن المكتب
وسط أكوام الأخشاب المتراكمة، يبحث عن أي درج أو مقبض من
مقابضه لكي يبعث الأمل في قلبه بتواجد المكتب هنا، لكنه لم يجد
أي أثر.

٣ ساعات من التنقيب عن المكتب بلا هدف، يفقد ماجد الأمل،
يشكر عفيفي ويعطيه مائة جنيه تقديرًا لتعبه معه، ويهم بالانصراف
في حزن بالغ فقد ضاع الأمل تماماً في أن يعود إليه سمير مرة أخرى.

يخرج من المخزن ويقترب من باب سيارته فيفتحه، ليسمع صوتاً
قادماً من الخلف قائلاً:

- أستاذ ماجد، أستاذ ماجد.

= خير يا عفيفي؟

- هو المكتب اللي بتدور عليه دا بدرج واحد في النص ودرجين على

الجناب!

= اه هو يا عفيفي.

- فيه حته خشب من الجنب اليمين مكسورة؟! حته كبيرة كدا

بتخربس!

= أية هو يا عفيفي، فيه، فيه؟

- هو اتباع النهاردة قبل ما تيجي بنص ساعة، بس أنا عارف اتباع
لدين ومعايا العنوان.

انفرجت أسارير ماجد وأخذ العنوان من عفيفي، فالمكان كان في
ال滴滴 الأحمر في وسط القاهرة، وكان الشارع يسمى «سكة المناصرة»
حيث يعتبر أقدم شارع لصناعة الأثاث وبيعه في القاهرة، حيث
اشتراء نجار هناك يدعى عم أحمد منصور.

ذهب ماجد إلى المعلم منصور، كانت ورشة صغيرة تقوم بقطع
الأخشاب وإعادة تدويره لتصنيع أثاث جديد مودرن، دخل ماجد إلى
المعلم منصور وحكى له القصة كلها، وسأله عن المكتب الذي اشتراه
منذ ٥ ساعات، هل لا زال موجوداً أم باعه هو الآخر، فأجابه المعلم
منصور قائلاً:

- لا للأسف المكتب ما بقاش موجود.

= بعته لمين طيب وأنا أروح له.

- لا ميعتوش لحد.

= أمال يا معلم، أنا محتاجه ضروري، ممك أشتريه بأي تمن.

- بص وراك.

ينظر ماجد خلفه ليجد المكتب، ولكنه قد تم تفكيكه وتقطيع أخشابه، حينها لا يتمالك نفسه، يجري ماجد على الأخشاب الملقاة على الأرض يحتضنها وتفر دموع عينه في مشهد مهيب، يجعل المعلم منصور يتعجب مما حدث للتو أمامه ، فماذا يدفع شاباً يبدو عليه الوقار ويمتلك قدرًا كبيراً من الذوق والثقافة أن يلقي بجسمه على الأرض يحتضن تلك الأخشاب القديمة المتهاكلة. يذهب إليه المعلم منصور ويضع يده على كتفه برفق قائلاً :

- شكلة كان عزيز عليك المكتب أوي.

= جداً، جداً يا جج.

- لو عاوز الخشب خده واعتبر حسابه وصل.

= ربنا يخليك يا معلم أنا هاخده معايا فعلًا، بس هدفع تمنه،
هحتفظ بيها، دا ليه فضل كبير أوي عليا وعلى أهلي.

- ربنا يكرمك يا ابني، فعلًا ولاد الأصول العشرة ما تهونش عليهم
لا معبني ادم ولا جماد.

ينادي المعلم على الصبي حدوة، لكي يحمل تلك الأخشاب إلى سيارة الأستاذ ماجد، يأخذ ماجد تلك الأخشاب ويعود بها إلى منزله يدخلها غرفته، ويطرق عليها جميعاً، محاولاً البحث عن سمير ولكن بلا فائدة، فسمير لم يعد في المكتب، لا يعلم أين ذهب.

هل من الممكن أن يكون مات سمير حزناً على منزله الذي عاش فيه طيلة عمره ورآه يُكسر ويقطع أمام عينه؟ دخلت أم ماجد على ابنها الغرفة لتتجده يجلس على الأرض محاطاً بأخشاب المكتب، يبدو عليه الحزن الشديد فقالت له:

- في إيه يا ماجد، مالك؟

= مفيش حاجة يا ماما.

- إيه اللي عملته في المكتب دا!

= مفيش كنت بدور عليه، وكان اتباع لنجار هو اللي عمل فيه كدا!

- يا ابني هتعمل إيه بييه! أنا جاييلك أحسن منه في بيتنا الجديد.

= أنا كنت عاوزة هو، كان فيه حاجة مهمة بالنسبة لي، بس خلاص كل حاجة راحت.

- حاجة مهم! قصدك ع الورقة القديمة اللي شبه ورق البردي دي؟! أنا شايلها لك معايا.

= ورقة إيه!

-استنى أجي بها لك.

تحضر أم ماجد ورقة كانتي كان يراها ماجد في المكتب في كل مرة يتعرض لأزمة أو أي حدث كبير في حياته، والتي كان يشك في أن سمير من يرسل إليه تلك الكلمات ولكن أين سمير الآن، فقد مات سمير، يفتح ماجد الورقة ليقرأ ما بها، فيجد الآتي:

«أنت مصدر كل قوة، قدراتك لا محدودة، وامكانياتك في تطور مستمر، لا تنتظر قوة مساعدة من الخارج، فقوتك الداخلية أكبر بكثير مما تتوقع أو تظن»

يبتسم ماجد ابتسامة حزينة ويُسرح بخياله قليلاً، لا يقطع شروده غير صوت أمه وهي تقول:

-يعني إيه بقى الكلام دا؟!

=يعني كل واحد يقدر يعمل كل حاجة من غير ماجد يساعدده.

-ومين اللي كتب الكلام دا على الورقة القديمة بالخط الغريب دا؟

=اللي كتبه مات، أنا لازم انزل دلوقتي.

-راح فين يا ابني! الوقت أتأخر.

=مش هتأخر، شوية وراجع، سلام يا أمي.

ينزل ماجد يركب سيارته أو بمعنى أدق سيارة والده لا يعلم إلى أي وجهة هو ذاهب، يجد نفسه قد وصل إلى شارع النيل فيركن

سيارته وينزل ليقف على كورنيش النيل، يشاهد تلك المركبات التي تتحرك فيه، يتأمل هدوءه، وطبيعته، وأصالته، يحاول أن ينسى ذلك اليوم من حياته ويقطع تلك الصفحة من تاريخه إلى الأبد.

وقف ماجد قرابة الساعة يتأمل في نهر النيل، ويفكر في حياته بعد سمير، فقد كان عوناً له في دراسته وعمله وحتى ارتباطه وبحثه عن مريم، فكان بمثيل السند والظهر الذي يتکأ عليه، أصبحت قدمه غير قادرة على حمله، فذهب يجلس على إحدى تلك المصطبات الخشبية التي تتواجد على كورنيش النيل.

جلس ومال بظهره إلى الخلف وأخذ يتذكر سمير ودعاباته، تلك الطرائف التي كان يحكىها له عن عالم الجن، أخذ يتذكر كيف أخذ بيده أثناء الدراسة في الثانوية العامة وبعدها، بدأت عيناه تمتلأن بالدموع تأثراً وحزناً على فقدان سمير، فأخذ يضرب بيده بشدة على تلك المصطبة قائلاً:

=أنا السبب أنا اللي ضيعتك يا سمير، يا رتني كنت فهمتهم في البيت إن المكتب دا أهم حاجة عندي، سببتم يفرطوا فيك، أنا اللي ضيعتك يا سمير، أنا اللي ضيعتك.

ويضرب بشدة حتى كادت أن تتورم يداه من كثرة الضربات التي كان يضرب بها المصطبة حتى سمع فجأة صوتاً يقول:

-جرا إيه ياعم أنت هو أنت ورايا ورايا في كل حته؟

انتقض ماجد غير مصدق ما يسمعه وقال:

= مين؟

: فأجابه:

- أنا سمير أو المرحوم سمير يا عم.

= ايه أنت لسه عايش؟!

- اه يا عم لسه عايش الحمد لله، عمر الشقي بقى.

= جيت هنا ازاي!

- جيت بأوبر.

= نعم!

- ما أنت بتستظرف، جيت ازاي يعني إيه؟

= يعني سبت المكتب ازاي؟

كنت نايم في أمان الله، أمك باعت المكتب لواحد بتاع روبيكيا، وبعد كدا اترميته في مخزن عند راجل غتت كدا ورغاي، كل ما يشوف واحد يكلمه عن البنات اللي كان بيحبها من ٢٥ سنة.

: قاطعه ماجد قائلاً

= قصدك المعلم زكرياء؟

-اه هو يا عم، صدع دماغ أمي، المهم ودوني لواحد نجار وأول
ما شاف المكتب دخله تحت المنشار عشان يقطعه، ساعتها جريت
في الشارع مكنتش عارف أروح فين، كل ماروح أسكن شجرة ألاقيها
مسكونة، فضلت أتمشى لحد ما جيت هنا قعدت على المصطبة دي
ملقتش فيها حد قمت سكتها.

=أنت مش متخييل أنا فرحان ازاي، أنا مش مصدق نفسي والله يا
سمير، أنا كنت هموت من غيرك يلا تعال اركب معايا.

-أركب فين؟

=تعال اركب معايا هنروح.

-لا ياعم أنا مبسوط هنا

=مبسوط هنا!

-اه يا عم كل شوية يجي شباب وبنات يقعدوا يحبوا في بعض
وأنا أقعد أتفرج، مصر فيها بنات حلوة أوي يا ماجد، أنا سعيد وأنا
قاعد هنا بتفرج على الحبيبة وأنت عارفني فيها بذرة رومانسية كدا ما
صدقت أقعد في حلة طرية عشان أرويها.

=نعم!

-ماجد أنت مش عاوزني عشان أنا وحشتك أنت خايف كل النجاح
اللي أنت وصلتله دا يروح لما أنا أمشي.

= انت بتقول إيه!

- اللي سمعته، أنت فاكر إني أنا اللي خليتك تجيب مجموع كوييس في ثانوية عامة، أنا اللي كنت بساعدك في الكلية عشان تجيب تقدير جيد جداً، أنا اللي قولتلك تعمل إيه لما أبوك ساب الشغل وقولتلك على المشروع اللي انتوا دلوقتي عايشين من خيره، أنت فاكر إني أنا اللي خليت مريم تحبك وأنا اللي ساعدتك عشان توصلها، مش كدا؟

= محدش غيرك عمل كل دا.

- عشان غبي وهفضل غبي، أو عشان انتوا البشر كلكم أغبيا.

= ما تحترم نفسك!

- أنا بتكلم بجد، إيه اللي حصل من فوق دا مكنش ينفع أنت تعمله لوحدك! تجيب مجموع في الثانوية؟! تجيب تقدير في الكلية! تعمل مشروع وينجح! ترتبط بالإنسانة اللي بتحبها! كل دي حاجات محتاجة جنى عشان يتحققالك! ماجد أنت مش محتاج مساعدتي في حاجة.

= يعني إيه!

- ماجد أنت اللي عملت كل ده، أنا معملاتكش أي حاجة، أنا حتى مشجعتكش، المذاكرة أنت اللي ذاكرت، الحاجات المهمة اللي كنت بتذاكرها أنت اللي كنت معلم عليها طول السنة وأنت بتحضر دروسك، سهر الليالي أنت اللي سهرته، في الكلية أنت اللي اجتهدت، حتى مشروع الكبدة، أنت اللي فكرت فيه مش أنا.

= بس أنت اللي عملت دراسة الجدوى وقولتلي هعمل إيه بالظبط.

- مين قالك كده، أنت اللي عملت كل ده، أنت بتعامل على إني أنا وأنت اتنين مختلفين مش نفس الشخص.

= مش فاهم.

- مش بقولك غبي، ماجد كل إنسان جواه صراع بين الحق والباطل، بين الخير والشر بين الأفكار الإيجابية والأفكار السلبية، بين النجاح والفشل، كل إنسان عنده الطريقين، وهو اللي بيختار، إمكانياته هي هي، ممكن تنجحه وممكن تخليه أفشل واحد في العالم.

اللي كان بيقولك اعمل دا صح وبلاش دا أنت، حاجة جواك اسمها الضمير، يمكن أنت أول مرة وأنا بكلمك وسألتني أنت مين سمعت الاسم غلط، سمعته سمير بدل ضمير.

= نعم! أنت بتقول إيه!

- عقلك الباطن خيلك إن دا جن واسمه سمير، ساعتها سيبتك على عماك عشان لقيتك بتنجح، بتنجح بإرادتك وقوتك، بس كنت متخيّل إن حد تاني بيشدك، مع إنك أنت اللي كنت بتشد نفسك بنفسك.

أنت اللي عملت كل حاجة يا ماجد، أنت الإنسان اللي ربنا خلقة وكرمه، ربنا قال «لَقَدْ خَلَقْنَا الْإِنْسَانَ فِي أَحْسَنِ تَقْوِيمٍ»

عارف معنى الكلام دا إيه؟ يعني مفيش حد أحسن منك، مفيش
حد يقدر يعملك حاجة أنت متقدرش عليها، أنت أساس كل حاجة
يا ماجد، أنت اللي ربنا نفع فيك من روحه، تفتكر في حاجة ممكن
تقدر عليك؟

= يعني أنت موجود ولا لا أنا مبقتش فاهم حاجة.

- اسأل نفسك، وفكـر كـويس واحسبـها صـح، احسبـها صـح يا ماجـد
وأنت تعرفـ، هل فيه سمـير فعلـاً، ولا مـفيـشـ.



هـكـذا تـنـتـهيـ الحـكاـيـةـ لاـ يـعـلـمـ مـاجـدـ ماـذـاـ حدـثـ ظـلـ يـفـكـرـ كـثـيرـاـ
وـكـثـيرـاـ، لمـ يـقـطـعـ تـفـكـيرـهـ إـلاـ صـوتـ أـمـهـ قـائـلـةـ:

- أنت يا خـمـ النـومـ، قـوـمـ يا زـفـتـ السـاعـةـ بـقـتـ ١٢ـ وـنـصـ وـالـمـلـاـيـكـةـ
الـلـيـ تـكـتبـ أـسـمـاءـ النـاسـ مشـيـتـ وـ الإـمـامـ خـلـاـصـ خـلـصـ الـخـطـبـةـ
وـهـيـصـلـيـ الـجـمـعـةـ، قـوـمـ خـلـيـ ربـناـ يـكـرمـكـ، قـوـمـ يـالـاـ أـنـتـ مـلـحـدـ ولاـ إـيهـ.

لـتـ



عفريت من المعادي

ماذا ستفعل لو وجدت في يوم ما عفريتا مسخراً
لخدمتك؟ فيما ستسألك عن خدماته وما هي الأهداف التي
ستجعله يحققها لك؟

ولكن، ماذا لو كان هذا العفريت من المعادي؟ لم
يعد يوماً على خدمة أحد ويحتاج إلى من يقدم
له الخدمة؟

هل من الممكن أن يسرّع عفريت إنسانياً لخدمته؟
وهل من الممكن أن تنشأ بينهم علاقة صداقة تجعل
حياة كلّ منهما أفضل؟
أسئلة نجيبكم عليها في تلك الحكاية التي تأخذك
إلى عالم الجن المصري الساخر.



9 789776 541634



www.al-kutub.com